


Milik Departemen P dan K  
Tidak diperdagangkan  
Untuk umum

# Hikayat Indra Bangsawan

Ramli Harun

Direktorat  
dayaan

Departemen Pendidikan dan Kebudayaan



PPS/Ac/3/81

899.2292 H116

Milik Dep. P dan K  
Tidak diperdagangkan

# Hikayat INDRA BANGSAWAN

Alih Aksara  
RAMLI HARUN

TANGGAL	No. INDEK
18 NOV 1984	1337

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1982

Diterbitkan oleh  
Proyek Penerbitan Buku Sastra  
Indonesia dan Daerah

Hak pengarang dilidungi undang-undang

## KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangsih yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari pusat Dokumentasi dan Informasi Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1982

Proyek Penerbitan Buku Sastra  
Indonesia dan Daerah

## PENGANTAR

Hikayat Indra Bangsawan dalam bahasa Aceh merupakan penulisan kembali dari hikayat Indra Bangsawan dalam bahasa Melayu. Tidak ada yang mengetahui bila dan siapa yang mulamula menyusun hikayat ini dalam bahasa Aceh. Namun Dr. C. Snouck Hurgronje telah menemukannya di penghujung abad ke sembilan belas.

Sangat sukar orang menemukan atau mengetahui nama pengarang dan tahun penulisan dari sebuah hikayat Aceh yang umumnya ditulis dalam huruf Arab. Biasanya sesudah seorang pengarang menulis sebuah hikayat, karyanya itu disalin orang tangan demi tangan sehingga sulit diketahui nama pengarang aslinya. Penyalin biasanya menyesuaikan susunan bahasa dengan seleranya sendiri bahkan tidak jarang merubah nama-nama tokoh dan tempat yang terdapat dalam sebuah hikayat, sehingga akhirnya muncul sebuah hikayat dalam beberapa versi. Demikian pula halnya dengan naskah Hikayat Indra Bangsawan yang kami dapat dari Pusat Dokumentasi dan Informasi Aceh di Banda Aceh bulan September tahun 1981 yang telah kami alih aksarakan ini. Tidak terdapat dalam naskah tulisan tangan ini nama penulis dan tahun penulisannya.

Dapat dipastikan bahwa naskah inipun bukan merupakan naskah asli atau salinan langsung dari naskah aslinya. Susunan bahasa dan beberapa nama dalam hikayat Indra Bangsawan yang disusun oleh Cut Nyak Tihawa Arsyady berlainan dengan susunan bahasa dari naskah ini, dan agaknya berbeda pula dengan naskah yang dibicarakan oleh Dr. C. Snouck Hurgronje dalam bukunya *The Achehnese*, terjemahan A.W.S. O'Sullivan tahun 1906. Dalam naskah ini Indra Bangsawan berasal dari negeri Syahri Kubat, sedangkan dalam buku *The Achehnese* negeri itu bernama Chah-rialah.

Sebagai bahan perbandingan bagi peminat sastra daerah, kiranya naskah ini berguna untuk dijadikan pedoman. Susunan bahasanya baik, namun di sana sini dalam penyuntingannya kami terpaksa mengganti beberapa kata yang kami anggap kurang

tepat dalam susunan kalimatnya ataupun kata-kata yang nampaknya dipilih hanya untuk kepentingan irama dan sajak. Saling mempengaruhi dalam hikayat Aceh agaknya perlu mendapat perhatian dalam pengkajian kesusastraan daerah. Hal ini sering kelihatan dalam hikayat-hikayat Aceh baik susunan bahasa maupun isinya.

Jakarta akhir Desember 1982  
Pengalih aksara

Ramli Harun

## RINGKASAN

### HIKAYAT INDRA BANGSAWAN

Dahulu kala adalah seorang raja di negeri Syahri Kubat bernama Bungsu Indra. Isterinya bernama Kande Laila. Atas nasihat para ahli nujum, pada suatu waktu baginda membagikan sedekah kepada fakir miskin dengan niat supaya baginda dikarunia Tuhan seorang putra. Tak lama kemudian permaisuri hamil dan sepuluh bulan kemudian melahirkan dua orang putra kembar. Yang lebih dahulu lahir dinamakan Banta Syahpari dan adiknya diberi nama Indra Bangsawan. Kedua bersaudara ini ketika lahir masing-masing memegang pedang dan panah sakti.

Pada suatu malam raja Bungsu Indra bermimpi melihat buluh perindu di tangan seorang pemuda. Baginda ingin memiliki buluh itu tetapi pemuda tersebut tidak memberikannya. Banta Syahpari dan Indra Bangsawan yang sudah dewasa, pergi mencari buluh perindu impian ayah mereka. Dalam perjalanan selama tujuh bulan, mereka ditimpah musibah. Badai yang melanda sebuah tempat membuat siang menjadi gelap-gulita dan kedua kakak beradik itu berpisah.

Di suatu tempat Banta Syahpari melihat sebuah istana. Di dalamnya terdapat sebuah gendang suasa. Ketika ia memukul gendang itu dari dalamnya keluar seorang putri. Putri itu menceritakan bahwa seluruh anak negeri Midan Parisi telah dimakan garuda. Ia sendiri dimasukkan oleh ayahnya ke dalam gendang sehingga selamat. Tiba-tiba garuda datang dan Banta Syahpari memanahnya dengan busur sakti sehingga garuda itu mati. Banta dan putri yang bernama Keumala Sari itu tinggal bersama di istana tersebut.

Adapun Indra Bangsawan, di suatu padang yang luas bertemu dengan Nek Raksasa. Nek Raksasa menceritakan bahwa raja jin yang bernama Buraksa meminta kepada raja syah Kumiran untuk menyerahkan putrinya Sairah sebagai mangsanya. Raja berjanji, barang siapa yang dapat membunuh Buraksa putri Sairah akan dikawinkan dengannya. Suatu hari putri Sairah menderita sakit mata. Sembilan orang raja sudah siap mengadu nasib hendak

membunuh Buraksa. Mereka diberi tugas mencari obat mata putri yaitu air susu harimau yang sedang beranak. Yang mendapatkan air susu harimau ialah Indra Bangsawan dengan bantuan Nek Raksasa. Indra Bangsawan ketika itu menyamar sebagai penggembala kambing dengan nama si Gamba Unan.

Buraksa hampir datang. Putri Sairah ditempatkan di dekat hutan disebuah istana yang baru dibangun. Sembilan orang raja sudah bersiap-siap menanti kedatangan Buraksa. Tiada berapa lama kemudian datanglah Buraksa hendak mengambil putri Sairah. Indra Bangsawan sudah siap dengan perangkap dan kuda saktinya. Dalam sekejap mata Buraksa masuk perangkap dan dihela oleh kuda hingga rubuh. Indra Bangsawan segera membunuhnya dan mengambil ketujuh biji mata dan hidung Buraksa sebagai bukti. Dengan menyamar sebagai Si Unan, Indra Bangsawan menyerahkan mata dan hidung Buraksa kepada raja. Dengan demikian Si Unan berhak menjadi suami putri Sairah. Kesembilan raja tidak senang dengan keputusan baginda dengan mengatakan bahwa mereka yang membunuh Buraksa. Dengan pasukan yang besar mereka memerangi raja Syah Kumiran. Melihat perlawanan raja Kumiran mulai rapuh, Indra Bangsawan dengan mengendarai kuda sakti pemberian Nek Raksasa dapat mengusir musuh. Tiga kali perang terjadi. Ketiganya dapat dimenangkan oleh Indra Bangsawan. Raja Kumiran tidak mengetahui bahwa Indra Bangsawan atau si Unan yang telah menyelamatkan kerajannya.

Pada suatu malam dengan suatu tipu muslihat putri Sairah dapat menyingkap rahasia siapa sebenarnya suaminya yang selama ini terkenal dengan nama si Unan. Peristiwa itu diketahui oleh raja dan seluruh rakyat. Pesta perkawinan diadakan dengan meriah. Sesuai dengan janjinya, Nek Raksasa menyerahkan buluh perindu kepada Indra Bangsawan ketika hendak pulang ke negeri Syahri Kubat, tetapi tiba-tiba Indra Bangsawan dan isterinya mendapat suatu penyakit akibat guna-guna dari adik Buraksa.

Banta Syahpari di negeri Midan Parisi melalui mimpiinya, mengetahui bahwa adiknya mendapat penyakit yang sukar diobati. Ia segera berangkat ke negeri Kumiran. Dengan cincin

hikmatnya, Indra Bangsawan dan isterinya diobati sampai sembuh. Sesudah tinggal beberapa lama di negeri Kumiran, berangkatlah Banta Syahpari bersama adiknya Indra Bangsawan dan putri Sairah ke negeri Midan Parisi menjemput putri Keumala Sari. Dari sana mereka meneruskan perjalanan ke negeri Syahri Kubat. Di sana mereka disambut gembira oleh raja Bungsu Indra dan Kandi Laila. Indra Bangsawan menyerahkan buluh perindu impian ayahnya. Dengan mendapat buluh perindu maka baginda menyerahkan kerajaannya kepada kedua putranya, tetapi Banta syahpari dengan rela menyerahkan kerajaan kepada adiknya Indra Bangsawan kerena ia sendiri sudah menjadi raja negeri Midan Parisi. Indra Bangsawan dinobatkan menjadi raja di negeri Syahri Kubat menggantikan ayahnya Bungsu Indra.

**Hikayat  
INDRA BANGSAWAN**

**HIKAYAT  
INDRA BANGSAWAN  
BISMILLAHIRRAHMANIRRAHIM**

Ngon bismillah phon mulaan  
Nama Tuhan zat nyang Esa  
Lon peuphon ngon nama Allah  
Nyang that murah lagi kaya

Sifeuet Tuhan nyang that kadim  
Rahman rahim that mulia  
Alhamdulillah pujoe Tuhan  
Dum sikalian keu Rabbana

Lheueh pujoe Allah rahman  
Ateueh jongjongan seulaweuet lon ba  
Seulaweuet saleuem keu jonjongan  
Sikalian ngon sahbat dumna

Lheueh keu sahbat wareh sajan  
Lheueh nibak nyan keu dum aulia  
Lheueh nibak nyan lon meulakee  
Tuhan nyang mee peutroh pinta

Ya Ilahi wa ya Rabbi  
Keu lon neubri beu sijahtra  
Neubri keu lon he ya Allah  
Lon meungkisah saboh raja

Saboh hikayat lon meungrawi  
Naseukah gob bri lon meurika  
Beu meusampe payah badan  
Wasiet peuneusan keu soe nyang baca

Jeuetkeuh dumnoe haba khuteubah  
Jinoe lon kisah na saboh raja  
AMMA BAKDU meusyeuhurah  
Deungo lon peugah saboh raja

Saboh raja dilee jameun  
Nama geukheun Bungsu Indra  
Lam seujarah na meuteumeung  
Sinan bandum meuho mita

Nama nanggroe Syahri Kubat  
Sapeue that ngon nama donya  
Nanggroe luah sangat maju  
Pineung ngon u na geupula

Masa keurajeuen Indra Bungsu  
That meusyeuhu jeueb-jeueb raja  
Hukom ade amat sangat  
Neuraca neumat han meuriba

Tunong baroh timu barat  
Jeueb-jeueb teumpat hana kubra  
Han tom rakyat jimeupake  
Karong wali han tom dawa

Sabab raja sangat ade  
Jeueb sagoe be dum jipuja  
Oh troh bak thon jime wase  
Pineung paue sajan jiba

Cina ngon Kleng sikalian  
Jipujian Bungsu Indra  
Jeueb-jeueb nanggroe taklok keu nan  
Me waselan dum keu raja

Raja teutap lam meuligoe  
Deungon putroe meusuka-suka  
Deungon judo putroe meugleueng  
Nama geukheun Kande Laila

Seunang hate hana peue kheun  
Cut buleuen ngon raja muda  
Meuseusuka hana leueueng  
Han tom kureueng lam biasa

Salah bacut aneukneuh tan  
That syugolan poteu raja  
Bukon sayang bak si jaloh  
Kayee tan boh siumu donya

Ok ka puteh gigoe ka teulhoh  
Raja meungsaboh aneuk goh lom na  
Gundah hate uroe malam  
Bak Tuhan neumohon pinta

Ya Ilahi wa ya Rabbi  
Keu lon neubri hajat pinta  
Neubri teutap lam ibadat  
Hai hadarat Rabbussama

Neubri iman lon beu kuat  
Donya akhirat beu sijahtera  
Hai Tuhanpo lon Tuhan  
Apon badan keu aneukda

Oh mate lon soe keurajeuen  
Teuboh mideuen deungon kuta  
Dalam nanggroe jiduek uteuen  
Rakyat ban dum han soe aja

Bandum rakyat han soe teugah  
Buet nyang salah jikeurija  
Hai Tuhanpo neupeumudah  
Gata Allah nyang that kaya

Lon lam donya udep siat  
U akhirat ma lon gisa  
Aneuk lon tan meungsurat  
Hadarat ban hukom gata

Oh mate lon soe geulantoe  
Tan meungsidroe bijeh mata  
Meunan pike raja nanggroe  
Malam uroe hana reuda

Oh neuingat nyan keu mate  
Seureuta ile ngon ie mata  
Sabab aneuk goh lom lahe  
Nyan keu mate han padet na

Barangkajan geutanyoe mate  
Oh troh janji ajai teuka  
Kalam Tuhan lam tapeuse  
Dali mate cit dilee ka

Kullu nafsin zaikatul mauti  
Wahe akhi bek syok sangka  
Tiep-tiep meunyawong bandum mate  
Peurintah Rabbi zat nyang Esa

Asoe langet asoe bumoe  
Dum sinaroe mate fana  
Meulaenkan Tuhan Rabbun ibad  
Nyang keukai zat rok-rok masa

Laen bandum wahe intan  
Fana sikalian alam donya  
Ingat-ingat yoh goh mate  
Yoh goh tacre dalam donya

Meungka mate han le sakon  
Sikupang han le hareuga  
Tameuseutia dalam donya nyoe  
Ngon pangkai woe tan tamita

Tuhanku Rabbul alamin  
Malek yaumiddin raja nyang raya  
Nyankeuh raja donya ngon page  
Hukom ade han tilek muka

Tan neutilek sigala be  
Walee meuseuki raja ngon bala  
Uroe akhirat bandum sabé  
Hukom ade ateueh neuraca

Beudoh jinoe bek taeh le  
Suroh Rabbi Takeurija  
Pubuet ngon anggota taingat ngon ate  
Ngon utak tapike bek talupa

Bek awai buet dudoe pike  
Teulah akhe han meuguna  
Teiduek oh noe dilee siat  
Nyoe lon sambat laen haba

Bukon sayang jeumpa mirah  
Habeh reubah angen timpa  
Indra Bungsu dalam susah  
Nujum neukrah ngon peutua

Banda duson dum jilangkah  
Dara ceudah agam muda  
Jitren rakyat subhanallah  
Han peue peugah hai syeedara

Kali nujum sikalian  
Uleebalang raja-raja  
Oh troh keunan bak sulton  
Bet meulayang jaroe dua

Ampon tuanku syahi alam  
Peue susahan po meukuta  
Siri gampong ka meusugang  
Toh siri blang tan meusara

Siri nanggroe neukeumeung prang  
Siri bintang neumeuhawa  
Tuanku peugah jinoe rijang  
Toh pahlawan nyang kreueh jungka

Bandum kamoe habeh datang  
Beude meuriam ka seudia  
Peurise tumbak leumbeng peudeueng  
Toh siri prang lom meungaza

Raja seuot hana sapat  
Laot darat seunang saja  
Tunong baroh timu barat  
Hana sapat na meudawa

Nyang na bacut ulon susah  
Aneuk lidah that lon hawa  
Lon oh tuha umu sampie  
Soe geulantoe mat neuraca

Pakri pike wahe teelan  
Lon tuan beu sampie pinta  
Ulon teuh nyoe that susahan  
Uroe malam hana reuda

Jawueb nujum yoh masa nyan  
Ampon laman po meukuta  
Bek susah le hai jonjongan  
Bak Tuhan talakee doa

Kamoe lakee ubak Rabbi  
Hai duli bek susah raya  
Jinoe tuanku neukhanduri  
Seudeukah neubri keu faki dum na

Keu ulama dalam nanggroe  
Sinaroe seudeukah rata  
Aneuk yatim inong balee  
Meuribee seudeukah raja

Neuyue lakee ubak Tuhan  
Aneuk agam beu ek nyata  
Meunan sabé geunap uroe  
Tuhan sidroe peutroh pinta

Han padum treb teuma dudoe  
Hame putroe judo raja  
Putroe Kande nyang analan  
Tujoh buleuen hame nyang ka

Mangat ate putroe intan  
Ngon sulton raja muda  
Meugah ubak kali meuntroe  
Ka meusampoe ban hajat raja

Rajapih that gaseh leubeh  
Han tom neuweh sinan lingka  
Ureueng gampong han peue peugah  
Peh keukarah ngon halua

Nyang tet tumpoe wot meuseukat  
Bu leukat ladom tet bada  
Ladom doi-doi ladom wajeb  
Ladom nyang treb dang meumita

Ureueng kaya rijang hase  
Ka jime le dalam kuta  
Jak seumanoe putroe Kande  
Nyang isteuri Bungsu Indra

Nyang teungoh woe nyang teungoh jak  
Ban laku hak maseng kada  
Ureueng inong leupah galak  
Bak geujak meugisa-gisa

Teubiet jurong troh u jalan  
Meulinggang-linggang aleh meugisa  
Di ureueng tuha tingkue cuco  
Geugubo tingkue ngon ija

Saboh geuttingkue saboh geupeujak  
Sayang mak syik ka tuha  
Timu barat tunong baroh  
Me peunajoh keu putroe muda

Habeh bandum ureueng nanggroe  
Peurumoh putroe ngon peutua  
Jak lam kuta dum sinaroe  
Bak cut putroe judo raja

Peunoh sarat kuta mideuen  
Hana peue kheun he sycedara  
Jak lam kuta that sukaan  
Dara agam galak raya

Teuduek oh noe dilee siat  
Ujong ayat lon meung tuka  
**AMMA BAKDU** wahe rakan  
Kon le ragam lagee nyoe le

Lon peugah keu putroe intan  
Kande Laila panyot kande  
Sampe buleuen saket teuka  
Budak nyata dua sare

Geunap hame putroe muda  
Aneuk nyata dua lahe  
Teungoh beukah matauroe  
Ban dua droe sigo lahe

Kheundak Tuhan poteu sidroe  
Ban hajat droe cit neubri le  
Aneuk agam ban dua droe  
That samlakoe sabesabe

Siploh buleuen hame putroe  
Dua droe Tuhan peulahe  
Pihak utoh Ilahon hak  
Ban nyang kheundak neupeuhase

Nyang tuha busu lam jaroe  
Sajan ngon droe bungong pade  
Nyang adoe peudeueng lam reugam  
Kaya Tuhan Rabbon kade

Ate galak di sulotan  
Kande Lelan that beureuhi  
Yue tet beude ngon meuriam  
Tanda sulotan aneuk lahe

Dalam nanggroe bandum karu  
Jak eu teungku bungong pade  
Rupa jroh that ban dua droe  
Cut samlakoe sabe-sabe

Han padum treb teuma dudoe  
Rayek keudroe panyot kande  
Ho siuroe rayek leugat  
Miseue kilat ujeuen sabe

Jijak saho jieh sapat  
Meugaseh that cut boh ate  
Busu ngon peudeueng nyang sakeuti  
Dalam jari cit hana cre

Peudeueng busu rayek leugat  
Deungon deelat sabé-sabe  
Rayek banta rayek busu  
Peudeueng teungku meunan sare

Kande Laila ate seuu  
Ngon tuanku seunang kon le  
Neungieng aneuk bungong uroe  
Ban dua droe that beureuhi

Neuboh nama le ayah droe  
Ban dua droe panyot kande  
Nyang tuha neukheun Syahpari  
Bungong giri jroh han sabe

Mangat ate Laila Kande  
Raja duli that meusampe  
Nyang tulot Indra Bangsawan  
That siwazan oh tapike

Tuto mameh dum meunisan  
Deungon rakan han tom pake  
Hingga teuma bak siuroe  
Raja nanggroe leumah pike

Ie eumbon turon dalam awan  
Beu sajan piala hase  
Umu tujoh thon bungong peukan  
Peungajaran neuyue bri le

Neuhei guree sidroe syiah  
Nyang that meugah hana sakri  
Nama geukheun teungku Supian  
Bungong karang cit neujok le

Peugot beureuteh ngon bu leukat  
Neuyue intat bungong pade  
Seumpeuna deungon beureukat  
Aneuk deelat jak mengaji

Laen nibak nyan ngon seudeukah  
Teungku syiah mangat ate  
Lakee idin deungon meuah  
Banta indah deungon umi

Wahe malon ma teungku droe  
Dua kamoe idin neubri  
Lontuan jak bak uroe nyoe  
Aja kamoe jak meungaji

Insya Allah he aneuk droe  
Beu meusampoe hajat Tuhan bri  
Beu troh hajat aneuk lon nyoe  
Ban dua droe beu meusampe

Lheueh idin deungon bunda  
Teungku gisa neubawa le  
Troph bak teungku dua banta  
Ate suka hana sakri

Teungku peubeuet laju sigra  
Ban dua sangat trang ate  
Padum na treb sajan teungku  
Bungong meulu neumeungaji

Ate got trang ban panyot hu  
Di teungku gaseh han sakri  
Bandum kitab habeh neupham  
Banta ajam sangat ahli

Ban dua droe saban-saban  
Gaseh Tuhan that trang ate  
Matanpih jroh makna cakap  
Hana silap bungong giri

Padum na treb sinan teutap  
Cut ubat dua sirungkhe  
Usui mantek habeh neupham  
Cut bangsawan cit ka jeuet le

Habeh jawoe neubeuet nahu  
Di teungku neugaseh sabe  
Dum na kitab nibak teungku  
Bungong meulu bisa jadi

Di teungku ateneuh galak  
Banta bijak that trang ate  
Lom teungku bri ileumee falak  
Leubeh rancak hana sabe

Hingga meugah bak sultan  
Bungong karang sangat ahli  
Syahpari deungon Bangsawan  
Beuet Kuruan sangat kari

Beungoh seupot hana laloe  
Ban dua droe bak meungaji  
Doa raja deungon putroe  
Neuleueng jaroe keu boh ate

Sabab yakin ate sunggoh  
Neupeutroh le Rabbon kade  
Yoh nyan raja neumeulangkah  
Deungon zaujah dua sare

Raja neujak deungon putroe  
Bak aneuk droe tangke ate  
Saweue aneuk bungong keumang  
Ngon hidangan cit ka hase

Ija bajee dum sikalian  
Peukayan keu cut boh ate  
Lom seudeukah pih na neume  
Jok keu guree bungong pade

Meunankeuh buet raja nanggroe  
Hana tuwo sabe-sabe  
Teutap banta sajan teungku  
Dum ileumu habeh neubri

Sangat rancak bungong meulu  
Dum ileumu habeh jadi  
Ileumee silat tak ngon parang  
Bungong mancang cit ka jeuet le

Bandua droe adoe aduen  
Po cut buleuen that juhari  
Meujan-jan neuwoe bak bunda  
Bak peunditapih na sabe

Watee beungoh jak beulaja  
Pasang guda bandua le  
Watee seupot woe lam kuta  
Bungsu Indra mangat ate

Meunan sabe barangkajan  
Bangawan deungon Syahpari  
Hingga teuma grak bak Tuhan  
Sulotan leumah bak pike

Bak simalam raja nanggroe  
Bak judo droe neutanyong le  
Wahe judo bungong uroe  
Pike jinoe cut boh ate

Aneuk dua ureueng lakoe  
Hai putroe pakriban pike  
Toh nyang patot boh keu raja  
Aneuk dua sabe-sabe

Tuah sabe alem sa-sa  
Bek jeuet dawa jimupake  
Hikeumat le bungong karang  
hai cut bintang cuba pike

Asai bek jeuet peudawaan  
Bungong karang tangke ate  
Cuba peugah laju beu trang  
Lam dua nyan toh meusampe

Nyang bek dawa hai cut intan  
Oh komdian beu jeuroh sabe  
Seuot putroe teuma laju  
Hai tuanku bungong pade

Meubek pake bungong meulu  
Ri nyang nafsu bisa jadi  
Tapi beuget timang rasa  
Hai meukuta tanglong nanggri

Sabab tuah ngon bagia  
Bandua han saho undi  
Meunan neukheun uleh putroe  
Raja nanggroe teuma pike

Bahkeuh lon iem dilee saba  
Keu cut banta jeuet di akhe  
Nyang jinoe bah lagee nyang ka  
Droe lon raja cut boh ate

Nyankeuh aneuk bijeh mata  
Ri kada nibak Rabbi  
Soe nyang neugrak uleh Tuhan  
Oh komdian teuma meuri

Soe nyang patot keurajaan  
Meung lon tuan han troh pike  
Hingga teuma haba nyang toe  
Raja nanggroe han susah le

Teutap neuduek lam meuligoe  
Deungon putroe panyot kande  
Jingadap uleh deundayang  
Ngon peurasan han ek pike

Biula deungon napiri  
Suleng bangsi su han sabé  
Nyang ladom beudoh meunari  
Bak bibi panton jisyae

Jikeuting gleueng ayak subang  
Jipoh linggang hana sakri  
Bak babah panton jideundang  
Sulotan ate beureuhi

Syae panton jimeunyanyoe  
Mubagoe lagee jirawi  
Meunan sabé malam uroe  
Raja nanggroe han duka le

Teuduek oh nan raja dudoe  
Bah lon gantoe ujung banja  
Di rambat geuputa taloe  
Di ramoe geugumpie sutra

**AMMA BAKDU** teuma dudoe  
Kon le adoe lagee nyang ka  
Bak simalam raja nanggroe  
Leumah lumpoe meunoe rupa

Raja neueh lam meuligoe  
Neulumpoe saboh rahsia  
Na nyum teuka ureueng sidroe  
Mumat jaroe deungon raja

Ureueng teuka sang nyum bagoe  
That samlakoe elok rupa  
Bak jaroe buloh peurindu  
Neulakee eu uleh raja

Tabri siat wahe teungku  
Lon keumeung eu pakri rupa  
Raja lakee neukeumeung eu  
Jawueb laju han jikira

Han jitem bri neukeumeung eu  
Ate ragu poteu raja  
Rupa na sang bintang timu  
Lom deungon su leupah gura

Poteu raja sang ka seudee  
Oh neulakee han jitem ba  
Lom raja kheun meunoe lagee  
Padum ribee tahareuga

Ka han tabri bah le lon bloe  
Taba keunoe buloh gata  
Sabab lon eu jroh han bagoe  
Rindu kamoe dalam dada

Hana sapeue na jiseuot  
Teuma neudhot uleh raja  
Yoh nyan raja ka teukeujot  
Bungong santot lalu jaga

Oh ban jaga po sëmlakoe  
Neiduek neumoe ro ie mata  
Susah ate hana bagoe  
Nyang neulumpoe han meuho ka

Ureueng han le buloh ka tan  
Sulotan beungehneuh raya  
Tujoh uroe tujoh malam  
Raja diam hana haba

Daok neumoe bungong karang  
Bukon sayang Bungsu Indra  
Ulua hana tom neutren  
U balerong tan neuteuka

Raja tahe teuduek keu droe  
Malam uroe ro ie mata  
Oh teuingat nyan keu lumpoe  
Raja nanggroe nyum ka gila

Dendayang dum lam meuligoe  
Susah keu droe jieu rupa  
Teutap raja ingat lumpoe  
Keu samlakoe lon peugisa

Syahpari deunungan Bangsawan  
Neue sulotan tan u lua  
Tujoh uroe neue ka tan  
Bungong karang susah teuka

Banta dua neuhei meuntroe  
Neutanyong proe keu ayahanda  
Tujoh uroe ka lon eu tan  
Peue susahan hai bentara

Meunan narit cut bangsawan  
Uleebalang jawueub sigra  
Hai raja cut bungong uroe  
Hana kamoe tupeue haba

Keu hai salah dalam nanggroe  
Bak kamoe hana troh haba  
Meunyo meunan uleebalang  
Beudoh rijang tapareksa

Bahle tajak dum geutanyoe  
Wadi meuntroe ngon bentara  
Cut Bangsawan kheun bak aduen  
Bek le neuiem hai kakanda

Keumah pakat sikalian  
Cüt bangsawan woe lam kuta  
Ka troh neuwoe bungong giri  
Syahpari deungon adekda

Neupeurab le ubak abi  
Bak gaki neusujud sigra  
Nibak teuot laju neucom  
Adoe aduen that bagia

Neupeumeuah hai du payong  
Neupeuampon dum na deesya  
Ka payah neuukon-ukon  
Neupeuampon deesya hamba

Wadi meuntroe uleebalang  
Sikalian ampon deesya  
Meunan neukheun cut bangsawan  
Sulotan neujawueub lanja

Wahe aneuk bungong karang  
Tan salahan bijeh mata  
Wadi meuntroe uleebalang  
Sikalian hana deesya

Wahe aneuk bungong peukan  
Lon susahan buet rahsia  
Deungo bandum wahe rakan  
Lon peugah ban hai aneukda

Teukeudi po sidroe Tuhan  
Lon tuan leumah rahsia  
Bak simalam lon meulumpoe  
Teuka sidroe ureueng muda

Ngon rupa jroh hana bagoe  
That samlakoe hana ngon sa  
Bak jaroe buloh peurindu  
Lon lakee eu han jitem ba

Teuma jiyub pantah laju  
Kamoe rindu ate suka  
Suarajih le that lagu  
Mangat that su hana tara

Han jitem bri lon lakee eu  
Jiyub laju macam rupa  
Su buloh nyan le that pangkat  
Sang lazat kamoe ayahanda

Dalam ate lon galak that  
Tapi siat han jitem ba  
Lon lakee bloepih han jibri  
Beungeh kami lam rahsia

Nyankeuh aneuk ulon mimpi  
Saleh pakri bijeh mata  
Adat meungna dalam nanggroe  
Barangkasoe ate gila

Barangkadum di lon kubloe  
Beu that nanggroe keu jih raja  
Dum nan galak ate kamoe  
Pakri jinoe toh bicara

Jinoe pakri he aneuk droe  
Ate kamoe sang ka gila  
Soe ek mita buloh peurindu  
Nyang lagee su lam rahsia

Lon bri nanggroe deungan mideuen  
Jikeurajeuen bah jih raja  
Bah meuseuki namiet ureueng  
Kubri mideuen deungan kuta

Meunyo cit na lagee lon kheun  
Hai buleuen han le lon raja  
Han le nanggroe lon keurajeuen  
Bungong karepueng soe nyang peuna

Meunyo na buloh peurindu  
Nyang lagee su lam rahsia  
Nanggroe kubri keu jih siblah  
Kubri beu sah bahjih raja

Meunan narit raja peugah  
Banta indah sret ie mata  
Bangsawan deungon Syahpari  
Com di gaki po meukuta

Bek le susah hai tuanku  
Buloh peurindu kamoe mita  
Bah le kamoe jak sileuah  
Bek le susah hai ayahanda

Do'a beu le du keu kamoe  
Uroe nyoe jadeh lon bungka  
Bek neusayang dalam ate  
Bek neupike kamoe dua

Meuna tuah dalam tuboh  
Tuhan peutroh ban lon pinta  
Do'a beu le hai tuanku  
Deungon ibu keu aneukda

Bah le meujak dua kamoe  
Seutet lumpoe ayahanda  
Meuna tuah deungon bagi  
Trok keumbali dalam kuta

Jinoe laju lon beurangkat  
Hai deelat do'a neupinta  
Buloh peurindu meuhan dapat  
Bah le troh hat hilang nyawa

U nanggroe hareuem lon riwang  
Meunyo tan lumpoe ayahanda  
Buloh peurindu nyang neulumpoe  
Bah le kamoe nyang usaha

Meunyo hana ulon teumeung  
Beuhareuem han le lon gisa  
Bah le mate lon lam uteuen  
Bah jimakeuen le raksasa

Neupeulara dum na payah  
Tuah meunalah keu ayahanda  
Meung lon takot that keu payah  
Sia meugah kamoe dua

Uroe nyoe jadeh lon langkah  
Lumpoe ayah lon jak mita  
Meuna do'a bunda ayah  
Cit leupah kamoe bak mara

Meunan narit banta indah  
Neukek pantah lam astana  
Cut bangsawan ek u leupu  
Seumbah ibu deungon bapa

Izin keu lon hai ma teungku  
Han le neueu kamoe dua  
Bukon sayang bungong sukcon  
Sitahon bungong han mala

Kamoe dua peuleueh apon  
E ma payong ubak gata  
Buleuen di langet han le peungeuh  
Ka gadoh jitob le migas

Lon eu banda nyoe seuneulheueh  
Neupeulheueh bandum na deesya  
Bukon sayang putik sukcon  
Didalam on hana nyata

Neupeumeuh hai ma payong  
Neupeuampon dum na deesya  
Ka payah neuukon-ukon  
Jinoe ulon cre ngon bunda

Bak uroe nyoe jadéh lon tren  
Hai ma payong meuah deesya  
Sret ie mata lagee ujeuen  
Teuma neukheun meunoe haba

Meunyo tajak bungong karang  
Kamoe sajan seutot gata  
Gunong manyang kareueng tajam  
Hai intan pakri tabungka

Gunong buket deungan paloh  
Hai aneuk beh pakri daya  
Rimueng badeuke juah han ban  
Pakri jalan e aneukda

Gajah singa dalam uteuen  
Beuruang ngon seurigala  
Gata mate ban dua droe  
Hana kamoe kalon rupa

Kareueng tajam bangon duroe  
Hai samlakoe bek tabungka  
Ret meusaket bak beurjalan  
Bungong karang payah raya

Bek tabungka bungong pade  
Boh ate po bijeh mata  
Meunyo tajak hai boh ate  
Teuntee mate dalam rimba

Cut Bangsawan seuot pantah  
Ma meutuah bek that rugha  
Do'a bunda deungan ayah  
Beu leupah kamoe bandua

Ubak Tuhan neumeulakee  
Beu jeuoh sitree beu jarak baya  
Neukanduri jeueb-jeueb watee  
Neulakee jeueb-jeueb aulia

Nyang lon bungka ma bek neutham  
Lon tuan ka leupah haba  
Adat mate pih lon paban  
Kheundak Tuhan atueuh hamba

Cut Bangsawan han neupateh  
Meunoe meudeh neumeudawa  
Lela Kande ate peudeh  
Sayang gaseh keu aneukda

Tuan putroe neumoe bae  
Dara baro deungon raja  
Wahe aneuk bungong keundo  
Han le lon eu bijeh mata

Putroe neumoe that meusye-sye  
Allah po e sayang raya  
Teuma seuot raja nanggroe  
Bek le tamoe hai adekda

Banta dua gaseh Tuhan  
Dudoe intan troh jigisa  
Nyang jibungka han jeuet tatham  
Cut intan ka leupah haba

Narit leupah ka teulanjo  
Wahe judo bek le rugha  
Meung na tuah deungon bagi  
Cit Tuhan bri mubagia

Aneuk dua jok bak Allah  
Ban peurintah Tuhan Esa  
Meunan narit raja duli  
Cut putroe ti leubeh rugha

Cut Bangsawan ngon Syahpari  
Seumbah umi deungon bapa  
Seumbah ayah deungon ibu  
Neutron laju le bandua

Yoh nyan putroe lom neubae  
Deundayang le habeh subra  
Putroe neumoe meusok-meusok  
Teuploh ngon ok tumbok dada

Bukon sayang lon eu kaso  
Sarong ijo ija sutra  
Han le lon eu bungong keundo  
Hai aneuk e gata dua

Bukon sayang tika panyang  
Hana timang bak geulaya  
Wahe aneuk bungong keumang  
Boh ate nang dua-dua

Putroe bae kon bubarang  
Meugeulumbang ngon ie mata  
Leuek bangguna dicong panjoe  
Teungoh cot uroe jiboh kua

Tinggai kuta lam meuligoe  
Samlakoe leupah lam rimba  
Neupeulara wahe Tuhan  
Bangsawan deungon kakanda

Bukon sayang cicem nuri  
Jinari didalam cintra  
Gata tajak bungong giri  
Tinggai umi ngon ayahanda

Bukon sayang aneuk puyoh  
Lam keurukoh dua-dua  
Gata han le puteh lusoh  
Saleh ho roh kamoe dua

Meunan neukheun tuan putroe  
Sira neumoe ngon ie mata  
Neumoe sabe geunap uroe  
Neupoh-poh droe hana reuda

Bukon sayang lon eu kaso  
Han le linto malam jula  
Sebkeuh oh noe putroe bae  
Laen lom le panyang raya

Bukon sayang bungong jeumpa  
Sibanja ngon bungong meulu  
Hai kaum bek neuseurapa  
Calitra lon balek buhu

Samalanga keude Jeunieb  
Sampoe niet ngon Panton Labu  
AMMA BAKDU nyoe nyang leukiet  
Meusyeiet dalam sipatu

Lhok Seumawe le aneuk miet  
Jimarit basa meulayu  
Aneuk dara seudang-seudang  
Bajee kutang tincu-tincu

Sira jijak jimeuwayang  
Han soe larang ka'a-ka'u  
Han jitakot le keu Tuhan  
Sok peukayan deuh boh labu

Jak lam pasai ulee teuhah  
Bibi mirah lhab ngon gincu  
Oh takalon teuhah babah  
Allah-Allah ya Tuhanku

Teuduek oh noe saboh ulah  
Nyoe lon peugah bungong meulu  
Nab u timu neupeuteupat  
Bungong kasab nyang meubau

Neuarong gle neubloh rimba  
Sayang raya soe nyang na eu  
Bandua aduen ngon adoe  
Bungong geutoe neujak laju

Uroe malam tan neupioh  
Habeh neubloh lam bururu  
Makanan han peue neupajoh  
Alah hai beh pakri laku

Sititek ie tan neurasa  
Bandua ngon aduen teungku  
Neujak sabé hana reuda  
Tan neukira ie deungon bu

Ka neukek cot neubloh paya  
Hana lia meung sigeutu  
Rimueng cagee singa gajah  
Gunong bicah bak plueng karu

Oh jikalon atueuh banta  
Bak jikira ureueng buru  
Syahpari deungon Bangsawan  
Ubak Tuhan neumeungadu

Ya Tuhanku po di kamoe  
Ulon teunyoe ban nyang nafsu  
Neubri udep neubri mate  
Ban nyang mungkin dari Tuhanku

Ya Ghafurun Ilahulhak  
Leupah jarak kamoe lalu  
Kamoe dua teungoh meujak  
Ban nyang kheundak bri Tuhanku

Ngon ie mata ile jojah  
Sayang leupah soe nyang na eu  
Neuteukui deungon neutangah  
Neukheun Allah ya Tuhanku

Makanan tan tom neupajoh  
Nyang na aoh badan laju  
Ka neukek cot neutron paloh  
Bungong ipoh nyang meusyeuhu

Banta dua sang ka mate  
Oh teupike moe meu'a'u  
Troph meubuleuen neujak sabé  
Didalam gle rimba a'u

Buleuen peungeuh cahya reudu  
Jisibu le reudok timu  
Watee teungeut bungong keumbee  
Diyub kayee neueh laju

Tuhan sidroe nyang peulara  
Asoe rimba han jiburu  
Cit ka meunan Tuhan kada  
Neupeulara le Tuhanku

Hingga troh bak saboh gunong  
Cut bungong neupeurab laju  
Tahe gante teujak teudong  
Teuceungong bak neungieng laku

Gunong manyang hana macam  
Kareueng tajam Allah hai ku  
Bek antara tajak keunan  
Tapandang ateteuh ngilu

Kareueng tajam leusoh-leusoh  
Keunong tuboh han jeuet taeu  
Ie mata ro dum neusampoh  
Bungong iboh hana kuyu

Ateueh gunong neukek pantah  
Bungong mirah dua laju  
Jaroe gaki dum meudarah  
Banta indah hana ngilu

Troph sikhan ret gunong raya  
Bandua meugule laju  
Bak rasa nyum sang ka mate  
Darah ile dum meutabu

Ban dua neubeudoh sare  
Neuek sabe hana kuyu  
Padum uroe banta singkrak  
Trok u pucak gunong batu

Neutren blah deh banta intan.  
Leumah padang saboh neueu  
Leumah padang puteh meuprak  
Banta neujak keunan laju

Luah padang jroh meuhalak  
Syahpari jak dua teuntu  
Na peuet uroe lam padang nyan  
Cut budiman jak neuburu

Teukeudi po Tuhan Esa  
Saboh bala bri Tuhanku  
Teuka reudok ngon seupot clam  
Angen tajam that meudru-dru

Cut banta di teungoh padang  
Angen tajam alah hai ku  
Lam padang nyan ka jeuet sagob  
Deungon seupot tan deuh taeu

Lom ngon guroh reudok kilat  
Seupot pih that wahe teungku  
Banta dua sang teumakot  
Sabab seupot han deuh neueu

Neujak laju bungong uroe  
Han le meuho barat timu  
Ban dua aduen ngon adoe  
Po samlakoe neujak laju

Grak teukeudi nibak Tuhan  
Yoh nyan hilang bungong meulu  
Syahpari deungon Bangsawan  
Dalam padang han deuh neueu

Nyang aduen neumeuhei adoe  
Sira neumoe neumeuhei laju  
Rab hana toe le bandua  
Cit suara nyang na meusu

Di adoe neumeuhei abang  
Lam seupot klam seuot laju  
Ho treb bacut maken jeuoh  
Nyang na rior tadeungo su

Bandua droe hana le rab  
Saboh sapat banta meusu  
Angen tajam guroh kilat  
Su jarak that maken laju

Adoe aduen hana le rab  
Banta deelat moe meu'u'u  
Syahpari hana le mupat  
Susah that-that bri Tuhanku

Di aduen neumeuhei adoe  
Bandua droe han le meusu  
Hana sapat le bandua  
Tuhan kaya nyang boh laku

Cut Bangsawan yoh nyan neumoe  
Han le bunyoe neudeungo su  
Ya Tuhanku po lon Tuhan  
Sikalian bri Tuhanku

Kamoe dua neubri jarak  
Ban nyang kheundak Rabbul ghafur  
Meunan neukheun bungong meurak  
Meuhayak neumoe meu'u'u

Seupot seupeuet tujoh uroe  
Teuma dudoe bri Tuhanku  
Padang luah that meuhalak  
Puteh meuprak ban dahulu

Han le angen deungon ribot  
Han le seupot ka peungeuh hu  
Padang luah jroh meucahya  
Ban seun lingka tanoh that hu

Syahpari ka tinggai sidroe  
Sabe neumoe bungong meulu  
Seureuta neukheun po samlakoe  
Ho troh kamoe ya Tuhaku

Rahob muka neuleueng jaroe  
Neumohon droe bak Tuhanku  
Hai Tuhanku po lon Tuhan  
Cut Bangsawan ho ka lalu

Keupeue jeuet lon tinggai sidroe  
Ho troh kamoe ya Tuhanku  
Ho ka troh lon sidroe saja  
Adekda hana le lon eu

Ngon ie mata ile jojah  
Bungong mirah moe meu'u'u  
Hai Tuhanku po nyang Esa  
Ho syeedara lon ka lalu

Keupeue guna ulon sidroe  
Ho troh kamoe ya Tuhanku  
Yoh masa nyan po samlakoe  
Inbat keudroe ate tunu

Syahpari ka mandang tahe  
Bungong keundo moe meu'u'u  
Hingga teuma bungong mirah  
Ho nyang langkah seutet laju

Sira neujak bungong giri  
Syahpari neumoe meu'u'u  
Inbat adek cut Bangsawan  
Bungong karang ate tunu

Banda Aceh kuta Raja  
Peukan Cunda rame laju  
Ladom angkot boh keutila  
Teungku raja me boh labu

Nyang meuhai that cit meung saka  
Lom teuma ka deungon breueh bu  
Oh tameung bloe boh keutila  
Toh peng teuma deungon bloe u

Keu Syahpari teutap haba  
Lon peugisa keu tuanku  
Bungsu Indra deungon putroe  
Geunap uroe ate ragu

Seulawet tan banta muda  
Ureueng dua han tom ek bu  
Daok neumoe uroe malam  
Sulotan ngon putroe meulu

Alem Faki dalam nanggroe  
Geunap uroe ate seuu  
Seudeukah deungon kanduri  
Le that neubri le tuanku

Neuyue lakee ubak Rabbi  
Bungong giri panyang umu  
Bala datang beuek tulak  
Deungon kheundak droe Tuhanku

Bupanyang umu po samlakoe  
Beu troh neuwoe ubak po du  
Bandum bala beuek leupah  
Bu meusiblah bintang timu

Meunan sabé bungong ipoh  
Hana teudoh neuhei teungku  
Jeueb meuseujid jeueb meunasah  
Ulama syiah lakee bantu

Bangsawan deungon Syahpari  
Beu Tuhan bri panyang umu  
Bala donya beu ek tulak  
Itahul hak sidroe bantu

Uroe malam hana teudoh  
Meugeureupoh rateb teungku  
Suroh raja nyan sulotan  
Bangsawan beu lanjot umu

Buet meurateb teutap haba  
Meugisa keu bintang timu  
Sang han ek le bak lon rika  
Haba raja Indra Bungsu

AMMA BAKDU teuma lagi  
Maken lawi maken gura  
Lon peugisa banta ugahri  
Keu Syahpari meuriwang haba

Neuarong gle neublooh padang  
Bungong karang sidroe saja  
Padumna treb neusrang beurang  
Trok bak padang saboh data

Padang luah jroh meuhalak  
Syahpari jak pantah lanja  
Dalam padang saboh taman  
That analan indah rupa

Lam padang nyan saboh meuligoe  
Jeueb-jeueb nanggroe han sapat sa  
Nibak binteh meucap ie meuh  
Cahya peungeuh meucuaca

Ladom puteh ladom ijo  
Geusado ngon ie peureuda  
Ceunulek jroh macam-macam  
Kala pisan ngon cempala

Pageue kuta pih meucakap  
Geuturab batee meuraksa  
Lam ruweueng geuboh jeureujak  
Puteh muprak pandang mata

Soe nyang kalon ate galak  
Sang bek jarak meung sideupa  
Dileuen meuligoe jareueng-jareueng  
Timoh naleueng ngon komkoma

Laen pih le macam-macam  
Mawo rihan nilam ata  
Tapi ureueng hana sidroe  
Po samlakoe hireuen raya

Lua dalam banta lihat  
Hana sapat manusia  
Tanaman ladom didalam  
U ngon pisang pineungpih na

Giri bali mamplam siam  
Limo rambutan dum mubanja  
Tapi ureueng hana sidroe  
Boh lam nanggroe boh lam kuta

Rumoh dum soh hana ureueng  
Naleueng dileuen panyang raya  
Phon bunoekon banta neujak  
Tan meurumpok manusia

Leumah pike bungong uroel  
Lam nanggroe nyoe peuekeuh bala  
Lon eu nanggroe sangat makmu  
Teubee ngon u dum geupula

Pakon ureueng tan meung sidroe  
Sinaroe cukop dum rata  
Leumah pike po samlakoe  
U meuligoe neukek lanja

Syahpari ek laju sidroe  
U meuligoe nyang that raya  
Tulak pinto deungon jaroe  
Troh u ramoe neuek banta

Neueu ureueng lam meuligoe  
Meusidroe hana deuh nyata  
Keudeh keunoe banta lihat  
Deuh meulihat geundrang suasa

Neue rupa sangat cakap  
Banta peurab neucok sigra  
Neumat taloe neucok rijang  
Neupeh meucrang uleh banta

Dalam geundrang teuma meusu  
Wahe teungku pane gata  
Sahpari peh teuma laju  
Lom jimeusu nyang that raya

Wahe teungku peh geundrang nyoe  
Tuloe kamoe lam teulinga  
Banta deungo meusu ureueng  
Neusuet peudeueng pantah sigra

Kulet geundrang teutah laju  
Leumah neueu putroe muda  
Nyang bunoe sang-sang teumakot  
Samlakoe cut ate lia

Sabab neungo su meudhot-dhot  
Leungo atot sang jeuet geumpa  
Nyang jinoe ate ka mangat  
Meukeumat ate lam dada

Putroe teubiet dalam geundrang  
Rupa na ban bintang kala  
Rupa jroh that hana bagoe  
Dalam nanggroe han sapat sa

Aneuk jaroé sang geularek  
Gigoe leuntek sang geujangka  
Bibi dua jroh that ranom  
Ulah bangon ie peureuda

Mata dua sang-sang leubui  
Larek takue sang biula  
Seuleungkeue raya peuteungohan  
Hidong panyang oh mumada

Ulee baho bagoe kipah  
Manyang dua blah sang peureuda  
Kiieng cut nyak han that geunteng  
Badan rampeng seudang gura

Badan leunuet jroh ban trieng blang  
Meuglum bintang nibak dada  
Oh jijak aleh meulinggang  
Ulee guyang aneuk muda

Rupa ceudah hana lawan  
Soe nyang pandang ate suka  
Barangkasoe cit beureuhi  
Keumala Sari geurasi nama

Syahpari ka mandang laloe  
Ateueh putroe keunan mata  
Sabab rupa that analan  
Lam geundrang putroe keulua

Banta tanyong ubak putroe  
Hai adoe peue bala teuka  
Nanggroe luah sangat makmu  
Teubee ngon u na geupula

Tapi ureueng meusidroe tan  
Hai intan cuba calitra  
Peue sabab phon aseuliah  
Tapeugah wahe adekda

Pakon sidroe hana ureueng  
Hai buleuen peue asai mula  
Pakon geuboh bungong karang  
U dalam geundrang suasa

Nama ibu beu tapeugah  
Nama ayah tacalitra  
Putroe seuot jikheun meunoe  
Sira jimoe ngon ie mata

Nama lon nyoe Keumala Sari  
Dareuman Asyeuki nama ayahanda  
Nama nanggroe Midan Parisi  
Ka Tuhan bri teuka bala

Ayah kamoe hai teungku beh  
Geureuda pajoh hai meukuta  
Sira jimoe puteh leusoh  
Jiratoh ubak cut banta

Ie mata ro hana teudoh  
Jisampoh ngon punca ija  
Sira jimoe bungong mirah  
Jipeugah ubak cut banta

Han le rakyat pih meung sidroe  
Geureuda pindoe pih bandum seuba  
Ma ngon ayah pih ka sampoe  
Lon nyoe sidroe tinggai saja

Neupasoe u dalam geundrang  
Bek datang inong geureuda  
Deundayang lon na lapan droe.  
Neupasoe lam ceumbui kaca

Putroe peugah sira jimoe  
Ie mata nyoe basah ija  
Sabab jimoe puteh lumat  
Oh teuingat keu ayahanda

Bungong jeumpa keumang dipucok  
Bungong ipok keumang lam paya  
Gadoh malee bungong tajok  
Teuploh ngon ok teusuet ceumara

Teuma seuot le sinyak Syahpari  
Wahe adek ti bek le that rugha  
Seungab adek cut po bintang pari  
Abang kheundak cikeumeung pareksa

Geureuda buti hai adék putroe  
Pakri ban bagoe saleh cit rupa  
Han tom lon deungo pih meung gob peugah  
Wahe cut indah nama geureuda

Lagee rimueng leh lagee cagee  
Atawa lagee sang manusia  
Seuot putroe laju le pantah  
Wahe deelat syah nyan geureuda

Badan raya hana macam  
Seupot awan oh jiteuka  
Gukee tajam nibak rincong  
Babah idong hana ngon sa

Tapi rupa bagoe cicem  
Su oh jikhem manusia  
Didalam gle jimeutumpat  
Oh troh bak hat cit jiteuka

Peue meurumpok didalam nanggroe  
Jiseudoe hana jikira  
Syahpari seuot neutanyong laju  
Hai cut meulu peue ri gata

Bit nyu sulet gata adoe  
Deungon kamoe tameucakra  
Didalam rimba lon ban kuwoe  
Hana lagoe kukalon rupa

Kadang rimueng deungon gajah  
Tabeurakah deungon hamba  
Mangat lon plueng keudeh bagah  
Jeuet tapeugah troh geureuda

Weueh ate lon puteh leusoh  
Oh ban troh keunong seurapa  
Peue nyang ka abeh dum lon pajoh  
Jeuet keutabon lon geureuda

Pakon meunian pirak lipat  
Tan khianat lon keugata  
Dilon keunoe kujak siat  
Peuekeuh sabab jeuet geureuda

Lon jak publoe sambang madu  
Lon cut meulu lapa dahaga  
Grah kon keu ie deuek kon keu bu  
Nyang meunapsu bantai tika

Peuekeuh sabab teuka banci  
Taki kami ureueng teuka  
Meutapeungeut han le ayah  
Dilee sudah buet geureuda

Kadang ho-ho saleh leupah  
Teungku ayah ka neubungka  
Putroe deungo haba meunan  
Sret le meubram ngon ie mata

Sabab neungo kheun Syahpari  
Bungong giri leubeh rugha  
Seureuta ngon jikheun meunan  
Sira jimoe putroe muda

Han neupateh haba lon nyoe  
Tuanku droe troh geureuda  
Lcm Syahpari seuot laju  
Hai cut meulu peue roe gata

Dilon keunoe kujak siat  
Peuekeuh sabab jeuet geureuda  
Rakan lon na jeh pat di gle  
Jak meuawe ngon meudama

Kaman jinoe lon jak riwang  
Cut intan bek beungeh raya  
Meunan neukheun le Syahpari  
Cut putroe ti sret ie mata

Putroe jikheun bak Syahpari  
Wahe duli bek neugisa  
Meunyo neuwoe wahe abang  
Ulon tuan sajan neuba

Neuba kamoe tuanku droe  
Jeuet neupubloe tueng hareuga  
Dayang lapan hai deelat Syah  
Na neukeubah uleh ayahanda

Dalam jeumboi jinoe jeh pat  
Wahe deelat nyan pih neuba  
Neuba kamoe hai tuanku  
Soe taguen bu ngon srah ija

Bunda ayah dilon cit tan  
Neupeusayang hai meukuta  
Cit meunyawong di potallah  
Darah gapah di sroepada

Meunan jikheun bungong mirah  
Nyak Pari Syah seuot lanja  
Kru seumangat wahe adoe  
Bak kamoe atueh jeumala

Seungab pocut bek le tamoe  
Laba rugoe cit di hamba  
Bek le susah wahe adoe  
Jeuet buet kamoe abang gata

Bit ceudah that cicem murong  
Sideh umpung di cong para  
Lon cre nanggroe tinggai gampong  
Panyot tangglong lon jak mita

Lah na awai reubah rambong  
mangat lutong pot boh ara  
Lah na gata putik sukon  
Adat han lon meuraba-raba

Jinoe adek nyang meutuah  
Bek le susah hai adekda  
Nyang geureuda bek tagundah  
Tulong Allah lon useuha

Bukon sayang bungong panjoe  
Angen tampoe sret meukeuba  
Teungoh duek banta ngon putroe  
Han le uroe seupot teuka

Uroe teungoh trang sang ka seupot  
Teukeujot Syahpari muda  
Di putroe pih sangat susah  
Laju ubah ngon ie muka

Syahpari kheun teuma meunoe  
Bit rumoh nyoe meujen raya  
Uroe tarek bunoe that trang  
Nyoe ka malam peue sabab ka

Seuot putroe puteh lumat  
Nyoe alamat troh geureuda  
Bek tuanku han neupateh  
Ka abeh gata nyoe dua

Jak tuanku talob keudeh  
Lam geundrang jeh bek binasa  
Bek le sinoe hai tuanku  
Sampoe umu teuh bandua

Syahpari neuseuot rijang  
Lon nyoe agam bukon dara  
Deungon tulong sidroe Allah  
Deungon apuah ibu bapa

Geureuda nyan tan lon gundah  
Sia meugah aneuk Indra  
Deungon do'a adek Bangsawan  
Ya Tuhan neupeutroh pinta

Meunan neukheun po samlakoe  
Di meuligoe neutren lanja  
Syahpari tren le u bumoe  
Di jaroe busu suasa

Geureuda leugat le jisujud  
Ate po cut hana lia  
Geureuda kheun teuma meunoe  
Raseuki kamoe ka na gata

Tujoh uroe kutren payah  
Kujak eu kah han meuho ka  
Syahpari neuseuot meunoe  
Bak uroe nyoe troh ban awa

Treb ka kupreh tujoh uroe  
Peue sabab roe hana teuka  
Nyoe pat milek nyang kahajat  
Peuhah beu that bideueng dada

Banta peulheueh teuma busu  
Keunong laju nyan geureuda  
Keunong dada beukah lapan  
Banta intan laju gisa

Geureuda sret ateueh bumoe  
Busu bleuet nyoe lom jigisa  
Ubak banta laju jiwoe  
Geureuda pindoe ka binasa

Siblah nanggroe sigo sarat  
Raya that-that inong geureuda  
Keumala Sari mangat ate  
Oh ka mate geureuda raya

Neuek banta u meuligoe  
Beudoh putroe pantah lanja  
Ngon deundayang ban lapan droe  
Samlakoe jipeumulia

Bu lam hidang cit ka hase  
Jiangkat le ukeue banta  
Deungon putroe jiduek sajan  
Deundayang ban siseun lingka

Oh lheueh makeuen muda seudang  
Jibot puan nyang meujintra  
Syahpari ate that galak  
Meurumpok ngon putroe muda

Lam nanggroe siseun teutap  
Banta deelat meusuka-suka  
Teiduek banta di meuligoe  
Hana sidroe ureueng teuka

Han le rakyat yoh saboh roe  
Ka jiseudo le geureuda  
Hareuta le makmu limpah  
Nanggroe luah seungoe raya

Keu Syahpari oh noe kisah  
Sinan dasyah ngon putroe muda  
Sinoe asoe sideh kuah  
Han peue peugah wahe po da

Oh uroe beurijang seupot  
Jimeung meulot aneuk jeumpa  
Matauroe lob meusagob awan  
Cuaca buleuen siblah ret timu

Jinoe lon seubot keu cut Bangsawan  
Seureuta nyan ngon AMMA BAKDU  
Cre ngon aduen didalam padang  
Dalam seupot klam bri Tuhanku

Sabe neumoe bungong karang  
Ingat abang ho ka lalu  
Ingat aduen nyang Syahpari  
Bungong giri ate tunu

Allah hai po pakri untong  
Syeedara ulon ho ka lalu  
Keu peue jeuet lon wahe Tuhan  
Cut abang hana le lon eu

Meunan neukheun sira neumoe  
Cut samlakoe nyang meubae  
Ya Ilahi wa ya Rabbi  
Lon neupeucré hai Tuhanku

Tunong baroh han meuho le  
Aduen kamoe ho ka lalu  
Han lon tuho han lon tupat  
Pat lon sasat ya Tuhanku

Hai ya Allah po lon Tuhan  
Neupeutrohkan hajat napsu  
Buloh peurindu beu ek sampoe  
Nyang lumpoe uleh po du

Sira neukheun neuleueng jaroe  
Neupeugah droe bak Tuhanku  
Deungan do'a ibu bapa  
Beureukat Hawa Adam intu

Lheueh neukheun nyan bungong pade  
Neuarong gle rimba 'a'u  
Sira neujak neumoe sabe  
Ie mata ile han jeuet taeu

Gunong manyang subhanallah  
Banta leupah neukek laju  
Ka neukek cot neutron paloh  
habeh neublooh lam buru-ru

Padumna treb neusrang ibrang  
Leumah padang saboh neueu  
Luah padang jroh meuhalak  
Puteh muprak meucahya hu

Lam padang nyan le tanaman  
Macam-macam dum meujampu  
Diteungoh nyan saboh bale  
Jroh han sakri wahe teungku

Kulam saboh rab bale nyan  
Ie didalam pih meulaku  
Nyan laen jeuneh tanaman  
Bak rihan ngon bungong meulu

Oh takalon ate suka  
Nyang gura jeumpa keubiru  
Laenpih le macam-macam  
Meuribee ban dum meujampu

Balepih jroh hana tara  
Geucat lingka deungon gapu  
Kulampih get sangat cakap  
Geuturab jroh that meulaku

Cut bangsawan keunan ka troh  
Bungong ipoh peurab laju  
Tron lam kulam jak srah gaki  
Bungong giri neukek laju

Banta neungieng keudeh keunoe  
Hana bunyoe neudeungo su  
Dalam ate pocut banta  
Teuntu nyang po na disitu

Dumnan ceudah dum peurmata  
Teuntee raja punya itu  
Meuhan pane dumnan atra  
Meung kon raja nyang meusyeuhu

Kadang cit na sinoe ka troh  
Nama buloh nyang meurindu  
Hingga teuma deuh neulihat  
Seunurat nama teuteuntu

Po bale nyoe nek raksasa  
Meusurat ka sinan laju  
Nek raksasa na disinan  
Dalam taman cit ka teuntu

Meunan neukheun po cut banta  
Nek raksasa deungo laju  
Geuteubiet le yoh masa nyan  
Keudeungaran ureueng meusu

Geutanyong le nek raksasa  
Su meutaga sang geulanteue  
Pane gata that beurani  
Bale kami punya itu

Deungon meudhot su geumeunta  
Ka jeuet geumpa bungong meulu  
Nyang ka han tom kueu rupa  
Manusia keunoe lalu

Peue buet keunoe tajak gata  
Dalam rimba peue tajak eu  
Ka mupaloe jinoe gata  
Ka ceulaka deungon aku

That beurani bit nyo gata  
Han tom nyang ka dulu-dulu  
Banta neuduek ka geuiem droe  
Samlakoe hana teubiet su

Nek raksasa sangat marah  
Bak cut indah tanyong laju  
Pane nanggroe keunoe teuka  
Soe nan bapa deungon ibu

Soe geuheu nan gata sidroe  
Bek mupaloe peugah laju  
Banta seuot neukheun meunoe  
Deungo kamoe peugah laku

Indra Bangsawan nama lon sah  
Nama ayah Indra Bungsu  
Kusyik ulon nama Kubat  
Jarak teumpat lon ka lalu

Kande Laila nama umi  
Kubat Syahri nanggroe teuntu  
Aduen ulon nama Syahpari  
Na neuturi hai nek nanggroe

Nek raksasa seuot meunoe  
Cuco kamoe bungong meulu  
Meunyo takheun cuco Kubat  
Nyokeuh teumpat asai dulu

Syahpari Kubat lon syeedara  
Padang Anta teumpat itu  
Patot ka troh keunoe gata  
Bungong jeumpa ubak nek tu

Meukon gata cut Bangsawan  
Geusimpan dilua laju  
Saboh guda dilua treb that  
Cit meuhat gata po teuntu

Padang Anta geuheu nan  
Hai budiman nanggroe nek tu  
Jangki Harajin saboh guda  
Keu gata lon keubah dulu

Dalam surat na geupeugah  
Cit troh langkah bungong meulu  
Nek raksasa lom neusudi  
Bungong giri peugah laju

Wahe aneuk bungong mirah  
Cuba peugah ubak nek tu  
Peue sabab phon asaliah  
Jeuet talangkah aneuk teungku

Cut Bangsawan lom neuseuot  
Leumah leumbot bak neumeusu  
Nyankeuh jeuet roh ulon langkah  
Lumpoe ayah Indra Bangsawan

Na neulumpoe uleh ayah  
Buloh indah nyang meurindu  
Nyankeuh sabab nek meutuah  
Seutet bagah nyang lumpoe du

Nek raksasa lom neuseuot  
Putik rambot cuco aku  
Deungon tulong sidroe Allah  
Mudah-mudah troh ban napsu

Meunyo gata cuco Kubat  
Tuhan intat ubak aku  
Banta deungo nek riek peugah  
Keu Allah neusyuko laju

Seureuta neukheun alhamdulillah  
Lon harap sah keu nek teungku  
Habeh bandum banta peugah  
Keu Syahpari aduen teungku

Neukheun sisat dalam padang  
Lam seupot klam bri Tuhanku  
Nek raksasa pih ka neuthee  
Bungong keumbee bek le karu

Nek raksasa peugah leugat  
Bungong riwatpih meulaku  
Sideh teutap mideuen Parisi  
Bungong giri cuco aku

Poh geureuda cut Syahpari  
Hai boh ate bek le karu  
Abeh dumpeue po nek peugah  
Bangsawan sah han le tunu

Cut Bangsawan han le susah  
Bungong mirah han le karu  
Nek raksasa lom kheun meunoe  
Tren jak manoe bungong meulu

Dalam kulam nyang juhari  
Jak mandi hai cucoku  
Hingga teuma haba nyang toe  
Cut samlakoe manoe laju

Dalam kulam laju neubloh  
Bungong ipoh nyang beubau  
Ie kulam nyan lezat rasa  
Po cut banta ate seuu

Nek raksasa nyang juhari  
Ceumboi sakti cinta laju  
Lam ceumboi nyan le dendayang  
Rupa na sang bintang timu

Dum peue cukop sikalian  
Ngon peukayan han jeuet taeu  
Deungon beudak cit ka hase  
Ranub bate ie deungon bu

Saboh bate saboh badan  
Geulumbak ngon meunyeuk gahru  
Mat bak jaroe jitren rijang  
Dalam kulam jitren laju

Abeh jitren sikalian  
Jak uet kalang bintang timu  
Jluet kalang jiboh beudak  
Suroh nibak nek nyang teuntu

'Oh lheueh manoe bungong usen  
Neumeusalen teuma laju  
Pinggang ija sok ngon bajee  
Di ulee meuh siploh mutu

Rupa indah hana bagoe  
Samlakoe Bangsawan teungku  
Ek cong bale muda seudang  
Bet idang teuma laju

Idang that jroh hana nyang sa  
Sang syureuga meunan laku  
Nek raksasa neukheun meunoe  
Makeuen beu troe bungong meulu

Di ateueh gle Cot Sikurah  
Kayee reubah dum teudu-du  
Makeuen aneuk peue nyang mudah  
Bungong mirah nibak nek tu

Cut Bangsawan seuot leugat  
Makeuen sapat ngon nek teungku  
Nek raksasa seuot pantah  
Cit ban sudah aneuk teungku

Teuma banta neusrah jaroe  
Makeuen sidroe bungong meulu  
Neumakeuen sibuju jaroe  
Nekmat ka troe bri Tuhanku

'Oh lheueh bu pinah idang  
Angkat puan dayang teuntu  
'Oh lheueh banta makeuen sirih  
Beudoh jak eh teuma laju

Beungoh uroe baro jaga  
Neutren lanja bungong meulu  
Jak bak kulam neusrayah muka  
Bale raksa neukek laju

Ek u bale peugah haba  
Ngon raksasa seun sigeutu  
Cut Bangsawan neukheun meunoe  
Ampon kamoe hai nek teungku

Na peue haba lon meusudi  
Saleh pakri hai tuanku  
Nek raksasa seuot pantah  
Han peue salah bungong meulu

Meunan neukheun nek raksasa  
Cut banta neutanyong laju  
Na lom nanggroe beuladeh nyoe  
Sabab kamoe kurang tau

Meungna nanggroe peue sultan  
Lon tuan kadangpih lalu  
Nek raksasa jaweueb bagah  
Bungong mirah deungo aku

Beuladeh nyan hai cut indah  
Padang luah sangat makmu  
Anta Beuranta nama nyang sah  
Lon peurintah cit hai teungku

Padang Anta nyang teumpat nyoe  
E samlakoe beu tatahu  
Anta Beuranta cit ujung nyoe  
Nyan di kamoe nanggroe nek tu

Ahmad Beuranta cit geuheu nan  
Bungong keumang fam bek karu  
Beuladeh nyan saboh nanggroe  
Bungong úroe that meusyeuhu

Nama nanggroe wahe intan  
Kumiran nama nyang teuntu  
Nama rajapih Kumiran  
Sulotan sangat meulaku

Dum na raja keunan taklok  
Wase jijok keu tuanku  
Laen nibak nyan dua nanggroe  
Sinaroe keunan geusibu

Nanggroe luah rakyatpih le  
Beuhe-beuhe dum sidadu  
Bitpih meugah di sulotan  
Nyang haselan keu gob teuntu

Keu buraksa hase geubri  
Dalam nanggri jiboh laku  
Aneuk kadi aneuk meuntroe  
Sinaroe dum jih peulaku

Bandum raja han ek larang  
Gaduh agam dum sidadu  
Buraksa nyan hana rakyat  
Di jih meuhat sidroe teuntu

Aneuk dara aneuk agam  
Sikalian jih meunasu  
Meuhan geubri barangkasoe  
Dalam nanggroe jijak laju

Hana sidroe nyang jeuet larang  
Inong agam ate kuyu  
Anta beuranta jimeuteumpat  
Ka treb that buraksa itu

Bit nyo ceudah ija kasab  
Jimeukat le that di peukan  
Nek raksasa peugah leugat  
Banta deelat jawueub nyoe ban

Pakri meunan nek hareutoe  
Ureueng nanggroe tan Iseulam  
Geubri aneuk keu buraksa  
Tan ulama soe ajaran

Atawa kafe ureueng nanggroe  
Nek teungku droe neupeugah trang  
Geubri aneuk ban sineuna  
Jahe raya peurbuatan

Po nek seuot laju pantah  
Han ek teugah pakri padan  
Keu buraksa han ek geukheun  
Dumna ureueng gaduh agam

Saboh putroe aneuk raja  
Jroh that rupa hana lawan  
Geukeumeung bri keu buraksa  
Le ayahanda nyang Kumiran

Deungon rupa leubeh canden  
Po cut leunteng that analan  
Hana nyang sa dalam nanggroe  
Tamse uroe ngon buleuen trang

Hana sapat nyang na tiwah  
Soe eu reubah oh teupandang  
Mata dua sang-sang leubui  
Larek takue jroh hana ban

Barangkasoe ate rindu  
Meunyo jieu nyang peurawan  
Boh idong sang putik jambee  
Mieng sang lagee meuboh keutapang

Bulee keuneng buleuen siuroe  
Kilat gigoe sang-sang intan  
Paleuet jaroe ban on buni  
Paleuet gaki ban on macang

Aleh dua lagee seunuet  
Badan leunuet jroh metrieng blang  
Ulee baho bagoe kipah  
Dada ceudah meuglum bintang

Seupo utak nyang ek pike  
Seupo ate nyang han bimbang  
Soe nyang kalon ate bicah  
Nyak Sairah nyang analan

Hai peue roe ka roh meusurat  
Keureutah glue that jijak kalam  
Tan lon saja wahe akhi  
Goh lheueh kupi ka jula malam

Teuma jinoe di putroe nyan  
Tunangan aneuk sulotan  
Aneuk raja sikureueng droe  
Maseng nanggroe uleebalang

Maseng nanggroe maseng raja  
Maseng kuta teumpat makam  
Nyan tunangan putroe muda  
Aneuk raja nyang seumbilan

Sabab dilee janji raja  
Ngon buraksa geuyue muprang  
Soe nyang ek poh nyan buraksa  
Aneuk dara keunan pulang

Beu that aneuk sikeumade  
Keu meulintee geuntueng rijang  
Bah that beule namiet ureueng  
Yue mat mideuen keurajaan

Nek raksasa meunan neukheun  
Cut buleuen neujaweueb nyo nyoe  
Buraksa nyan that bit meugah  
Nek neupeugah bak lon tuan

Nek raksasa seuot pantah  
Bungong mirah deungo beutrang  
Bit hai aneuk kon ban peugah  
Beuhe leupah biek jen uteuen

Badan raya itam ijo  
Ulee baho tujoh bidang  
Mata tujoh idong tujoh  
Nyankeuh musoh e buleuen trang

Badan teumbon pruet meuleupek  
Oh jideumpek sang-sang karam  
Soe nyang kalon kuyut tuboh  
Lam geureugoh plueng teureujang

Nek raksasa lom neusuroh  
Hai aneuk beh gaseh sayang  
Wahe aneuk puteh leusoh  
Mate musoh cit gata cang

Jinoe cuco tulong gata  
Sayang raya keu sulutan  
Tueng keu gata aneuk lidah  
Sairah nyang meuglum bintang

Buraksa nyan cit gata poh  
Hai aneuk jroh nyang laen tan  
Bangsawan kheun teuma meunoe  
Ubak nek droe raksasa nyan

Bandum raja sikureueng droe  
Han ek sampoe bak jilawan  
Nyang kamoe lom padum lipat  
Nyang rakyat meusidroe pih tan

Lom pih kamoe meujak siat  
Kon meuhajat peuwoe bintang  
Hajat buloh nyang peurindu  
Nyang lumpoe du lon carikan

Nyang keu putroe hana nafsu  
Hai nek teungku dilon tuan  
Goh lom hai nek lon meukawen  
Badan leunteng mantong seudang

Nek raksasa lom neupeugah  
Hai cut indah bek dawaan  
Cit ka neugrak uleh Allah  
Gata nyang sah cut Bangsawan

Nibak po nek na keuneubah  
Musoh meugah cit gata cang  
Tapi bacut lon peuingat  
Lon amanat hai buleuen trang

Watee mate tacang musoh  
Puwoe beutroh bak sulton  
Idong tujoh mata tujoh  
Hai aneuk beh cok beurijang

Nyankeuh tanda mate musoh  
Puwoe beutroh keu sulton  
Bek tabri-bri keu gob laen  
Bungong husen nyan tanda trang

Meung hana nyan hai cut indah  
Teuntee payah bak ta meucang  
Putroe muda pih han geubri  
Bah barangri tapeuget prang

Wahe aneuk nyang meutuah  
Gata nyang sah gaseh sayang  
Nyan amanah bek taubah  
Udeh langkah cut bangsawan

Keu hai buloh nyang peurindu  
Na bak nek tu hai buleuen trang  
Meunan haba nek riek peugah  
Banta indah tahe mandang

Pakri lon jak nek teungku droe  
Jarak nangggroe lon jeumeurang  
Po nek seuot bek tagundah  
Cit na ilah bak lon tuan

Lon bri bajee mangat tasok  
Mangat oh troh bek jituban  
Bajee kude nyang sakeuti  
Dalam nanggri saleh waham

Gata manyak muwoe rupa  
Kon ban nyang ka cut bangsawan  
Beudoh aneuk bungong keumbee  
Tasok bajee tabeurjalan

Po nek peusok bajee sakti  
Bungong giri kude badan  
Muwoe rupa miseue budak  
Puree kuyak kulet itam

Gaduh rupa dilee nyang dhiet  
Ie dum leukiet nibak badan  
Beurangpeue buet bungong keumbee  
Banta bri thee bak lon tuan

Cut Bangsawan seuot pantah  
Insya Allah hai nek badan  
Ho ret jinoe lon meulangkah  
Nek meutuah mangat rijang

Seuot po nek bek tagundah  
Sidroe Allah nyang peutrohkan  
Teuma po nek beuet hikeumat  
Deungan hadarat poku Tuhan

Cut Bangsawan gaduh leunyap  
Sikleb-siklab gaduh hilang  
U padang Anta Beuranta ka troh  
Putik leusoh tahe mandang

Ajeb ate po samlakoe  
Laen nanggroe ka neupandang  
Rupa meuwoe miseue budak  
Puree kuyak kude badan

Lheueh nibak nyan bungong uroe  
Neujak sidroe bungong karang  
Banta neujak laju sidroe  
Dalam nanggroe neusrang irang

Meuteumee le ureueng nanggroe  
Nyang asoe rumah sulotan  
Jitanyong le ubak banta  
Hai puree kra ho beurjalan

Cuba peugah ubak kamoe  
Lam nanggroe nyoe na susahan  
Deungon nama beuta peugah  
Lon seuleuah nyang hajatkan

Seuot banta bit nyo meunan  
Si Unan nama lon tuan  
Ubat puree lon jak mita  
On gaca teungoh peurawan

Na gob peugah sinoe dilee  
Peuet peureudee teungku abang  
Namiet raja seuot meunoe  
Han tom kamoe meudeungoran

Meunyo meunan bah le lon ba  
Ubak raja nyang sulotan  
Kadang cit na dalam kuta  
Ubat gata nyang takheun nyan

Mat bak jaroe laju diba  
Ubak raja nyang kumiran  
Raja kalon teuma budak  
Puree kuyak kulet itam

Raja tanyong neupareksa  
Pane kaba aneuk agam  
Deungon puree kude buta  
Kulet rupa sangat itam

Meunan narit po meukuta  
Namiet teuma seuot nyoe ban  
Deelat tuanku kamoe dapat  
Teungoh sisat dalam padang

Patek tanyong laju yoh nyan  
Budak Unan jipeugah trang  
Ubat puree geupeuhaba  
On gaca teungoh peurawan

Raja deungo sang-sang teukhem  
Cit gob laen nyang peurantam  
Teuma marit raja nanggroe  
Bak putroe kajak beurijang

Ubat puree mangat jibri  
Teurusi tabloe di peukan  
Mangat puleh puree gaki  
Soe peuek ie ngon srah cawan

Meungka puleh kude puree  
Yue plah kayee tacok parang  
Banta deungo haba raja  
Ate suka kon bubarang

Ubat puree sang ka nyata  
On kaca ka mupat uram  
Teuma jiba laju pantah  
Bak Sairah putroe bintang

Cok bak jaroe laju bagah  
Putroe indah teurimakan  
Lam meuligoe teutap sinan  
Si Unan namiet sulotan

Ti Sairah jigaseh that  
Sabab jeumot hana macam  
Padum na treb sinan teutap  
Hana siat nyang na reunggang

Hingga teuma bak siuroe  
Marit putroe nyang analan  
Wahe Unan nyang lon gaseh  
Kajak keudeh siat rijang

Kadrob kameng siat dua  
Kapeulara ka peusayang  
Eumpeuen ngon ie cit kajaga  
Kameng dua dara agam

Beungoh seupot beutroh kawoe  
Nyang cot uroe ban sukaan  
Kameng dua kupeumeuhat  
Tulong siat Unan rijang

Unan seuot insya Allah  
Lon seuleaf barangkajan  
Meungka puleh puree gaki  
Mangat kami meujak u blang

Meunyo mantong puree kude  
Jeungkhang-jeungkhe lagee canggang  
Sira jikheun beudoh lanja  
Kameng dua jiba sajan

Beungoh seupot si Unan woe  
Oh cot uroe na meujan-jan  
Oh ban lheueh bu seutek jaroe  
Unan sidroe jak u padang

Geubeue kameng kheun bak putroe  
Di jih buet droe ban sukaan  
Oh beungoh jak oh seupot woe  
U meuligoe bak cut intan

Meunan sabé geunap uroe  
Meunan keuh bagoe Gamba Unan  
Hingga teuma bak siuroe  
Unan sidroe teungoh makan

Marit putroe ti Sairah  
Jipeugah ubak deundayang  
Wahe cut kak pakri bagoe  
Hana sampoe cut Bangsawan

Pakri laku keu lon sidroe  
Ka rab sampoe nyan tanggoh han  
Hom hai po cut saleh pakri  
Banta ahli goh lom datang

Kadang po cut bungong pade  
Teungoh meuase kadang-kadang  
Sabab geujak ngon lasyeuka  
Lom pih rimba kareueng tajam

Cuba tanyong bak si Unan  
Sabab jih nyan kayem di blang  
Kadang-kadang na gob peugah  
Teungoh langkah cut Bangsawan

Deundayang jitanyong laju  
Unan teungku jawueub nyoe ban  
Han tom lon ngo meung gob peugah  
Nyang indah Indra Bangsawan

Supo aneuk supo cuco  
Nak lon tuho pareksakan  
Supo aneuk toh syeedara  
Kadang cit na keunoe datang

Pane nanggroe geu keurajeuen  
Nyang geukheun Indra Bangsawan  
Pakri keunoe awai meuthee  
Soe nyang dilee jak peugah ban

Seuot putroe nyak Sairah  
Bah kupeugah kaman beutrang  
Aneuk raja Indra Bungsu  
Nama ibu Kande Laila

Cuco raja Syahri Kubat  
Nyang tulot that Indra Bangsawan  
Nyang aduen nama Syahpari  
Sigo lahe ngon Bangsawan

Kaya Tuhan Rabbul Izzah  
Na alamat bak laheran  
Nyang tuha busu lam jaroe  
Nyang adoe peudeueng lam reugam

Nyankeuh jeuet troh keunoe meuthee  
sabab dilee na barohan  
Na geupeugah lam calitra  
Poh buraksa cut Bangsawan

Poh geureuda cut Syahpari  
Mideuen Parisi nyang meugahan  
Diwa Rakna Keumala Sari  
Cut putroe keunan pulang

Nurun Asyeuki nama ayah  
Ka sudah geureuda simpan  
Geundrang suasa na geukeubah  
Putroe indah didalam nyan

Laen bandum asoe nanggroe  
Sinaroe geureuda simpan  
Bangsawan ngo cit galak that  
Ka mupat aduen lon tuan

Meunan haba putroe indah  
Jipeugah ka lheueh jituban  
Unan seuot teuma laju  
Bungong meulu bek susahan

Bek le susah cut sambinoe  
Bah le kamoe peunyatakan  
Sabab sayang lon keu putroe  
Buraksa pindoe mangat geucang

Singoh beungoh lon pareksa  
Jeueb-jeueb banda dalam peukan  
Kameng-kameng han le geubeue  
Bah cot iku dalam kambam

Sabab sayang keu cut meulu  
Bah lon jak eu mangat rijang  
Beu abeh duson ngon banda  
Bah lam rimba bah lam hutan

Payah bacut han lon kira  
Sabab gata that lon sayang  
Indra Bangsawan na ka teuka  
Buraksa karab troh datang

Kadang cit na ureueng laen  
Nyang canden nibak Bangsawan  
Buraksa kadang ek reubah  
Keu peuneubah peue balasan

Seuot putroe ti Sairah  
Nanggroe siblah keu jih pulang  
Laen nibak nyan wase kubri  
Peue ka sudi meung na soe cang

Peue roe po cut jeuet lon satoh  
Na ureueng poh kadang-kadang  
Bak lon duek-duek kadang singoh  
Jeuet lon teuoh di-di ladang

Nanggroe siblah kadang han geutem  
Nyan laen peue na balasan  
kadang hajat keupeue laen  
Meukawen ngon bungong karang

Seuot putroe meunanpih jeuet  
Ban meukeusud lon peutrohkan  
Gamba Unan lom peuhaba  
Sikureueng raja ka haselan

Laen ureueng peue keuh neubri  
Ka lheueh janji deungon seumbilan  
Raja sikureueng na meurumpok  
Teungoh geujak asah peudang

Na lon tanyong han geuseuot  
Sugeuh meudhot meugurantang  
Lon jak laju lon peulikot  
That teumakot ulon tuan

Seuot putroe ri galak that  
Kah siurat pih meuwayang  
Kon ban buet droe kajak di kah  
Gob-gob susah ka muwayang

Gamba Unan jitren leugat  
Jak u teumpat nyan lam padang  
Trok u padang keubah bajee  
Muwoe lakoe cut Bangsawan

Rupa ilok that meucahya  
Aneuk raja nyang pilehan  
Kameng lingka dum ret naleueng  
Bungong seupeueng duek teusimpan

Watee neuwoe neusok bajee  
Meuwoe puree kudé badan  
Gamba Unan meuwoe rupa  
Dalam kuta laju riwang

Bukon sayang bungong geutoe  
Keunong uroe sret meukarang  
Teuduek haba si Unan woe  
Keu cut putroe lon peuriwang

**Teukeudi po Tuhan Esa  
Putroe muda bungong karang  
Bak siuroe saket mata  
Aneuk raja nyang Kumiran**

**Saket pih that hana tara  
Tuhan Esa karonyakan  
Hana teudoh malam uroe  
Cit daok moe po cut intan**

**Jimoe bae cula caloe  
Jipoh-poh droe bukon sayang  
Deundayang dum lam meuligoe  
Sinaroe abeh pitam**

**Hingga meugah dalam kuta  
Ubak raja ureueng datang  
Putroe saket jipeuhaba  
Han jeuet mata siat reunggang**

**Neumoe sabe hana reuda  
Cit brat raya keulakuan  
Raja deungo meunan haba  
Bak aneukda le neudatang**

**Oh troh keudeh neueu rupa  
Poteu raja sangat sayang  
Neuheu tabib dalam nanggroe  
Ubat putroe yue bawakan**

**Tabib jitron jeueb-jeueb teumpat  
Timu barat abeh datang  
Hingga teuma haba nyang rab  
Geuboh ubat laju rijang**

**Mata putroe oh na ubat  
Lom maken that neukheundakan  
Ate raja sangat susah  
Ka meutamah saket bintang**

Nibak puleh lom meutamah  
Sangat susah di Kumiran  
Dum na ubat dalam nanggroe  
Mata putroe han ek reunggang

Teuma raja pangge nujum  
Nyang ek maklum sikalian  
Deungon siat troh le teuka  
Ubak raja nyang Kumiran

Mumat jaroe laju sigra  
Poteu raja neukheun nyoe ban  
Wahe teungku nyang syekhuna  
Pakri ban na leumah neupham

Ubat putroe pat na nyata  
Cuba mita lam kitab nyan  
Dumna tabib jak boh ubat  
Han mustajab sikalian

Teungku seuot Insya Allah  
Cit mudah neubri le Tuhan  
Lheueh nyan teungku buka kitab  
Neudarab dum sikalian

Jeueb-jeueb banja jeueb-jeueb ayat  
Hingga dapat teungku neupham  
Neutob kitab teuma dudoe  
Angkat jaroe bak Kumiran

Ampon tuanku meuribee katoe  
Deungo kamoe hai sulotan  
Susu rimueng meuaneuk phon  
Teungku ampoh yue carikan

Neuyue mita jeueb-jeueb teumpat  
Dumna rakyat deungon pawang  
Meunyo na nyan nyang lon peugah  
Cut Sairah puleh rijang

Meunyo hana hai panghulee  
Teuntee reudee bungong karang  
Bah that meuhai yum meuribee  
E panghulee bek neusayang

Dalam rimba neuyue cari  
Upah neubri teungku pawang  
Meung hana nyan cit han puleh  
Walee abeh peng sigantang

Meunan haba nujum peugah  
Lom ka susah Syahi Alam  
Susu rimueng that meusaket  
Bah na ringget saboh gudang

Han meuteumee bak lon pike  
Nyang dalam gle mupat pih tan  
Teuma raja meunoe neukheun  
Bak sikureueng droe sulotan

Wahe banta sikureueng droe  
Ubat putroe tacarikan  
Susu rimueng meuaneuk phon  
Tame keu lon hai sulotan

Ubat mata sinyak putroe  
Mita jinoe laju rijang  
Meung hana nyan nyang lon peugah  
Sairah gob lon pulang

Soe ek peuna nyang lon lakee  
Nyan meulintee dilon tuan  
Raja sikureueng seuot lanja  
Mudah saja bak lon tuan

Nibak kamoe mudah raya  
Ampon raja bek susahan  
Susu rimueng jeuet tajak bloe  
Preh pawang woe dalam hutan

Bek susah le wahe deelat  
Cit mudah that bak lon tuan  
Jibeudoh le laju sigra  
Jijak mita dalam peukan

Abeh dusun deungon banda  
Jak pareksa teungku pawang  
Hana sapat pih na nyata  
Susah raja nyang seumbilan

Teupin Gapeueh nanggroe Langsa  
Nyang gura Kuala Simpang  
Raja sikureueng dong mumita  
Teuduek haba siat diam

Lon gantoe ngon ujong banja  
Oh tabaca mangat reumbang  
Dalam paya bak teumike  
Dipasi na aseh-aseh

AMMA BAKDU mangat lagi  
Sang han meukri bak tatuleh  
Lon peugah si Unan tari  
Bak jeungki jilayeue beuteh

Ban jideungo haba raja  
Geuyue mita ie rabin jeh  
Jibeudoh le jijak lanja  
Dalam rimba leugat keudeh

Mita buloh dum sinaroe  
Jipasoe rabin kameng jih  
Dalam buloh ka jipasoe  
Jipreh sampoe cut banta jih

Sibak kayee reului raya  
Po cut banta sinan neueh  
Duek yub kayee banta muda  
Neupreh raja sikureueng jeh

Hana bajee ka jikeubah  
Rupa ceudah ban leukek puteh  
Sidroe saja cut Bangsawan  
Neureuntang ngon pacok dadeh

Cit neupreh troh aneuk raja  
Bangsawan ka ate peudeh  
Teiduek oh noe saboh tanggam  
Muwoe kalam laen ureh

Gamba Unan teutap haba  
Lon peugisa keu banta jeh  
Teungoh jijak dalam rimba  
Jak pareksa pat rimueng eh

Hana sapat na meurumpok  
Sira geujak geumeurinteh  
Ladom jikheun cit jijeuet mat  
Ladom ingat jiklok beuteh

Meunan keuh dum jimeurika  
Dalam paya Alue Nireh  
Hingga teuma jijak leugat  
Troph bak teumpat banta areh

Di teungoh padang kayee sibak  
Jroh that rampak reului abeh  
Raja sikureueng laju peurab  
Deuh jilihat bungong puteh

Ban jikalon jroh that rupa  
Hana nyang sa ureueng sideh  
Jibri saleuem laju pantah  
Ngon cut indah bungong puteh

Assalamualaikum ureueng muda  
Kamoe teuka jarak sideh  
Banta jawueub alaikum salam  
Lon preh datang tuan sideh

Dalam gunong lon jak keunoe  
Lon jak ba nyoe ubat areh  
Hingga keudeh kamoe piyoh  
Dang tho reuoh di teungku jeh

Sira geuduek peugah haba  
Aneuk raja jikalon jeh  
Teumanyong le aneuk raja  
Jipareksa peue buloh jeh

Banta seuot neukheun ubat  
Cit jarak that lon ba sideh  
Ubat ulee ubat mata  
Batok raya pih ek puleh

Rabin rimueng teungku meutuah  
Le that sudah nyang ka puleh  
Ubat nyoe di Gunong Pari  
Dua kami meujak sideh

Bunoe baro ban geugisa  
Tinggai hamba sinoe lon eh  
Aneuk raja marit dudoe  
Neubri lon bloe ubat nyang jeh

Rabin rimueng ubat mata  
Hareuga padum nyang abeh  
Neubri keu lon hai syeedara  
Cit treb raya lon jak keudeh

Banta neukheun teuma laju  
Hai teungku deungo beugleh  
Han jeuet publoe dum ubat nyoe  
Wasiet meunoe bak teungku jeh

Cit neuyue bri dum syeedara  
Saboh tanda lon boh sideh  
Maseng-maseng beuna tanda  
Bek meutuka oh troh keudeh

Sabab ka jeuet keu syeedara  
Lon ngon gata bek meulingkeh  
Deungon beusoe lon cap bak pha  
Keu syeedara beujeuet meuceh

Meunyo ka lheueh lon boh tanda  
Lon bri lanja ubat nyang jeh  
Ubat lon bri jeuet tapuwoe  
Meunyo tabloe hana jadeh

Beu that ringget siploh laksa  
Han lon suka bek le rinteh  
Meunan neukheun po cut banta  
Aneuk raja seuot meuceh

Bah kamoe bloe dum hareuga  
Hai meukuta bek nyang meudeh  
Meunyo neucap jeuet keuparot  
Lon teumakot nibak peudeh

Keu syeedara lon tem beusah  
Han lon ubah oh troh keudeh  
Seuot banta nyang samlakoe  
Salah kamoe bak teungku jeh

Nyang bak kamoe jeuet ban suka  
Ban kheun gata ulon pateh  
Nyang lon takot cit keu deesya  
Teumeureka bak guree jeh

Meung han pane lon lakee cap  
Kon seunang that ringget puteh  
Peue galak jeuet tajak bloe  
Di nanggroe pih seunang taeh

Pane lon tem jak lam rimba  
Meung kon raya meukeusud jih  
Pane ureueng jiitem keu jra  
Cuba kira wahe wareh

Aneuk raja jimupakat  
Bah le geucap kaman keudeh  
Nyang keu luka peue taingat  
Taboh ubat oh troh keudeh

Nyang keu parot peue takira  
Lagee bak pha kon bak beuteh  
Lom pih oh troh ubak raja  
Malee raya dum teuhabeh

Meung tan ubat nyang geulakee  
Aib malee beu tapateh  
Nyang cap bak pha hana malee  
Meuseubee ngon luweue puteh

Meunan pakat aneuk raja  
Jisilak pha jijak keudeh  
Cut Bangsawan lom neutanyong  
Pakri keunong ban lon kheun jeh

Meung han tatem jak leh gisa  
Bek treb raya sinoe taeh  
Aneuk raja teuma seuot  
Beu that parot neucap keudeh

Meunyo teuntee neubri ubat  
Kamoe theun cap bandum abeh  
Banta neukheun teuma dudoe  
Meunyo tabloe han lon pateh

Meung kon ubat nyang lon janji  
Beurangkari han lon pateh  
Meung tatheun cap baro lon bri  
Takeumbali laju keudeh

Banta beudoh jak tet beusoe  
Seun-seun sidroe néucap abeh  
Neupeiduek cap bak uram pha  
Cit gura bagoe geutuleh

Abeh bandum banta neucap  
Neujok ubat laju keudeh  
Pacok dadeh mat bak jaroë  
Teupeh asoe meunyum peudeh

Beusoe tutong ka jeuet luka  
Meuingkang pha susah abeh  
Marit sidroe aneuk raja  
Ka ceulaka sang ka puleh

Han jeuet tawoe dalam kuta  
Gob pareksa malee abeh  
Pakri laku toh bicara  
That ceulaka buet meulingkeh

Teuma marit sidroe banta  
Jak cok guda kaman keudeh  
Woe u nanggroe dilee gata  
Mita guda dilee sideh

Taba keunoe he syeedara  
Nak tagisa u nanggroe jeh  
Mangat tawoe dalam kuta  
Meungna guda han that peudeh

U nanggroe droe dilee gisa  
Geucok guda geuba keudeh  
Keumah pakat dum sinaroe  
Hingga geuwое u nanggroe jeh

Saboh sapo geuduek guda  
Woe bak raja laju keudeh  
Troph u mideuen tren cong guda  
Bak tuanta geujak keudeh

Ban neukalon uleh raja  
Ka woe banta sikureueng jeh  
Jak meuingkang neueu rupa  
Poteu raja tanyong meuceh

Pakon aneuk jak meuingkang  
Peue salahan bungong puteh  
Teuma seuot aneuk raja  
Jiraba pha lam boh beuteh

Sabab meujak dalam rimba  
Kareueng raya dum meucureh  
Kareueng duroe tajam raya  
Dum asoe pha luka abeh

Kumiran kheun teuma meunoe  
Sangka kamoe bungong puteh  
Bak tameulho deungon rimueng  
Hai bungong trueng luka beuteh

Wahe aneuk bijeh mata  
Lon ayahanda sayang abeh  
Na meuteumeung nyang tamita  
Hai meutia elok pareh

Banta seuot tuanku ampon  
Na bak ulon ubat nyang areh  
Teuma jijok ubak raja  
Maseng rata pacok dadeh

Raja yue me u meuligoe  
Bak putroe neuyue boh keudeh  
Teuma jiba pantah laju  
Nujum neueu pacok dadeh

Nujum cok le teuma leugat  
Sangat ajab nujum areh  
Rabin kameng neukheun teupat  
Bukon ubat bungong puteh

Susu rimueng kon meunoe ban  
Jak tapulang leugat keudeh  
Jipeutron le teuma pantah  
Jipeugah kon ubat nyang jeh

Susu rimeung kon geupeugah  
Hai deelat syah kon seunareh  
Rabin kameng nyang ka teuntee  
Meunan lakee nujum peujeh

Kumiran ngo teuhah babah  
Bit beurakah di banta jeh  
Yoh nyan raja lom ka susah  
Bungong mirah ate peudeh

Sira neuduek aloh-alah  
Nujum peugah teuma peujeh  
Rabin kameng hai deelat syah  
Putroe indah han ek puleh

Susu rimueng kon sikali  
Jinoe pakri bungong puteh  
Seuot banta sikureueng droe  
Ubat lon bloe di gunong jeh

Sidroe ureueng dalam rimba  
Teungku tapa nama meuceh  
Rupa elok hana tara  
Sidroe hana lagee gob jeh

Dalam buloh dum geumeukat  
Geukheun le that nyang ka puleh  
Lagi gob nyan ureueng tuha  
Nyang jeuet hamba meutem pateh

Han meuteupeue keu jih buya  
Bit ceulaka bateueng paleh  
Meunan narit aneuk raja  
Di meukuta ate peudeh

Kukuek manok teungoh malam  
Saleh waham dum ureueng eh  
Teuduek siat di sulton  
Lon peuriwang keu banta jeh

Cut Bangsawan bek han meuri  
Neukeumbali laju keudeh  
Oh leupah woe aneuk raja  
Banta gisa ubak nek jeh

Ubak nek tu nyang raksasa  
Bungong jeumpa neuwoe keudeh  
Oh troh neuwoe ubak nek tu  
Seumbah laju bak teuot jeh

Neupeugah le teuma lanja  
Ampon hamba e nek areh  
Lon ka susah pakri bagoe  
Saket putroe hana puleh

Susu rimueng geukheun ubat  
Deungon siat cit ek puleh  
Dilon han ek sang lon dapat  
Lon harap geunap nyang areh

Nyang sikureueng aneuk raja  
Han ek daya ubat nyang jeh  
Hingga teuma haba nyang rab  
Bungong riwat peugah meuceh

Geuhei aneuk raja meugah  
Cap ka sudah bandum abeh  
Nek raksasa khem meuhah-hah  
That meutuah bungong puteh

Neungo narit banta peugah  
Galak leupah po nek jeh  
Teuma seuot nek raksasa  
Hai meutia nyang lon gaseh

Meunyo meunan bek tagundah  
Tulong Allah bungong puteh  
Tapreh sinoe bungong mirah  
Lon seulaah siat keudeh

Teuma neujak nek raksasa  
Na oh luar jarak abeh  
Susu rimueng cit hase ka  
Neupeugisa neujak keudeh

Jok keu banta nyang samlakoe  
Neuyue peuwoe u nanggrœ jeh  
Nek raksasa neukheun meunoe  
Jak leh peuwoe bungong puteh

Ban nyang lon yue bek taubah  
Bungong mirah nyang lon gaseh  
Hingga teuma haba nyang toe  
Banta neuwoe leugat keudeh

Meuah deesya mumat jaroe  
Po samlakoe deungon nek jeh  
Sok ngon bajee nibak badan  
Bungong peukan ban uroe jeh

Banta neujak tajam-tajam  
Neureugam ngon pacok dadeh  
Bungong lawang ngong jeumuju  
Meujampu pajoh ngon sireh

Teutap bak woe bungong meulu  
Hai teungku haba nyoe keudeh  
Puteh-puteh bungong panjoe  
Angen tampoe sret meulapeh

Jinoe laen lon hareutoe  
E teungku droe deungo beugleh  
Keu hai saket bungong geutoe  
Bak siuroe brat sang abeh

Lam meuligoe teuka susah  
Aloh-alah deundayang jeh  
Teungoh neuduek sinyak putroe  
Jitanyong ho si Unan jeh

Dayang seuot dum sinaroe  
Gohлом jiwoe aneuk paleh  
Raja suroh teuma leugat  
Jak ka lihat dilee keudeh

Deundayang jak teuma lanja  
Oh seulasa jarak abeh  
Leumah jieu woe si Gamba  
Meuseurapa sang beureuteh

Pane kajak kah hai Unan  
Seutia han aneuk paleh  
Putroe saket lam meuligoe  
Ka nam uroe pat kajak eh

Sia payah geupeulara  
Putroe muda han ka gaseh  
Macam-macam dayang marah  
Bungong kipah hana peudeh

Hana bacut saket ate  
Bungong pade elok pareh  
Pacok neumat nibak jaroe  
Neuek sampoe leugat keudeh

Ban sari troh ukeue raja  
Neupareksa laju meuceh  
Raja tanyong peue lam jaroe  
Unan pindoe pat kajak eh

Dalam buloh peue ka pasoe  
Pane kawoe treb that sideh  
Unan seuot ampon deelat  
Kamoe sisat lam padang jeh

Gadoh kameng han lon tupat  
Jijak meurot lam uteuen jeh  
Lon jak mita jeueb-jeueb tuwi  
Wahe duli teuma lon eh

Ma lom raja tanyong meunoe  
Peue lam jaroe sangat puteh  
Unan seuot han lon tuban  
Cit ka meunan meulihat sideh

Bak rot lon jak sinan meulihat  
Lon jak leugat teuma keudeh  
Lon puwoe laju lam kuta  
Bak lon kira pacok dadeh

Saleh peue-peue hai meukuta  
Lon eu rupa sangat puteh  
Hingga teuma di Kumiran  
Peukek rijang bak tabib jeh

Nujum kalon teuma laju  
E tuanku geukheun meuceh  
Rabin rimueng meuaneuk phon  
Hai ampon kon pacok dadeh

Nyankeuh ubat putroe muda  
Hai baginda beuneupateh  
Ban neudeungo meunan haba  
Tahe raja mandang abeh

Poteu raja tahe mandang  
Gamba Unan puwoe sideh  
Nyang sikureueng aneuk raja  
Han ek nyata ubat nyang jeh

Yoh nyan raja teuka dasyah  
Sang meutuah si Unan jeh  
Hingga tabib jak boh ubat  
Bungong riwat laju puleh

Mangat ate poteuraja  
keu si Gamba leubeh gaseh  
Han jeuet jarak dalam kuta  
Meung ulua han jeuet keudeh

Meunyo hana woe si Gamba  
Poteuraja susah abeh  
Boh jambee ie mirah rata  
Nyang gura jambee beureuteh

Gamba Unan teutap haba  
Lon peugisa bungong puteh  
Lon peugah keu putroe muda  
Oh ban teuka beudoh bak eh

Neumarit le bungong keumang  
Wahe Unan nyang lon gaseh  
Keunoe tajak sjat dilee  
Na peue lakee lon kheun ranteh

Gamba Unan peurab lanja  
Putroe muda jitanyong jeh  
Putroe tanyong kameng dua  
Na aneuk ka kheun bu meuceh

Unan seuot bungong ipoh  
Na sireutoh aneuk ka ceh  
Putroe peugah hai Unan droe  
Get ka puwoe dum beuhabeh

Unan seuot tan lon publoe  
Hai putroe pakon jeuet abeh  
Putroe jikheun lom lagee nyan  
Hai Unan bek le that ranteh

Ka puwoe bek payah kajak  
Sabab jarak kadang sideh  
Unan seuot babah rancah  
Teuntee jarak bit gampong jeh

Kareueng duroe rot bak tajak  
Meungkon na grak han troh keudeh  
Putroe deungo haba meunan  
Neuiem yoh nyan bungong puteh

Han le marit ngon si Gamba  
Jipeukra-kra meunoe meudeh  
Panyot culot meulhat keudroe  
Bak sagee didalam binteh

Teiduek haba sinyak putroe  
Lon hareutoe jinoe keudeh  
Unan teutap bak geumubeue  
Laen sapeue hana peudeh

Meunan sabe geunap uroe  
Hana tuwo keu kameng jeh  
Oh beungoh jak oh seupot woe  
Po samlakoe bungong puteh

Boh ceumpeudak mangat han soe  
Boh panjoe baro meutapeh  
Haba nyan ka teutap oh noe  
Lon peugah proe laen keudeh

Nyoe lon peugah keu buraksa  
Padang anta teumpat sideh  
Di padang Anta Beuranta  
Sicilaka sinan jieh

Ka jibri thee ubak raja  
Jimeung teuka hantu paleh  
Jimeung jak cok putroe muda  
Cit awai ka janji yoh jeh

Hingga teuma raja deelat  
Peugot teumpat laen keudeh  
Dibineh padang Beuranta  
Oh jiteuka meuhat sideh

Bit lam nanggroe haro-hara  
Putroe taba teuma keudeh  
Meunan pike raja nanggroe  
Neuheu keudroe dum utoh jeh

**Utoh Mat Asan utoh Mat Usen  
Utoh Mat Amin ngon utoh Binseh  
Utoh Amat ngon utoh Ali  
Utoh Nafi ngon utoh Puteh**

**Pangge utoh dum lapan droe  
Meusoe-soe nyang meuceh- meuceh  
Neuyue peugot ngon meuligoe  
Bak duek putroe bungong puteh**

**Bak duek putroe ti Sairah  
Dang troh langkah buraksa jeh  
Utoh deungo raja peugah  
Jimeulangkah laju keudeh**

**Hingga teuma haba nyang toe  
Peugot meuligoe bak teumpat jeh  
Deungon siat hase lingka  
Lom ngon rupa ceudah Abeh**

**Tingkap meuligoe jroh meukilat  
Bandum meucat deungon binteh  
Di leuen meuligoe geukeubah teuma  
Beujana nyang raya abeh**

**Geupasoe ie limong gunca  
Keu buraksa oh troh keudeh  
Cit ka meunan lam biasa  
Oh jiteuka dilee sideh**

**Oh watee troh hantu itam  
Minom rijang ie nyan abeh  
Lheueh jijeb ie bandum simpan  
Jicok intan bungong puteh**

**Cit ka meunan geubri adat  
Beurangkapat dilee yoh jeh  
Hingga cukop bandum lingka  
Putroe geuba teuma keudeh**

Bak masa nyan putroe geuba  
Bineh rimba laju keudeh  
Wazi meuntroe uleebalang  
Sikalian meuceh-meuceh

Deungon rakyat dum sibarang  
Intat bintang bungong puteh  
Ateueh gajah nyang meujeuhang  
Bungong karang geuba keudeh

Dum na rakyat balatantra  
Putroe geuba lam uteuen jeh  
Tamse ureueng tulak bala  
Sangat subra deungon bareh

Bukon sayang bungong jeumpa  
Abeh mala sret meulapeh  
Tuan putroe deungon raja  
Sangat rugha bungong puteh

Putroe neumoe hana reuda  
Asoe luka ija abeh  
Seureuta ngon neubeurkata  
E aneukda nyang lon gaseh

Tatinggai lon e meutia  
Bijeh mata elok pareh  
Di dalam gle geumeurusa  
Dalam paya geuboh eumpeh

Keupeue guna kaso tika  
Oh tan gata bungong puteh  
Bukon sayang tok-tok beuragoe  
Bulee bak dhoe mirah puteh

Tinggai subang mata pudoe  
Lam meuligoe ngon tika eh  
Bukon sayang aneuk tiong  
Di cong rambong meusu sideh

Oh tan gata putik sukon  
Ho kujak lon bungong nireh  
Bukon sayang aneuk puyoh  
Lam geureupoh meusu sideh

Oh tan gata puteh leusoh  
Buleuen pajoh han tom abeh  
Aneuk siwah di cong agu  
Leuek jikutru di cong nireh

Pakrikeu ban ya Tuhanku  
Bungong meulu sidroe sideh  
Ya Allah Wahidul Kahha  
Akan hamba beu neugaseh

Beu seulamat aneuk hamba  
Neubri teuka Bangsawan jeh  
Ya Tuhanku po nyang Esa  
Nibak bala beu seuliseh

Aneuk ulon ka lam rimba  
Sayang jiba le hantu jeh  
Bukon sayang minyeuk ata  
Sideh jiba di nanggroe jeh

Sayang aneuk putroe muda  
Han soe sangka bala peudeh  
Bukon sayang minyeuk gahru  
Geujampu ngon minyeuk pareh

Beu troh aneuk Indra Bungsu  
Nyang meusyeuhu Bangsawan jeh  
Alah hai on sibabau  
Meujampu ngon aseh-aseh

Neubri beu troh ya Tuhanku  
Bintang timu elok pareh  
Bungong meulu dalam gaca  
Bungong jeumpa lam tika eh

Beu troh neujak bangsa Indra  
Ngon syeedara ban dua jeh  
Ya Tuhanку droeneuh Tuhan  
Sikalian droeneuh peujeh

Neubri beu troh cut Bangsawan  
Aneuk badan beu seuliseh  
Allah Allah he ya Ghafu  
Droe Tuhanку nyang geumaseh

Neubri beu troh jinoe laju  
Aneuk teungku di nanggroe jeh  
Ya Tuhanку po nyang Esa  
Nyang that kaya ngon geumaseh

Neubri leupah aneuk hamba  
Bak Buraksa nyang that paleh  
Putroe neumoe hana reuda  
Ro ie mata dum meulapeh

Abeh bajee neuplah ija  
Abeh tika dum neuireh  
Sabab hana aneuk dara  
Peue-peue nyang na neupeuabeh

Teuma meusu poteu raja  
Hai aneukda nyang lon gaseh  
Bek le tamoe po jroh rupa  
Hana guna bungong puteh

Seungab po cut bek le rugha  
Hai aneukda beu tapateh  
Adat tamoe hana laba  
Tuhan kada bungong nireh

Bah tapeujok ubak Rabbi  
Hai putroe ti nyang tagaseh  
Weueh ate hana sakri  
Bungong giri beu tapateh

Meunan narit poteuraja  
Putroe muda han jipateh  
Daok jimoe hana reuda  
Ro ie mata ban ujeuen jeh

Jireuet-reuet ok tumbok dada  
Jiploh ija jiglueng binteh  
Bungong meulu puteh sapa  
Nyang kurasa jeumpa puteh

Putroe bae teuduek haba  
Lon calitra laen ureh  
Cicem murong meuseurapa  
Cicem pala meuhei lakoe

Nyoe lon peugah aneuk raja  
Nyang peukasa sikureueng droe  
Cit ka hase ngon lasyeuka  
Beude lila peudeueng cakcoe

Bandum galak ate suka  
Putroe muda cit keu jih woe  
Cit ka jipreh putroe geuba  
Ban seunlingka dong mupadoe

Maseng-maseng meujiwa rasa  
Di nab raja di keue meuntroe  
Keunoe keudeh meugisa-gisa  
Peugah haba peurancak droe

Jikheun nyang ek poh buraksa  
Nyoe keuh hamba tuanku droe  
Ureueng laen pat kuasa  
Meung kon hamba laen han soe

Cit ka neuyue oleh ayah  
Neupeugah masa saboh roe  
Nyang buraksa cit ek lon cang  
Tulong Tuhan mate keudroe

Meung ka lon han lon riwang  
Barangkajan hana lon woe  
Meunyo han ek lon tueng bintang  
Bah le simpan umu sampie

Bek le susah di tuanku  
Mangat neueu buet patek nyoe  
Jinoe putroe neupeunikah  
Nak beh susah ate kamoe

Meunan keu dum jimeurajah  
Jimeuharah maseng keudroe  
Seuot raja han peue salah  
Cit ka lon seurah keu gata roe

Akan teutapi bacut salah  
Aneuk lidah tango kamoe  
Keu jeunamee cut putroe ti  
Wajeb tabri tapeujaroe

Mata tujoh idong tujoh  
Tabri beutroh bak ayah droe  
Nyankeuh tanda mate musoh  
Hai aneuk beh jeunamee putroe

Jinoe aneuk bek that susah  
Bek tagundah hai samlakoe  
Nyang keu putroe bek tagundah  
Lon peunikah soe nyang puwoe

Meunan narit poteuraja  
Seungab haba dum sinaroe  
Hingga teuma putroe bintang  
Ka datang ubak meuligoe

U astana ka troh geuba  
Peukek lanja bungong uroe  
Rab meuligoe hana jarak  
Leumbeng tuimbak cokma beusoe

Maseng-maseng peuget teumpat  
Maseng rakyat pahlawan droe  
Bukon sayang bak rawatu  
Bee meuharu oh cot uroe

Taduek siat geuheu teungku  
Bungong meulu lon hareutoe  
Ti Sairah lam astana  
Sayang raya cut sambinoe

Laen rakyat abeh gisa  
Bungong jeumpa tinggai sidroe  
Ngon deudayang na dua lhee  
Bungong keumbee soe peulaloe

Laen bandum ka geugisa  
Poteuraja pih laju woe  
Bukon sayang bungong keundo  
ka abeh tho keuñong uroe

Tinggai putroe dara baro  
Teungku linto goh lom geuwoe  
Yoh masa nyan jimoë bae  
Su meusye-sye hana bagoe

Putroe jimoë meusok-meusok  
Teuploh ngon ok jitumbok droe  
Sira jimoë bungong giri  
Ubak Rabbi jipeugah droe

Ie mata ro hana sakri  
Cut putroe ti jikheun meunoe  
Ya Tuhanku po nyang Esa  
Pakri daya keu lon sidroe

Neubri leupah lon bak bahya  
Buraksa jimeung ba kamoe  
Ya Allah Tuhan nyang gani  
Nyang that suci kaya han soe

Neutulong lon hai ya Rabbi  
Beutroh mari po samlakoe  
Cut Bangsawan beutroh teuka  
Bak banya beuleupah kamoe

Ya Tuhanku po lon Tuhan  
Bangsawan neubri beusampoe  
Nyankeuh nyang ek poh buraksa  
Lam calitra yoh saboh roe

Ya Tuhanku po nyang Esa  
Neupeulara ulon sidroe  
Nibak banya neubri leupah  
Raja meugah neubri sampoe

Ngon ie mata ile jaujah  
Sayang leupah sabe Jimoe  
Putroe Jimoe hana reuda  
Sangat rukha hana bagoe

Lam meuligoe jimeunazar  
Sayang raya cut sambinoe  
Bukon sayang ija sutra  
Meucahya didalam uroe

Teuduek siat putroe muda  
Lon calitra Unan sidroe  
Seulawet tan cut Sairah  
Mita ilah gob nyan sidroe

Mita akai keudeh keunoe  
Jinak pumoe sinyak putroe  
Hingga teuma jijak leugat  
Bak teumpat po cut sambinoe

Oh troh keunan jibeurangkat  
Jidong siat di leuen meuligoe  
Putroe kalon deuh jilihat  
Jihei leugat kaek keunoe

Wahe Unan kaek siat  
Sayang lon that keukah sidroe  
Padumna treb han tom teuka  
Tan seutia Unan sidroe

Kaek keunoe pantah laju  
Ka pajoh bu bak kajak woe  
Kameng beugel ka peulara  
Keu beulanja Unan sidroe

Wahe Unan nyang lon gaseh  
Deungo beugleh wasiet kamoe  
Watee malam sinoe kaeh  
Bek cit keudeh di kah kawoe

Meunan narit bungong puteh  
Si Unan jeh jawueub meunoe  
Gamba Unan seuot laju  
Bungong meulu tango kamoe

Bah le lon woe bak meukuta  
Kameng dara pih tan jiwoe  
Kadang pat-pat ka jieh  
Kameng paleh han troh jiwoe

Jeuet han lon duek sinoe hamba  
Keu buraksa takot kamoe  
Lagi pih rab binteh rimba  
Lom buraksa ka rab sampoe

Watee jicok putroe muda  
Deungon hamba sigo sampoe  
Meunyo tan le lon si Gamba  
Soe peulara kameng putroe

Nyang putroe ka teuntee jiba  
Nyang di hamba ho goh lon woe  
Meunan jikheun di si Gamba  
Putroe muda seuot meunoe

Meumantong ku goh lom jiba  
Bek ka bungka laen nanggroe  
Oh hana lon ho nyang suka  
Bak ayahanda pih jeuet kawoe

Gamba Unan jaweueb pantah  
Jipeugah bak sinyak putroe  
Bangsawan nyang po cut peugah  
Goh lom langkah oh noe uroe

Kadang-kadang ho ka leupah  
Na geulangkah baroe- baroe  
Kadang na troh han taturi  
Geukeumbali laju geuwoe

Putroe deungo kheun si Gamba  
Sret ie mata dum meataloe  
Sabab jikheun keu Bangsawan  
Kadang-kadang cit ka geuwoe

Putroe seuot peue han meuri  
Kon na dilee dalam nanggroe  
Lagi geujak deungon tantra  
Peue kakira gob nyan sidroe

Lagi pi jroh hana nyang sa  
Manusia dalam nanggroe  
Hana sidroe na siwazan  
Cut Bangsawan nyang samlakoe

Teuma jaweueb lom si Gamba  
Bak hamba bek neuhareutoe  
Pat nyang leubeh patong Tuhan  
Meulaenkan ureueng nyang sidroe

Meunyo laen bandum sama  
Meugah hina dum beurang soe  
Meunan jikheun le si Gamba  
Putroe muda sang yo keudroe

Lom putroe kheun wahe Unan  
Jeuet kaba ngon meudeh meunoe  
Watee kutham bek kagisa  
Kameng dara gohlom jiwoe

Bit kah sidroe tan seutia  
Katem gisa kameung jak woe  
Unan seuot teuma lanja  
Sayang hamba that keu putroe

Meung han sayang pane lon jak  
Jeh pat jarak nyoe ho lon woe  
Nyang han lon tem sinoe lon eh  
Buraksa jeh ka rab sampoe

Jicok putroe lonpih jiba  
Soe peulara nyan kameng dara  
Nyang jinoe bah le lon gisa  
Singoh teuka meungka uroe

Singoh beungoh keunoe lanja  
Meudang teuka musoh pindoe  
Putroe deungo kheun si Gamba  
Sangat rugha hana bagoe

Dendayang dum ro ie mata  
Putroe muda pih cit jimoe  
Lam meuligoe haro hara  
Sangat subra malam uroe

Bukon sayang si jeumpa mirah  
Pucok lipah diateueh pante  
Teuduek oh noe saboh ulah  
Laen surah wahe akhi

Dum na wareh soe nyang baca  
Bek upat ceula keu lon nyang rawi  
La ilaha illallah  
Kalimah teebah teutap lam ate

Kalimah teebah tamse jalan  
Woe bak Tuhan Rabbon jalil  
Seulamat iman watee seukreuet  
Syeetan han jeuet jidaya le

Kalimat teebah tamse panyot hu  
Dalam kubu han seupot le  
Uroe akhirat nyang sangat tutong  
Nyankeuh payong kalimah Rabbi

Oh ka geuron u padang mahsyia  
Geupareksa surat geubri  
Oh meuhimpon dum na rakyat  
Geucok surat dum toh sare

Nyan got amai nyang keubajikan  
Jaroe uneun surat teujali  
Ngon jaroe wie tajok surat  
Nyankeuh sahbat nyang jeuheut bagi

Surat tacok mat di jaroe  
Tabeuet keudroe wahe akhi  
Keudroe tabeuet keudroe eu surat  
Baro teuingat buet nyang lawi

Peue teuseubut dalam surat  
Dum jimirit jaroe gaki  
Lheueh nibak nyan peurintah Tuhan  
Geutimang amalan bak ulee titi

Nyang brat amai keubajikan  
Leupah beujalan karonya Rabbi  
Nyang tan amai wahe e teelan  
Meusireut keunan u dalam api

Di yup titi apui sinaroe  
Teumpat geupasoe ureueng nyang asi  
Geunireng titi beulangong beusoe  
Keunan geupasoe maksiat abdi

Ingat-ingat jinoe keu untong  
Taingat tutong di uroe page  
Allah Rabbi Khalikun Mannan  
Seulamat iman keu kamoe neubri

Bek neubri ban keu si maksiat  
Bek roh teumpat ngon sijahe  
Kuala Langsa jidong kapai prang  
Di cong tihang kawat muble- ble

Soe nyang baca adek ngon abang  
Keu ulon tuan bek cit neuruhe  
Roh meusurat sabab get ragam  
Peumeuah rakan baten ngon lahe

Gunong Sikutob meusagob awan  
Cuaca buleuen di bineh pasi  
Teuduek oh noe saboh tanggam  
Meuwoe syahdan peurmaisuri

Seulawet tan aneuk dara  
Ro ie mata malam hari  
Geunap uroe hana reuda  
Sayang raya buet putroe ti

Sira jimoe putroe intan  
Macam-macam dum jirawi  
Ya Allah wahidul kahhar  
Ya ghafur Tuhan nyang gani

Ya Tuhandu po nyang Esa  
Aneuk hamba saleh pakri  
Aneuk ulon dalam uteuen  
Neubri jalan hai ya gani

Neubri leupah nibak syeetan  
Bangsawan beutroh keumari  
Allah hai on kanda rusa  
On jeumpa on malasari

Neubri beuuroh ban lon cinta  
Aneuk raja nyang sakeuti  
Neubri beutroh Banta Indra  
Bandua deungon syahpari

Alah hai on sinyak nika  
On kaca on ara giri  
E sambinoe elok rupa  
Sang dimata bintang pari

Bukon sayang cicempala  
Jimeuseunda deungon nuri  
Beumeutuah e aneukda  
Troh Indra deungon Syahpari

Leukek jikutru dalam cintra  
Di cong gaca mirahpati  
Lhok Seumawe le keude ija  
Meuniaga le ureueng Sigli

Nyoe lon peugah laen haba  
Aneuk raja nyang juhari  
Nyang rame jinoe di Langsa  
Seungoe raya keude Idi

AMMA BAKDU sangat gura  
Calitra keu banta ahli  
Gamba Unan bek han meusoe  
Laju neuwoe bungong giri

Ubak teumpat nek raksasa  
Jak peuhaba keu putroe ti  
Oh troh keudeh po cut banta  
Peurab lanja com bak gaki

Po nek tanyong neupareksa  
Peue na haba bintang pari  
Peue na susah bintang kala  
Ubak hamba tapeugah kri

Neuseuot le cut bangsawan  
E nek badan jinoe pakri  
Jinoe ka troh nyan buraksa  
Toh bicara nak lon taki

Jinoe putroepih ka geuba  
Bak astana rab bineh gle  
Aneuk raja sikureueng droe  
Pih ka sampoe jipeureugi

Nek raksasa teuma seuot  
Putik rambot deungo kami  
Makeuen dilee bungong uroe  
Bah buet kamoe bungong giri

Teungoh banta neupajoh bu  
Po nek meusu ngon sakeuti  
Deungon siat laju teuka  
Saboh guda that juhari

Ka teudong le dikeue banta  
Jroh that rupa guda ahli  
Bulee ijo jroh meucahya  
Di cut banta ajeb ate

Peulana meuh bandum rata  
Meuh suasa ngon baiduri  
Ngon bulee krui puteh sroe broe  
Deungon taloe jroh han sakri

Nama geukheun Jeungki Hareujen  
Seunalen banta juhari  
Jimeututo bagoe insan  
That analan hana sakri

Jeungki Hareujen tanyong lanja  
Pat seungsara neuhei kami  
Saleh ka troh raja indra  
Nyang po hamba wahe duli

Nek raksasa seuot leugat  
Nyang lon hajat keunoe Jeungki  
Bangsawan nyang cuco hamba  
Hajat gata lon keumeung bri

Beu taturot ho nyang suka  
Cuco hamba wahe Jeungki  
Meunan narit nek riek peugah  
Guda indah jaweueb jibri

Guda seuot laju pantah  
Insya Allah wahe duli  
Udep mate laba rugoe  
Tuanku droe sajan kami

Patek ikot ho nyang suka  
Hai meukuta raja kami  
Meunan narit raja guda  
Nek raksasa meunoe rawi

Neupeugah le ubak banta  
Hai meutia cuco kami  
Wahe aneuk cut Bangsawan  
Nyoe peunulang he boh ate

Raja guda nyang Hareujen  
Sinalen keu gata lon bri  
Jinoe ancuk jak leh gisa  
Buraksa nyang gata hudi

Nyoe pat taloe jeurat peunuta  
Aneukanda ingat lam ate  
Taikat bak takue guda  
Pak nyang raya boh bak guci

Oh troh jijak keunan teuka  
Buraksa peurab bak guci  
Jijak jeb ie lam beujana  
Lompat teuma guda Jeungki

Tapeurab le laju tacang  
Bek reunggang lumpat hai Jeungki  
Wahe aneuk nyang bagia  
Bek lupa wasiet ulon bri

Oh lheueh mate nyan buraksa  
Bajee nyang ka sok keumbali  
Idong tujoh mata tujoh  
Puwoe beu troh ubak duli

Nyankeuh ulon wasiet  
Ingat keubit dalam ate  
Wahe aneuk puteh lumat  
Meutuah that bu sampoe

Lom pih teuma lon amanat  
Hikeumat guda nyang sakeuti  
Oh meunapsu raja guda  
Teuoh hamba nyang nek diri

Cit jiteuka guda ijo  
Hai cuco e ho nyang ate  
Meunan narit nek raksasa  
Raja Indra seumbah gaki

Lakee idin laju gisa  
Bungong jeumpa ngon sakeuti  
Ret antara neuteureubang  
Cut Bangsawan nyang juhari

Meusu geunta macam-macam  
Na tamse ban su napiri  
Di wie neumat keukang guda  
Uneun banta peudeueng sakeuti

Di Hagu na lampu gisa  
Kapai teuka nyan jiteuntang  
Cut Bangsawan teutap haba  
Lon peugisa laen ruang

Lon balek ngon ujong banja  
Bek ban nyang ka han get reumbang  
Bukon sayang siwah raja  
Di cong ara meulet ngon kleueng

Bangsawan di dalam hawa  
Meugisa raja sikureueng  
Dum ka hase si anika  
Gajah guda leumbeng peudeueng

Cit jipreh ka troh buraksa  
Dalam rimba jipeuget sang  
Maseng-maseng aneuk raja  
Maseng jeumba maseng urang

Bak jipike oh jiteuka  
Bek nyata jikalon urang  
Get bah tapreh dalam rimba  
Tageulawa deungon karang

Watee jiplueng teuntee reubah  
Tacang pantah deungon peudang  
Ngon meuriam pih tahudi  
Bek jitukri mita ruang

Ladom sinoe preh beucakap  
Oh jipeurab srom ngon kareueng  
Teuntee mate jih binasa  
Buraksa nyang raya tuleueng

Meunan pakat dalam rimba  
Aneuk raja nyang sikureueng  
Peuget teumpat maseng jeumba  
Lam beuluka buket kareueng

Teutap sinan aneuk raja  
Lon peugisa bungong seupeung  
Teungoh neujak dalam hawa  
Deungon guda cut bungong trueng

Hingga teuma ka troh sampoe  
Bungong uroe neutren mamong  
Bangsawan tren teuma leugat  
Di sinan rab meuligoe buleuen

Jikalon le putroe muda  
Leumah teuka sidroe ureueng  
Deungon guda nyang sakeuti  
Hireuen cut Ti putroe meugleueng

Dalam ate putroe muda  
Han tom teuka keunoe ureueng  
Nyang meunan jroh ilok rupa  
Deungon guda sangat useueng

Putroe peugah bak dendarayang  
E da badan soe dong di leuen  
Putroe tanyong jipeugah hom  
Po cut ampon pane ureueng

Kadang po cut judo intan  
Bangsawan nyang dilee geukheun  
Putroe kheun hom han lon turi  
Bah le lon ci meubri saleuem

Meunyo teuntee aneuk raja  
Bek kagisa laju mamong  
Kadang geutem cang buraksa  
Bah that beu le namiet ureueng

Meung ek leupah ulon sidroe  
Bah barangkasoe teungku lon kheun  
Sang bak laku lon eu rupa  
Buraksa ek geupeucateueng

Assalamualaikom abang teungku droe  
Langkah keunoe ek u mideuen  
Dalam paya timoh gaboh  
Di lampoh na abeueng-abeueng

Teungku teuka gampong jeuoh  
Neupioh bak kamoe siseun  
Leuek jikutru di cong panjoe  
Tok beuragoe di cong seupeueng

Teungku langkah u meuligoe  
Bak adoe di dalam uteuen  
Meunan narit sinyak putroe  
Seuot samlakoe meunoe neukheun

Waalaikom salam adek putroe  
Lon pioh droe dang na leueueng  
Kru seumangat wahe adoe  
Bungong uroe bintang buleuen

Meureubok di dalam ceuntra  
Jikua oh leumah eumpeuen  
Gampong jeuoh that di hamba  
Lon jak mita aneuk bayeuen

Ubat saket aneuk raja  
Geuyue hamba jak lam uteuen  
Di dalam gle geumeurusa  
Lam paya geutheun beuriyeueng

Lon tueng upah nibak raja  
Geuyue mita aneuk bayeuen  
Di ateueh gle timoh gaca  
Lam paya timoh beuraleuen

Cut putroe pubuet lam rimba  
Peue seungsara dalam mideuen  
Meunan narit banta indah  
Ti Sairah meunoe jikheun

Cicem pala po meuriti  
Mirah pati dong bak naleueng  
Keu Buraksa lon ka geubri  
Uleh abi nyang po mideuen

Bak sirahet dalam paya  
Bak jeumpa bak bineh reuleueng  
Beu le gaseh e kakanda  
Neutueng hamba soe me tayeuen

Bukon sayang bak rawatu  
Bee meuharu hana kureueng  
Neulangkah keunoe wahe e teungku  
Sangat nafsu kamoe lam uteuen

Banta seuot kru seumangat  
Nyang lon mita keu cut meugleueng  
Gampong jeuoh nyoe ho teuka  
Lon jak mita tika rubeueng

Tapi bacut jarak langkah  
Lon seuleuh cicem bayeuen  
Han jeuet po cut pioh payah  
Jarak langkah lon hai buleuen

Watee lon woe jeuet lon langkah  
Bek susah hai bungong kareueng  
Sabab lon jak lon tueng upah  
Cicem indah bunoe lon kheun

Seuot putroe bungong meurak  
Singoh neujak oh lheueh makeuen  
Banta jawueub laju pantah  
Peue paidah kamoe tatheun

Sabab lon jak jarak langkah  
Cuba peugah bungong seupeueng  
Seuot putroe raya leupah  
Hai deelat syah deungo lon kheun

Neucok kamoe bak Buraksa  
Soe srah ija gapiet tayeuen  
Laen bak nyan' ban nyang suka  
Neupubloe ba jeueb-jeueb mideuen

Teuma seuot banta muda  
Na cit haba lon ngo gob kheun  
Nyankeujeuet troh ulon tuan  
Na peurasan nyang that laweueng

Geukheun ureueng cang Buraksa  
Aneuk raja nyang sikureueng  
Bah keuh lon ek kaman dilee  
Nak lon teuntee hai cut meugleueng

Teuma neutron atueh guda  
Banta muda nyang meureubeung  
Neulangkah le u meuligoe  
Guda ragoe tinggai di leuen

Lheueh neuwasiet ubak Jeungki  
U meuligi neukek mamong  
Putroe beudoh seumbah banta  
Deungon tika ka lheueh teuleueng

Banta neuduek le neupioh  
Ranub jiboh le cut meugleueng  
Ka lheueh leungkap dum peue jiboh  
Sangat utoh putroe buleuen

Jibeuot le ukeue Banta  
Seureuta ngon meunoe jikheun  
Bukon sayang putik jambee  
Sikarang lhee bak cong cabeueng

Teungku pajoh ranub layee  
Tho peureudee hana ujeuen  
Pineung pi kreueh gapu pih tho  
Lon teungku e bineh uteuen

Beuseb lam pruet tuanku droe  
Bek neuh uroe troh u mideuen  
Hai tuanku lon peuingat  
Hina sangat lon ngon keureueng

Banta seuot kru seumangat  
Puteh lumat bungong kareueng  
Bak putroe na ranub layee  
Ateueh ulee lon cut meugleueng

Lon meuniet seulaseh puteh  
Lon duek lon eh lam teujunun  
Lom cut Banta neuteumanyong  
Hai cut bungong cuba takheun

Pane ureueng cang Buraksa  
Aneuk raja nyang sikureueng  
Geukheun judo putroe intan  
Pakri macam cuba takheun

Buraksa nyan jih padum droe  
Le that lagoe tahe ureueng  
Deungon gob nyan pih ek sudah  
Peue cit susah bungong kareueng

Toh nyang tayue cang bak kamoe  
Peugah jinoe wahe buleuen  
Putroe seuot bukon mudah  
Hai deelat syah bandum ureueng

Buraksa nyan sidroe saja  
Han ek daya bandum ureueng  
Bah sikureueng aneuk raja  
Ngon Buraksa bandum kengkeueng

Nyang na geukheun lam calitra  
Cit awai ka na meuteumeung  
Indra Bangsawan hai Tuanku  
Indra Bungsu ayah geukheun

Nyankeuh nyang ek cang Buraksa  
Aneuk raja bunoe lon kheun  
Meunyo laen pat kuasa  
Beuthat tantra sadum naleueng

Banta seuot tanyong nyoe ban  
Cut Bangsawan pane ureueng  
Toh syeedara pane nanggroe  
Pakri sampoe keunoe geukheun

Kadang-kadang cit lon turi  
Wahe cut ti cuba takheun  
Meunan narit po samlakoe  
Seuot putroe bungong kareueng

Nanggroe Kubat hai meukuta  
Aneuk raja bunoe lon kheun  
Nyang aduen nama Syahpari  
Laila Kande ma neuh geukheun

Sigo dua keulahiran  
Bungong karang dua siseun  
Nyang aduen busu lam jaroe  
Nyang adoe meureugam peudeueng

Meunan geukheun lam calitra  
Cit awai ka lheueh meuteumeung  
Meunyo laen tan kuasa  
Meukon banta bungong kareueng

Meunan narit tuan putroe  
Di samlakoe meunoe neukheun  
Meunyo adoe di Syahpari  
Ka lon turi hai cut meugleueng

Kapih hana le di nanggroe  
Bandua droe ka lam uteuen  
Geujak mita buloh peurindu  
Nyang lumpoe du dilee geukheun

Jinoe goh lom troh geugisa  
Dalam rimba buket kareueng  
Teuntee hana le keunoe troh  
Sabab tanggoh hana meulheung

Sigo meujak kamoe dua  
Sisat hamba dalam uteuen  
Teuma gadoh deungon Indra  
Di hamba nyoe ho seumeureung

Han peue harap hai adek beh  
Puteh lusoh bungong kareueng  
Gob nyan teungoh mita buloh  
Di lon gadoh mita bayeuen

Nyang keunoe ka teuntee han troh  
Sabab buloh goh meuteumeung  
Kamoe dua cit that rakan  
Kheundak Tuhan dalam uteuen

Teuka bade deungon ribot  
Lom ngon seupot han deuh naleueng  
Dalam rimba banta gadoh  
Hai putroe jroh bungong kareueng

Han peue harap e cut intan  
Keu Bangawan e cut buleuen  
Pajan keunoe Buraksa troh  
Hai putroe beh cuba takheun

Putroe seuot hana treb le  
Tuanku e nyang ka jikheun  
Harap kamoe keu meukuta  
Meudang teuka hantu bajeueng

Bak Buraksa lon neupeugah  
Keu paidah peue nyang neukheun  
Meunan jikheun putroe muda  
Ngon ie mata tamse ujeuen

E teungku cut po meukuta  
Neucok hamba bungong seupeueng  
Na niet neubloe sidroe hamba  
Soe srah ija geupiet tayeuen

Banta seuot kru seumangat  
Puteh lumat han ubah kheun  
Kadang dudoe roh tabalek  
Tapeuek raja sikureueng

Meunyo meunan hai adekda  
Lon kugisa mita bayeuen  
Putroe seuot hai Tuanku  
Ban nyang nafsu han soe linteueng

Meung ka mate nyan Buraksa  
Han lon awa laen ureueng  
Beuthat aneuk raja raya  
Bah that bala namiet ureueng

Lon ikot nyang poh Buraksa  
Bah that beu ka namiet ureueng  
Meunan narit putroe muda  
Ro ie mata bagoe ujeuen

Banta jawueb laju sigra  
Hai adekda bungong kareueng  
Bek susah le hai adekda  
Bah le hamba jinoe meutheuin

Keu putroe bah lon usaha  
Bak Buraksa bah le lon theun  
Jinoe putroe bek le susah  
Lon seuleuah bungong kareueng

Cut Bangsawan meunan kata  
Ate suka hana peue kheun  
Bit ceudah that panyot lampu  
Sang watee hu cahya buleuen

Pura-pura sang han ek bu  
Nyang nafsu beu ka leueh makeuen  
Alah hai boh tuba rasa  
Boh lada ngon boh beuraleuen

Meunyo geujok geupeutaba  
Pura-pûra han ek makeuen  
Meureubok di dalam cintra  
Jikua oh teuka eumpeuen

Watee hana tajak mita  
Han takira rangkam-rangkeum  
U gadeng deungon u jeumpa  
Nyang gura tapula di leuen

Bak han jitem teungeut mata  
Peue takira reudok ujeuen  
Bah that seupot glab gulita  
Sang-sang su cahya buleuen

Bah that reudok deungon kilat  
Tarakat laju tamakeuen  
Aib malee han soe ingat  
Meung ka nekmat mantong siseun

Cut Bangawan meunan rupa  
Beu that haba mita bayeuen  
Bah geupeugah meudeh meunoe  
Putroe nyoe gob nyan po takheun

Bajee ijo ija sutra  
Samarinda gura ureueng  
Teungoh-teungoh peugah haba  
Banta muda deungon cut meugleueng

Dilee lon jak dalam paya  
Sinan cut da theun beuriyeueng  
Teungoh lale peugah haba  
Dalam rimba meusu kareueng

Sang-sang reudok bade teuka  
Kayee raya reubah kengkeueng  
Ureueng gampong bandum rukha  
Sangat subra adoe aduen

Inong agam tuha muda  
Moe meua'a hana peue kheun  
Sira jiklep jimeuhei ma  
Nyang hei apa nyang hei keumuen

Alah hai po pakri daya  
Ka troh waba pajoh ureueng  
Ti Sairah putroe muda  
Ek u para laju kengkeueng

Deungon teuot ka jeuet geumpa  
Ngon ie mata lagee ujeuen  
Banta tanyong hai cut intan  
Sang ka padam han le buleuen

Nyang bunoe kon tapoh cakra  
Nyoel u para ka tatimpeung  
Pakon sabab putroe muda  
Bak kakanda cuba takheun

Putroe han le teuhah babah  
Banta indah tron bak rinyeueng  
Banta ingat nek raksasa  
Treh le guda keunan mameung

Cit ka hase ngon taloe jrat  
Banta peurab neuploh kuang  
Neupeurab le bak beujana  
Pak nyang raya get that talang

Ubak Jeungki banta ikat  
Cit ka jroh that hana peue kheun  
Ubak guda neuamanat  
Talumpat beujareueng-jareueng

Teungoh jijeb ie lam guci  
Hai Jeungki lumpat bumeutreung  
Guda seuot insya Allah  
Han lon ubah ban nyang neukheun

Lagee wasiet bak sulotan  
Beutajam neucang ngon peudeueng  
Hingga abeh dum amanat  
Puteh lumat neumat peudeueng

Buraksa pih teungoh jijak  
Peue meurumpok dum jimakeuen  
Kayee raya dum teureuban  
Patah meukhan tango kram-krum

Gunong buket kareueng batee  
Jeuet keu abee dum ka kengkeueng  
Aneuk raja sikureueng droe  
Dum sinaroe plueng lam uteuen

Dumna rakyat ngon pahlawan  
Jak som badan dalam reuleueng  
Beude lila dum meusipak  
Buraksa jak abeh kengkeueng

Raja sikureueng han peue peugah  
Ija basah rhom lam reuleueng  
Iek deungon ek dum meuruah  
Meuroh-roh bak ret oh jiplueng

Nyang bunoe kon sangat girang  
Oh jipandang lob lam reuleueng  
Hana sidroe nyang jeuet teuntang  
Rupa jih ban buket kareueng

Ngon on punyueng sang on birah  
Babah teuhah gigoe kengkeueng  
Mata tujoh idong tujoh  
Peue han tabloh lam-lam reuleueng

Teutap sinan aneuk raja  
Keu Buraksa jinoe lon kheun  
Buraksa troh bak meuligoe  
Sang bagoe gunong gle kareueng

Jipeurab le bak beujana  
Ie cit kana sinan mameung  
Jiminom le pantah sigra  
Sangat dahga hantu bajeueng

Teungoh jijeb ie lam guci  
Guda Jeungki lumpat meutreung  
Buraksa laju meuikat  
Pak taloe jrat cit ka meugleueng

Guda ijo lom jilumpat  
Maken kuat hana peue kheun  
Buraksa ka laju reubali  
Guda pantah bagai tupeuen

Nibak takue kong meuceukak  
Bangsawan grak laju peudeueng  
Ban jikalon peudeueng meugrak  
Takeupak Buraksa bajeueng

Teutap keunong nibak dada  
Ka teuhanta lagee bateueng  
Ka keuh mate nyan Buraksa  
Buet cut banta bungong kareueng

Neukoh idong deungon mata  
Taloepih ka lheueh meukuang  
Oh lheueh neusok idong mata  
Ek cong guda laju mameung

Lheueh nibak nyan banta indah  
Bak Sairah laju neukheun  
Wahe adek lon kugisa  
Tinggai gata bungong kareueng

Buraksa ka mate lon cang  
Lon kuriwang minta bayeuen  
Nyang upah lon bek tabri-bri  
Bek meuanji laen ureueng

Oh lon gisa jeuet lon langkah  
Beuka sudah le cut meugleueng  
Bek le payah kamoe tunggee  
Beutabri thee dalam mideuen

Upah kamoe cang Buraksa  
Bantai tika nyang meureubeueng  
Putroe seuot jikheun meunoe  
Neuba kamoe bungong kareueng

Bek neutinggai adek sinoe  
Mate kamoe dalam uteuen  
Bukon sayang bungong jeumpa  
Abeh mala oh tan ujeuen

Hai Tuanku bek neubungka  
Apon asa adek buleuen  
Bukon sayang meudang ara  
Jibungka dalam ie paseueng

Neuek keunoe hai meukuta  
Bantai tika ka lheueh meuleueng  
Aneuk siwah dong di cong u  
Jimeusu jilakeè eumpeuen

Neuek keunoe hai Tuanku  
Neupajoh bu dilee siseun  
Meunan narit putroe muda  
Jawueub banta meunoe neukheun

Hai adek cut kon lon bungka  
Sajan gata bungong kareueng  
Watee tangieng leumah nyata  
Oh tamita han meuteumeung

Lheueh neukheun nyan cut Bangsawan  
Leunyap hilang bungong seupeueng  
Siat gadoh han meuho ka  
Putroe muda teuka hireuen

Deundayang kheun e cut putroe  
Yo samlakoe e cut buleuen  
Ka teuntee yo e cut intan  
Bangawan nyang dilee geukheun

Meung han pane ek geusangka  
Buraksa nyan raya tuleueng  
Bah geupeugah meunoe meudeh  
Bek neupateh bungong kareueng

Nyo ban jikheun le si Unan  
Nyo biet meunan bungong seupeung  
Kadang ka troh keunoe teuka  
Kagisa laju seumeureueng

Sabab hana lom neuturi  
Hana tabri haba saleuem  
Si Unan kheun meunan bagoe  
Bak cut putroe kon na jikheun

Nyoepih meunan hai cut indah  
Lah na bagah neubri saleuem  
Adat han ka lheueh kagisa  
Troph Buraksa kakeuh bajeueng

Seuot putroe cut Sairah  
Kon beurakah si Unan kheun  
Nyoe pih hana lom troh jiwoe  
Dua uroe tan mubayeueung

Watee jiwoe bek tadhot-dhot  
Cit teumakot su lam uteuen  
Bek antara meung si Unan  
Gob laen nyan plueng seumeureueng

Meunan jikheun bungong mirah  
Sira kisah bungong seupeueng  
Sira jimoe ro ie mata  
Putroe muda meunoe jikheun

Bukon sayang bantai tika  
Pane gura meung tan ureueng  
Neutinggai lon dalam rimba  
E meukuta bungong kareueng

E Bangsawan teungku ampon  
Neutinggai lon dalam uteuen  
Bukon sayang bak sitahon  
Bungong lam on jareueng-jareueng

Neupeugah droe ureueng duson  
Keunoe neutron mita bayeuken  
Allah Allah hai ya Rabbi  
Saleh pakri bungong kareueng

Beutroh keunoe cut Bangsawan  
Bak lon tuan adek buleuen  
Meunan jikheun sira jimoe  
Lam meuligoe bungong kareueng

Ie mata ro hana reuda  
Basah ija sret lam lumueng  
Bukon sayang bungong jeumpa  
Abeh mala patah cabeueng

Teuduek siat putroe muda  
Laen haba jinoe lon kheun  
Bit ceudah that bungong labu  
Bungong meulu nyang get puteh

Ti Sairah ate rukha  
Sabab teungku neuwoe keudeh  
Bukon sayang leukat uno  
Rainoe pade peunileh

AMMA BAKDU e nyak sinoe  
Mangat that nyoe rabin dadeh  
Bukon sayang minyeuk ata  
Sideh jiba di nanggroe jeh

Nyoe lon peugah aneuk raja  
Dalam rimba jiplueng keudeh  
Raja sikureueng bek han meuri  
Lam lungkiek gle lob uroe jeh

Ban jikalon troh Buraksa  
Lam beuluka jilob keudeh  
Han le bunyoe su Baraksa  
Jikelua lam uteuen jeh

Ban sikureueng aneuk raja  
Bak astana jiwoe keudeh  
Bak meuligoe laju jiplueng  
Deungon peudeueng puteh-puteh

Oh ban jieu ka teuhanta  
Buraksa sinan ka teueh  
Jipeurab le ban sikureueng  
Labu padang ngon darah jeh

Jieu mata deungon idong  
Ka puntong bandum ka abeh  
Teuma jicang deungon peudeueng  
Mangat geukheun hanco abeh

Idong mata abeh hanco  
Peudeueng tajo takheun keudeh  
Jinoe laen tapeulaku  
Tadeungo ku wahe wareh

Asoe pha ngon asoe bibi  
Dan lagi ngon asoe beuteh  
Keudeh tame ubak raja  
Idong mata reumok abeh

Meunan takheun oh tariwang  
Bak sulton oh troh keudeh  
Keumah pakat sikalian  
Ka jireupang bangke teueh

Dayang kalon deungon putroe  
Lam meuligoe jikhem abeh  
Jikalon buet aneuk raja  
Jikeurija bangke teueh

Sira jikhem jikheun meunoe  
E cutda droe neukalon jeh  
Neueukeuh buet aneuk raja  
Leupah gura lam uroe jeh

Teubiet reuoh lam-lam mata  
Han jikira raja paleh  
Han jikira nyan keumalee  
Raja asee raja paleh

Meunan jikheun lam meuligoe  
Cula-caloe jikhem abeh  
Nyang ladom pluek kulet ulee  
Nyang lhak singkee deungon beuteh

Nyang sie bibi nyang lloh gigoe  
Nyang koh jaroe nibak teueh  
Lheueh nyan teuma jimupakat  
Jak taintat leugat keudeh

Aneuk raja laju riwang  
Sie meukarang puwoe keudeh  
Oh sare troh bak sulotan  
Cruh meulayang buet jaroe jeh

Maseng-maseng peungaduan  
Bak sulotan nyang that areh  
Seun-seun sidroe peuek ngadu  
Ubak teungku Kumiran jeh

Deungon jijok peuseumbahan  
Asoe badan asoe beuteh  
Ladom bibi ladom gigoe  
Ladom jaroe tuleueng gateh

Angkat jaroe le meulayang  
Buet lon Tuan Buraksa jeh  
Nyoe alamat po meukuta  
Idong mata reumok abeh

Sabab le that peudeueng beude  
Jeuet keureule mata nyang jeh  
Patek peugah han.lon bri cang  
Aneuk jalang han jipateh

Nyang jeuet idong hanco rata  
Deungon mata bandum abeh  
Maseng-maseng peuek ngadu  
Sangat karu lam kuta jeh

Sabe keudroe peuget dawa  
Seuot raja han lon pateh  
Taiem keudeh peue nyang subra  
Kon buet gata Buraksa jeh

Meunyo cit na tabri tanda  
Teuntee saja ulon pateh  
Meung hana nyan bek meutuah  
Hai banta jroh jak woe keudeh

Kon ka dilee cit lon peugah  
Ti Sairah jeunamee jeh  
Nyang lon lakee idong mata  
Tajak tawa tuleueng beuteh

Asoe bibi deungon gigoe  
Jak leh puwoe leugat keudeh  
Bek mubee di dalam kuta  
Jak peugisa dum beuabeh

Meung ek tabri nyang lon lakee  
Cit ka teuntee lon tem pateh  
Meunan neukheun poteuraja  
Malee raya di teungku jeh

Jiseuot teuma meunoe  
Nyang buet kamoe han neupateh  
Ureueng laen pat kuasa  
Buraksa nyang meugah abeh

Ingar beu seb po meukuta  
Janji toh ka dilee meudeh  
Oh lheueh meudeh takheun meunoe  
Bit gata nyoepih paleh

Meunoe jikheun aneuk raja  
Bandum gisa jiwoe keudeh  
Teuduek siat aneuk raja  
Lon peugisa Bangsawan jeh

Di lampoh geutajok nangla  
Geupula ngon teh mureh  
Oh lheueh mate nyan Buraksa  
Banta gisa neuwoe keudeh

Ubak teumpat nek raksasa  
Keu Buraksa neujak peujeh  
Abeh dumpeue neuhareutoe  
Po nek yue woe laju keudeh

Neupeusok le deungon bajee  
Muwoe lagee lom Unan jeh  
Gaki puree badan kude  
Jeungkang-jeungke lom ka meudeh

Idong tujoh bak Buraksa  
Tujoh mata sok bak pureh  
Neutijik le nibak pureh  
Laju neuwoe u nanggroe jeh

Unan tijik sijot baho  
Sang si linto bak woe keudeh  
Nyan jeunamee bungong keundo  
Dara baro nyang peureuseh

Bukon sayang bungong mancang  
Lam kunarang layee abeh  
Trok lam kuta Gamba Unan  
Tamong yoh nyan laju keudeh

Unan jime dalam kuta  
Di raja teukeujot abeh  
Pat kateumee arta nyan  
Wahe Unan nyang lon gaseh

Unan seuot pantah leugat  
Sideh meuhat di cong nireh  
Patek kalon jroh that gura  
Lon cok lanja bunoe sideh

Ateueh kayee di cong ranteng  
Sang meuleng-leng rupa meudeh  
Di Kumiran sang-sang teukhem  
Neupaleng u dalam binteh

Areuta nyoe di Buraksa  
Nyankeuh pha Sairah jeh  
Mata tujoh idong tujoh  
Nyoe baro troh lon eu meuceh

Jinoe putroe keunan kubri  
Bah meuseuki hina jaeh  
Soe ek puwoe nyang lon lakee  
Dalam juree jeh lon peueh

Bah that aneuk si keumade  
Keumeulintee kutueng meuceh  
Meunan narit po meukuta  
Dikeue banta sikureueng jeh

Jinoe teuntee keu si Unan  
Nyang laen han kutem pateh  
Meunan neukheun uleh raja  
Pucat muka sikureueng jeh

Jikheun laju hana patot  
Si Tham Peulob nyang geupateh  
Bit Kumiran tan bicara  
Malee hana raja paleh

Putroe geubri keu si Gamba  
Nyan si luka puree beuteh  
Han geupike uroe dudoe  
Ka malee droe raja paleh

Nyang geutanyoe aneuk raja  
Ngon Buraksa tapeuabeh  
Meung han geubri putroe muda  
That cilaka raja paleh

Padum payah bak tameucang  
Dalam blang ngon Buraksa jeh  
Jinoe putroe han le geubri  
Jak keumbali dilee keudeh

Nak geuingat uroe dudoe  
Tacok putroe ngon boh bareh  
Hingga bandum keumah pakat  
Geuwoe leugat laju keudeh

Meung bak raja han jipeuthee  
Sangat malee ate peudeh  
Ban sikureueng beungeh raya  
Meuseurapa sang beureuteh

Nyang ladom kheun raja asee  
Keu meulintee gutee paleh  
Gamba Unan peue kon gutee  
Sitak kayee geutem pateh

Soe peuek ie soe tob mutee  
Keu meulintee geuntueng meuceh  
Geutanyoe dum nyang meupangkat  
Deungon rakyat meuploh naleh

Geutem han tueng keumeulintee  
Meung kon lagee Unan paleh  
Meunan jikheun bandum rata  
Meuseurapa han ek pileh

Hingga teuma haba nyang rab  
Jiwoe leugat laju keudeh  
Ban sikureueng beungeh jithat  
Jimupakat han tom jieh

Dalam nanggroe rakyat jikrah  
Guda gajah bandum abeh  
Meuntroe wazi uleebalang  
Sikalian yue tren abeh

Leumbeng peudeueng cokma beusoe  
Sinaroe ngon beude puteh  
Jikheun raja jikeumeung prang  
Juhan Kumiran jikheun paleh

Hingga teuma haba nyang toe  
Rakyat nanggroe jitren abeh  
Wazi meuntroe uleebalang  
Sikalian bandum abeh

Cit ka hase ngon angkatan  
Meuriam na siploh lapeh  
Gura rumoh oh na pageue  
Gura luweue ija puteh

Teuduek siat nyang ka tabeue  
Nyoe lom ukeue keu teungku jeh  
Bukon sayang mirahpati  
Cicem nuri gura abeh

Aneuk raja siat nanti  
Nyoe lon rawi buet uroe jeh  
Pusong Idi lampu gisa  
Meucahya u Teupin Batee

**AMMA BAKDU** wahe syeedara  
Leubeh gura nibak dilee  
Haba hikayat wahe cutda  
Malam jula hana tathee

Jinoe laen lon calitra  
Bacut haba ulon lagee  
Haba peuingat bacut lon surat  
Meuah hai sabat bandum sampie

Oh geubangket geutanyoe lam jeurat  
Teudong bak teumpat miseue batee  
Nyawong goh na di dalam badan  
Na tamse ban gunggok kayee

Oh na nyawong ubak badan  
Teuma beujalan jak meuree-ree  
U blang mahsya bandum ka geuron  
Uroe tutong di ateueh ulee

Nyang tan amai nyang keubajikan  
Na tamse glang di dalam abee  
Nyang le amai di dalam badan  
Mupayong awan Allah peuteuntee

Uroe tarek reului han sapat  
Grah that rakyat han pat meusilee  
Han pat meungadu han pat seumeugah  
Raja ngon namiet han le meuteuntee

Yoh lam donya na muto sedan  
Uroe keumdian taeh lam abee  
Hana troh keudeh guda ngon kandran  
Meulainkan amalan nyang sah ileumee

Ingat-ingat wahe e teelan  
Bek jarak kandran yoh masa dilee  
Pubuet amai nyang suroh Tuhan  
Beuna tatunjang oh troh bak watee

Bek na tatinggai le seumbahyang  
Wahe intan po bungong keumbee  
Wajeb limong siuroe simalam  
Meung tinggai nyan deesya meuribee

Seumbahyang limong umpama tihang  
Ateueh nyan peudong rumoh meuteuntee  
Meutan tameh rumoh han teudong  
Meutan seumbahyang rugoe hai sampoe

Zike ikhlah lheueh seumbahyang  
Seureuta sajan do'a talakee  
Lakee ampon deesya bak Tuhan  
Nyang jahatan buet nyang dilee

Oh noe keuh bacut keu tanda mata  
Soe nyang baca meuah lon lakee  
Alah hai behi jeumpa puteh  
Payah abeh bak meuteumee

Jinoe kisah laen keudeh  
Keu putroe jeh bungong keumbee  
Oh lheueh mate nyan Buraksa  
Putroe gisa bak sot dilee

Oh troh keudeh dalam kuta  
Po teuraja geuwet-wet ulee  
Cit ka hase ngon angkatan  
Jak tueng intan bungong keumbee

Poteuraja heundak langkah  
Ti Sairah kawai teuntee  
Ka troh jiwoe putroe muda  
Bak ayahanda nyang panghulee

Han le payah raja teuka  
Ka troh gisa batee ulee  
Seumbah laju sinyak putroe  
Gaki jaroe jicom dilee

Lheueh nyan neuke u meuligoe  
Sinaroe rakyat meuribee  
Ladom nyang moe ladom nyang khem  
Nyং laen pih troh meuree-ree

Ladom jime ngon bu kulah  
Ladom lincah peusieng teubee  
Ladom wajeb ngon meuseukat  
Bu leukat ngon ie bu sagee

Maseng-maseng ban nyang babat  
Maseng pangkat maseng sukee  
Teutap sinan sinyak putroe  
Lam meuligoe bungong keumbee

Hingga teuma bak siuroe  
Raja nanggroe teuma teuntee  
Wahe aneuk nyang meutuah  
Hai Sairah nyang mangat bee

Soe nyang teuntee cang Buraksa  
Hai aneukda peugah bak kee  
Pane raja nyang sakeuti  
Na taturi bungong keumbee

Nyo aneuk raja sikureueng  
Cut meugleueng peugah beuteuntee  
Sabab hana troh alamat  
Puteh lumat batee ulee

Cit si Unan nyang na puwoe  
Hai aneuk droe keunoe bak kee  
Idong tujoh mata tujoh  
Unan bioh pakri lagee

Ti Sairah seuot laju  
Hai Tuanku nyang meuteuntee  
Sidroe ureueng hai meukuta  
Deungon guda cit meuteuntee

Ngon rupa jroh hana nyang sa  
Lon aneukda meuhei dilee  
Lon yue langkah u meuligoe  
Lon jok ngon droe hai panghulee

Geupeugah droe dalam rimba  
Jak mita bayeuen meulagee  
Geutueng upah ubak raja  
Yue mita bayeuen meuteuntee

Teuma lon kheun cit lon upah  
Paidah lon bri meuribee  
Meung ek mate nyan Buraksa  
Ban nyang suka keu lon lakee

Nyangkeuh gob nyan cang Buraksa  
Sikureueng raja gadoh intee  
Bak ate lon hai ayahanda  
Nyoe raja nyang geukheun dilee

Nyang sa marit ngon si Unan  
Aleh cit nyan di jih guree  
Na cit geukheun troh geulangkah  
Sabab upah goh lom teuntee

Teuma seuot poteu raja  
Pakon tanda han talakee  
Puwoe tanda cit si Unan  
Di lon cit nyan keu meulintee

Sabab ka lheueh lon meujanji  
Soe nyang ek bri nyang lon lakee  
Nyankeuh lakoe nyak digata  
Peue takira nyan keu puree

Peue nyang han ek digob payah  
Di jih mudah jipeulagee  
Peue takira gaki supak  
Oh jilinggak nyum meuribee

Teuma raja lom neupeutrang  
Kah hai Unan nyang meulintee  
Keupeue meugah laen raja  
Han kutuka meung ngon asee

Geubeue kameng bek le di kah  
Ti Sairah keu kah teuntee  
Unan seuot teuma meunoe  
Bak patek nyoe ka lheueh teuntee

Di meuligoe putroe indah  
Soe seumeurah ngon plah kayee  
Meudang puleh puree gaki  
Tuanku bri nyang phui dilee

Raja deungo laju neukhem  
Ho laen neupaleng ulee  
Le that akai bit si Unan  
Aleh cit nyan Bangawan teuntee

Poteu raja meunan pike  
Dalam ate hana teuntee  
Unan teutap lam meuligoe  
Sajan putroe bungong keumbee

Bak siuroe Gamba Unan  
Dalam nyan meuligoe teuntee  
Putroe gaseh hana nyang sa  
Beungoh sinja dalam juree

Hingga teuma bak siuroe  
Bak putroe si Unan teuntee  
E hai putroe panyot donya  
Pakon hana bak sot dilee

Bak meuligoe Padang Anta  
Ho saleh ka bungong keumbee  
Geukheun dilee troh Buraksa  
Jinoe ho ka cut panghulee

Payah lon jak eu putroe jroh  
Meuligoe soh nyan meuadee  
Sinyak putroe nyang sambinoe  
Bak masa nyoe jeh ka padee

Idong mata ka lheueh puwoe  
Ayah baroe peugah bak kee  
Lagee pih ka dilee janji  
Soe nyang ek bri nyang geulakee

Kah nyang puwoe idong mata  
Peue pareksa lom nibak kee  
Teuma seuot lom si Unan  
Arta nyan di cong kayee

Bak lon jak-jak deuh lon lihat  
Ka meulihat bak cabeueng kayee  
Teuma lon cok pantah sigra  
Ubak raja puwoe teuntee

Ngon sabab nyan putroe geubri  
Ka raseuki dalem puree  
Bit meutuah boh timon bruek  
Bak lon duek-duek na peureudee

Di gob payah gabiek-gabuek  
Di lon kuduek roh lam pangkee  
Dilikot moh timoh birah  
Oh reubah ka rioh asee

Sang muka han tajeuet peuhah  
Buet di ayah pakri lagee  
Meudang jeumpa cok keu lusong  
Bak murong peuget keu alee

Bit meutualu bungong tanjung  
Roh lagee phon dalam puree  
Ka lheueh janji lon ngon raja  
Lom ngon tanda cit geulakee

Ka ek lon bri tanda indah  
Bak gob keubah di cong kayee  
Peue paduli keu gob keubah  
Asai yue sah bak jaroe kee

Gamba Unan laju peugah  
Ti Sairah tob-tob ulee  
Bit meutuah kameng puteh  
Roh jijak eh di yub kayee

Ka lon jak eu keunoe keudeh  
Leumah puteh sinan lagee  
Teuma lon jak pantah lanja  
Lom deuh nyata di cong kayee

Laju lon cok me keu raja  
Putroe muda geubri keu kee  
Dumnan gaseh kameng dara  
Keu lon hamba gaki puree

Dumnan jikheun le si Gamba  
Putroe muda moe meuree-ree  
Seureuta ngon jikheun meunoe  
Bak ulon nyoe hana malee

Ka dumnan grak bak Tuhanku  
Ka ek lalu lon bak sitree  
Ek seulamat bak Buraksa  
Tan kukira laen dikee

Geukheun nyang ek lam calitra  
Poh Buraksa nyang meuteuntee  
Indra Bangsawan cit geupeugah  
Jan geulangkah lon tem teuntee

Cang Buraksa yue Bangsawan  
Ka geuriwang siat dilee  
Pajan-pajan troh geugisa  
Ka lheueh hamba janji teuntee

Di lampoh geupula lada  
Dalam paya timoh mampree  
Meunyo ka troh po areuta  
Cit ka jeumba bungong keumbee

Di cong ara aneuk tiong  
Di cong reumbong aneuk cagee  
Meunyo ka troh teungku ampon  
Nyang ulon gob nyan peulagee

Gamba Unan lom jiseuot  
Puyoh meulot tadeungo kee  
Riyoh di gle geumeurusa  
Dalam paya geutheun bubee

Adat nyang troh lom geuteuka  
Ngon tan tanda pakri lagee  
Janji idong deungan mata  
Ulee lon ba bak panghulee

Meung hana nyan pakri daya  
Cit ka jeumba dalam puree  
Bukon sayang mirahpati  
Jinari bak cabeueng kayee

Adat oh troh ek neuturi  
Neucuba ci peugah bak kee  
Putroe seuot teuntee saja  
Ka lon tanda masa dilee

Unan seuot pat neuturi  
Roh neubeunci droe neuh keu kee  
Mata saket pih ka puleh  
Ngon ubat jeh puwoe le kee

Lom Buraksa pih ka mate  
Pane ate lon pih puree  
Meunyo meunan bah le lon jak  
Nak bek rusak jibeudoh bee

Meunan jikheun le si Gamba  
Putroe muda moe meuree-ree  
Wahe Unan meung kabungka  
Lon nyoe saja mate dilee

Lon nyang gaseh that keugata  
Bah that luka bah that puree  
Ka padum treb sinoe sapat  
Pajan luat kaeu dikee

Meunyo kajak hai Unan droe  
Bak uroe nyoe lon ka seubee  
Meunan jikheun sinyak putroe  
Sira jimoe bungong keumbee

Hingga malam laju jula  
Bandum rata jak eh teuntee  
Han le geundrang ngon biola  
Seungap haba han le ratee

Beungoh uroe baro jaga  
Tron srah muka di po puree  
Bak weue kameng le geupeurab  
Le peurasat bungong keumbee

Bit ceudah that bak bungong ta  
Tapula bak ret simpang lhee  
Haba putroe siat reuda  
Aneuk raja lon peuteuntee

Cit ka hase ngon angkatan  
Meuriam meureutoh ribee  
Hingga teuma geubeurangkat  
Deungan rakyat maseng sukee

Sikureueng raja maseng rakyat  
Oh tahisab reutoh ribee  
Ret lam rimba jibeujalan  
Uroe malam hana jithee

Ate saket hana macam  
Kumiran jikeumeung seubee  
Padum buleuen jijak sabe  
Ret dalam gle kareue. ↗ batee

Hingga sampoe Padang Anta  
Bineh rimba piyoh dilee  
Peuget kimah maseng rata  
Raja-raja bak meusilee

Bak jiduek nyan jimupakat  
Peuget surat saboh dilee  
Taboh haba phon bumangat  
Tadeelat keu aneuk asee

Abeh pakat keumah janji  
Keurani jituleh dilee  
Lheueh jituleh ka jilipat  
Tiken ngon cap teuma dilee

Siploh meuntroe yue beurangkat  
Jak me surat keu panghulee  
Jibeudoh le wazi meuntroe  
Bak jaroe surat meuteuntee

Han padum treb teuma dudoe  
Ka sampoe lam kuta batee  
Kawai pinto le pareksa  
Pane gata peugah bak kee

Bek geuseukok beukah muka  
Peugah lanja kheun beuteuntee  
Jiseuot le pantah rijang  
Lon antosan bungong keumbee

Raja sikureueng bek han meuri  
Geuyue kami bak panghulee  
Jaga pinto jicok leugat  
Ubak deelat jijak bri thee

Ampon Tuanku syahi alam  
Antosan jeh pat meuteuntee  
Raja seuot neukheun meunoe  
Ka ba keunoe rijang bak kee

Antosan jitamong leugat  
Jiangkat jaroe bak ulee  
Raja neubri deungon teumpat  
Teuma surat jicok leugat

Raja sambot le u jaroe  
Ubak meuntroe neuyue peuteuntee  
Yoh nyan meuntroe geubeuet surat  
Di nab rakyat nyang meuribee

Meunoe haba dalam surat  
Sang boh langsat masak layee  
Bawha ini satu surat  
Bak deelat raja nyang teuntee

Bak kamoe raja sikureueng  
Saboh saleuem keu panghulee  
Nyang tinggai di dalam rimba  
Padang Anta diyub kayee

Meuhadap maha mulia  
Keu meukuta nyang that mubee  
Seumbah sujud lon keu duli  
Di yub gaki nyang panghulee

Seupeurti hai cut Sairah  
Pajan nikah kheun beuteuntee  
Meung ka meujan nak lon langkah  
Neupeugah wahe panghulee

Keu Buraksa bek meutuah  
Ka lheueh lon poh hai panghulee  
Pakon hana ban nyang janji  
Neukheun neubri putroe keukee

Teuma jinoe nyang lon harap  
Neuintat cut bungong keumbee  
Beu neucok le bak antosan  
Bungong karang nyang jeumba kee

Meutan meunoe han peue harap  
U dalam jeurat bah geuseubee  
Aneuk binoe toh kuikat  
Nyang rakyat kuboh teurajee

Rumoh kutet mon teuh kudhoe  
Wazi meuntroe dum kuseubee  
Inbat beuseb hai sultan  
Ulon tuan ka kapumalee

Kamoe nyoe dum cang Buraksa  
Si Gamba tueng keumeulintee  
Tan ube kheun gata raja  
Keu si Gamba tapeujeuet kee

Nyan keuh haba lon nyang teupat  
Pileh leugat tanyong teuntee  
Siploh uroe kubri tanggoh  
Bah meureugoh han ku malee

Mangat katuri raja sikureueng  
Sie kudayeueng di cong kayee  
Inbat beuseb raja payong  
Lakee tulong bak meulintee

Bak lon ingat han peue pike  
Meuhat reule jeuet keu abee  
Meunan haba dalam surat  
Muka pucat di panghulee

Neukheun laju bak antosan  
Jak kariwang aneuk asee  
Keudeh u blang singoh meuri  
Disinoe pih aneuk cagee

Agam cit ri lagee gata  
Peue kakira lon meualee  
Bah meugah raja sikureueng  
Lon han kutueng keumeulintee

Jimeujanji poh Buraksa  
Idong mata nyang lon lakee  
Meunyo na nyan ka troh janji  
Putroe lon bri keu jih teuntee

Nyoe asoe pha deungon baho  
Sang sie linto woe malam lhee  
Pakri lon bri putroe indah  
Lam birah tajak som ulee

Ban tadeungo su Buraksa  
Lam beuluka plueng meuree-ree  
Na cit putroe laen kubri  
Nyang gaki mirah bulee

Meunan kakheun oh ka gisa  
Ubak raja nyang haba kee  
Meunan narit di Kumiran  
Antosan jiwoe meuree-ree

Oh troh keudeh jipeuhaba  
Aneuk raja sangka seudee  
Oh jideungo meuntroe peugah  
Aloh alah sangat malee

Jimeuhei le ngon seurdadu  
Sangat karu hana lagee  
Jiteubiet le dum u padang  
Pahlawan nyang teuntee-teuntee

Cokma beusoe lom ngon peudeueng  
Ladom kengkeueng nyang ba alee  
Beungeh that raja sikureueng  
Sabab geukheun geubri asee

Jitarek le deungon alam  
Macam-macam rupa lagee  
Lam padang Anta Beuranta  
Meuriham ka lheueh jiadee

Ladom peudeueng ladom kapak  
Ladom tumbak ladom alee  
Tango riyoh oh jisurak  
Geureutak lagee su asee

Bukon sayang minyeuk ata  
Boh bak ija deungon bajee  
Taduek siat aneuk raja  
Lon peugisa keudeh lagee

Jak u haji tron u Jeudah  
Bloe kupiah ngon seureuban  
AMMA BAKDU nyak Laibah  
Ubat leupah kipi itam

Ureueng nyang eh bek tamaba  
Nyang jaga tayue meuhidang  
Nyoe lon peugah poteu raja  
Nyang ayahanda putroe intan

Rakyat nanggroe abeh neukrah  
Troph le bagah bak Kumiran  
Abeh jitron dumna rakyat  
Peuduek pakat meuntroe bujang

Jeueb-jeueb banda jeueb-jeueb duson  
Jeueb-jeueb gampong uleebalang  
Deungon alat dum beuhase  
Tumbak beude ngon meuriham

Cokma.beusoe deungon baci  
Ali-ali ngon seunampang  
Dum syik putik tuha muda  
Nyang ka mada jimat parang

Beuna alat dum seunjata  
Gajah guda sikalian  
Hingga teuma hana lambat  
Dumna rakyat abeh datang

Mideuen peunoh kuta sarat  
Timu barat dum ka datang  
Raja takluk pih ka teuka  
Ngon seunjata dum meuriam

Wazi meuntroe ngon peutua  
Laen raja sikalian  
Jak bak deelat dalam kuta  
Nyang lasyeuka tinggai di blang

Ban sare troh ubak deelat  
Ban nyang adat majeulih reusam  
Deungon jaroe le di angkat  
Ampon deelat syahi alam

Kamoe bandum ka troh sampie  
Jeueb-jeueb sagoe abeh datang  
Teuma jinoe hai tuanku  
Peue bu napsu peugah rijang

Siri laot nyang tan wase  
Toh siri gle nyang meusugang  
Siri putroe neumeuhate  
Neupeugah le wahe sulotan

Siri raja nyang kreueh gigoe  
Siri nanggroe neukeumeung prang  
Teuma seuot poteu raja  
Hei syeedara sikalian

Geutanyoe ka na peukara  
Sikureueng raja jipeuget prang  
Dum geutanyoe jipeuhabeh  
Jipeugleh sampoe bak pisang

Tatulong lon hei syeedara  
Tacok hamba oh seulintang  
Meung tan tulong nibak gata  
Lon jisula atueh pacang

Jinoe pakri toh nyang mangat  
Cuba ingat wahe rakan  
Tajeuet muprang atawa han  
Haba laman toh nyang reumbang

Teuma seuot dum na rakyat  
Ampon deelat syahi alam  
Bek le susah di tuanku  
Bek le karu hei sulotan

Bah meugah raja sikureueng  
Patek linteueng didalam blang  
Meunyo jiek jipeugajah  
Neueu mirah ie beurawang

Meunyo jiek jipeuguda  
Bumeutimpa neue kucang  
Nyang putroe pane lon bri ba  
Beuthat raja nyang pilehan

Meunggoh jitob le tanoh cak  
Bek pipak nama sulotan  
Meunan bandum jimeuhaba  
Di nap raja nyang Kumiran

Teuduek siat ureueng teuka  
Lon peugisa cut Bangsawan  
Nyang geuheui si Gamba Unan  
Nyang keuh gob nyan nyang pahlawan

Neuthee musoh le that teuka  
Dalam rimba neubeujalan  
Neuwoe keudeh ubak nek tu  
Bungong meulu cut Bangsawan

Oh troh keudeh po samlakoe  
Neuhareutoe peukara prang  
Ponek tanyong pantah sigra  
Pajan gisa hei buleuen trang

Banta seuot na ban siat  
Lon susah that hei nek badan  
Aneuk raja sikureueng droe  
Jiprang nanggroe nyang Kumiran

Jinoe pakri hei nek payong  
Pakri untong keu lon tuan  
Meunyo hana nek neutulong  
Cok mayet lon lam mideuen prang

Nibak malee bah le mate  
Bah meugule buet seunapang  
Hana guna lon udep le  
Aeb keuji ulon tuan

Alah hai nek that meusampe  
Bah le mate lon dalam prang  
Meunan narit po samlakoe  
Jawueub nek droe teuma nyoe ban

Nek raksasa seuot pantah  
Tulong Allah sidroe Tuhan  
Keu rakyat le bek tagundah  
Aneuk lidah na lon tuan

Guda ijo nan Hareujen  
Cit tan laen nyang analan  
Nyankeueh rakan bintang canden  
Puteh licen han soe teuntang

Laen bak nyan bungong giri  
Raja sakti nek nyang pulang  
Jan meunapsu hei aneukda  
Cit jiteuka raja mambang

Durin Suna nama sidroe  
Nyang adoe Suna Durin  
Jan meunapsu raja dua  
Neupoh bak pha pantah rijang

Cit teuka le ubak gata  
Tapeuhaba peue sukaan  
Nyoe laen lom teuma lon bri  
Jambui sakti nyang analan

Laen bak nyan han peue peugah  
keu cut indah ulon pulang  
Hase dumpeue sianika  
Meuah deesya banta seudang

Lakee idin bak raksasa  
Banta muda laju riwang  
Deungon guda nyang juhari  
keumbali nanggroe Kumiran

Oh troh keudeh banta piyoh  
Deungon musoh sajan-sajan  
Han jituri puteh lusoh  
Sabab utoh le sakeuti

Bukon sayang manok pupoh  
Geuheu taroh di geulanggang  
Teutap sinan banta pioh  
Ureueng musoh lon peugah ban

Manok jalak tameutajoe  
Nyang lawan droe cit kuantan  
Oh ban sare peukeumah droe  
Wazi meuntroe uleebalang

Jipeh tambo yub napiri  
Keucapi deungon hareudam  
Jijak santeut jroh meriti  
Han tatkri peugah macam

Nibak babah suleng bangsi  
Lom ngon nyanyi beursukaan  
Ngon jisurak ma teungku e  
Nyang peh tambo nyang peh geundrang

Raja sikureueng leupah cangklak  
Jipeuligak peudeueng panyang  
Jihei keunoe peue han kajak  
Nyang rancak lon keumeung pandang

Kumiran ngo meunan haba  
Seungkoe dada muka masam  
Teuma neukheun laju pantah  
Bak kapilah dum pahlawan

Teubiet jinoe bandum gata  
Musoh dua ka nyoe ho datang  
Tapeh geundrang laju bagah  
Bek sang tiwah han ta lawan

Ban jideungo haba raja  
Beudoh sigra cok seunampang  
Jiteubiet le dum seurdadu  
Sangat karu hana macam

Pahlawan nyang meugah-meugah  
Keumurah deungon meuriam  
Panglima prang tarek-tarek  
Peudeueng leuntek dum jireugam

Pahlawan nyang beuhe-beuhe  
Jitajo lagee boh seunggam  
Rot deh rot noe ka meuhadap  
Meuntroe jungkat tanyong nyoe ban

Meuntroe jungkat nyang keupala  
Blah rot raja nyang sembilan  
Nyan jimarit pantah han soe  
Jihareutoe meunoe macam

Na peue kamoe nak pareksa  
Na teuka keunoe Sulotan  
Meunyo hana soe keupala  
Nyang pareksa peugah rijang

Rakyat seuot teuma meunoe  
Adek kamoe peue salahan  
Lon geulantoe badi raja  
Nyang keupala jak dalam prang

Milon Sarah nama gob nyoe  
Bek peurunoe macam-macam  
Meungna nafsu keu jeurat baro  
Katajo keunoe beurijang

Meunyo hana jak leh gisa  
Bek meuhaba panyang kalam  
Meuntroe jungkat deungo meunan  
Peudeueng panyang jisuet rijang

Jicang ateueh Milon Sarah  
Jikilah pantah han macam  
Tajamjih that han peue peugah  
Bagoe siwah meulot di blang

Pinta sangat hana bagoe  
Ban dua droe that pahlawan  
Teuma rakyat han peue pike  
Pelheueh beude ngon meuriam

Soe nyang keunong laju mate  
Meugule sinan seulinteueng  
Top ngon tumbak tak ngon peudeueng  
Teugageueng sinan le ceukang

Nyang su beude bagoe tufeuken  
Sang-sang ujeuen han le pirang  
Su meuriam lagee reudok  
Meukeubok sideh dalam blang

Asap beude ka jeuet sagob  
Sang ka seupot teuka malam  
Ngonjisurak ma teungku beh  
Sang runtoh nanggroe Kumiran

Pahlawan dum utoh-utoh  
Han jipajok le meuriham  
Nyang ngon peudeueng nyang ngon baci  
Ladom udi ngon seunampang

Milon Sarah meuntroe jungkat  
Dua meuhat jimeuhantam  
Hana saho pi na tiwah  
Bandua blah aneuk agam

Masa nyan prang that kalang-kabut  
Uroe seupot han jituban  
Didalam blang sang ka seupot  
Meusagob-sagob asap meuriham

Rakyat mate dum mubulak  
Nyang rusak han ek tabilang  
Beukahulee teubiet utak  
Tangkurak nyang le mubangkang

Darah ile han peue peugah  
Sang-sang kuah gule bayam  
Meusu beude deungon peudeueng  
seumeureueng lam gunong itam

Nyang mat peudeueng nyang mat cak-coe  
Cokma beusoe nyang pahlawan  
Keunong jungka teulhoh gigoe  
Nyang teupipoe buet meuriham

Rot-deh rot-noe teuka bantu  
Hana kuyu bak jimeucang  
Le that mate dum seurdadu  
Sulu-sulu ban timon phang

Bukon sayang lon eu suwe  
Jirawe lam angen tajam  
Nyang udep jimuprang sabé  
Nyang mate sinan le ceukang

Pahlawan dum kuat-kuat  
Beusoe tungkat jipeulayang  
Uroe malam han jiingat  
Yakin jithat bak jimuprang

Nyang su beude han le meutum  
Meugrum-grum sang reuloh alam  
Su meuriam hana teudoh  
Taeu jicoh seun-seun lapan

Ladom leumbeng ladom tumbak  
Ladom kapak dum jireugam  
Watee jitob ka mupacak  
Watee jitak ka mubangkang

Ladom mate ladom rusak  
Darah ulak dum pahlawan  
Rot-deh rot-noe timang padra  
Pahlawan kha uleebalang

Beulah deh- beulah noe meujuara  
Dum panglima sangat girang  
Milon Sarah meuntroe jungkat  
Ka meuhadap dua urang

Geumeutob tak meudrob meuwa  
Sabe teuga aneuk agam  
Keunoe keudeh meuhue hila  
Tob ngon khanja tak ngon peudang

Teukeudi Po Tuhan Esa  
Ka binasa bungong karang  
Abeh langkah ngon raseuki  
Ka teukeudi grak bak Tuhan

Milon Sarah ka teukeudi  
Sinan janji didalam blang  
Keunong cokma mentroe jungkat  
Abeh hayat nyawong hilang

Dalam bumoe ka meuseubee  
Gaduh lagee abeh kalam  
Ka keuh mate nyang keupala  
Sangat suka urang datang

Ureueng musoh ate seuu  
Jicang laju hana reunggang  
Rakyat raja ate kuyu  
Meuntroe jieu ka seulintang

Abeh jiplueng ka jiguda  
Nyang lam kuta nyang lam hutan  
Urang musoh let meutaga  
Rakyat raja susah han ban

Sira jilet jikheun meunoe  
Bit asee nyoe sang kon agam  
Keupeue kaplueng teuma jinoe  
Jak eu binoe kah binatang

Pakri baroe sajan raja  
Rancak raya hana macam  
Meunan narit meuntroe jungkat  
Nyang rakyat laju teureujang

Nyang hana bee bungong riwat  
Nyang mangat that bungong rihan  
Rakyat nyang plueng teuduek siat  
Nyoe lon sambat keu sulotan

Ayah putroe pirak lipat  
Beungeh neuthat hana macam  
Neue jiplueng dumna rakyat  
Muka pucat di Kumiran

Neucok peudeueng mat bak jaroe  
Neuhei meuntroe ngon pahlawan  
Rakyat jiplueng dum neumarah  
Riwang bagah hai binatang

Keupeue kaplueng ho kalangkah  
Teusiakah han kalawan  
Han ka ingat nyankeuh malee  
Bah mate kee nyawong hilang

Riwang bandum keunoe pantah  
Nyang meugah kukeumeung pandang  
Rakyat deungo tuto raja  
Dum jigisa seukalian

U dalam blang dum jihala  
Lagee nyangka lom jimuprang  
Ngon baroekon leubeh lom nyoe  
Prang uroe nyoe that meuguncang

Mate guda deungon gajah  
Ladom patah buet meuriam  
Raja sikureueng sangat rancak  
Jipeulikak peudeueng panyang

Soe meureumpok ka jiseudoe  
Teulhoh gigoe dum pahlawan  
Rakyat raja gaduh ragoe  
Buet jaroe raja sembilan

Jeurat manyang keude Geureutoe  
Meataloe gampong Blang Asan  
Nyoe lon peugah bungong geutoe  
Samlakoe Indra Bangsawan

Neukalon prang sang ka tiwah  
Banta indah beudoh rijang  
Deungon guda Jeungki Ijo  
Bungong keundo neumasok prang

Neucok peudeueng mat u jaroe  
Guda ragoe le neupasang  
Dalam tantra guda lumpat  
Jitakat bandum pahlawan

Tunong baroh timu barat  
Bagoe kilat jiteureubang  
Jisipak dum ureueng musoh  
Bungong ipoh nyang jimeucang

Guda ijo tajam jithat  
Jilumpat u teungoh kawan  
Gaki pantah tajam kilat  
Keunong rakyat le that ceukang

Oh jisipak reumok asoe  
Ladom gigoe ka teureubang  
Keunong ulee reuloh jungka  
Nyang patah pha saboh macam

Guda lumput keudeh keunoe  
Pantah sang nyoe kilat beuklam  
Mate musoh that mubulak  
Guda sipak hana macam

Di Bangsawan neucang sabe  
Bagoe suwe didalam blang  
Jeungki Ijo pih pantah that  
Jilumpat u teungoh kawan

Deungon gaki laju meugrak  
That jisipak hana macam  
Le that mate guda sipak  
Darah ulak dum pahlawan

Nyang su peudeueng tango hat-hut  
Di jaroe ate nyak Bangsawan  
Sinoe nyang keunong laju teucrueb  
Nyawong teusuet tuboh ceukang

Rakyat raja ayah putroe  
Tahe keudroe keunan mandang  
Jikalon buet ureueng muda  
Lom ngon guda that analan

Jimeututo sabe keudroe  
That samlakoe ureueng datang  
Pane ureueng keunoe teuka  
Goh lom nyang ka ulon pandang

Geujak tulong dum geutanyoe  
Pajan keunoe troh geudatang  
Lom ngon guda that juhari  
Deungon gaki leupah tajam

Ladom seuot han lon turi  
Kadang duli syeedara nyan  
Dumna rakyat tahe keudroe  
Di samlakoe teungoh meucang

Ureueng musoh kalon laku  
Le that padu panglima prang  
Sabe keudroe jimeututo  
Guda ijo pajan datang

Nyang ka han tom ulon lihat  
Nyang jungkat sidumnan ureueng  
Ureueng misoh hate ragu  
Jiplueng laju panglima prang

Plueng u barat plueng u timu  
Han deueh jieu kubang-kubang  
Nyang lam uteuen nyang lam rimba  
Nyang lam kuta bak sulotan

Rakyat raja peujarak leugat  
Plueng meukarat ureueng datang  
Meuntroe jungkat nyang that rancak  
Guda sipak didalam blang

Nyang rakyat ka jiplueng jeuoh  
Lam geurugoh jak som badan  
Lam-lam uteuen lam-lam paloh  
Abeh jibloh lam beurawang

Ladom jikheun Allah hai beh  
Guda bioh pane datang  
Pha lon patah saleh pakri  
Keunong gaki guda suwang

Raja sikureueng deungo meunan  
Beungeh yoh nyan sang rimueng plueng  
Deungon meudhot that suara  
Jipareksa bak pahlawan

Pakon ka plueng hai cilaka  
tan seutia kah binatang  
han ka ingat keuguna kee  
Nyoe be ulee kupeusayang

Kubri ija kujok bajee  
Sarat dikee katem muprang  
Han kutupeue dumnoe balah  
Haram jadah biek teubusan

Raja sikureueng beungeh leupah  
Dum Jimarah macam-macam  
Rakyat seuot ampon deelat  
Sangat jungkat sidroe ureueng

Deungon guda pih utoh that  
Mate rakyat dum jiteundang  
Meuntroe jungkat hai tuanku  
Mayet lon eu ka seulintang

Kamoe laen muplueng laju  
Sabab lon eu Kubin ka tan  
Sayang rakyat le that mate  
Keunong gaki guda suwang

Han lon tusoe hai tuanku  
Han tom lon eu meunan macam  
Ateueh kandran jimeunari  
Sangat ahli bak jimeucang

Guda sipak han ek kheun kri  
Laen lagi nyang bet peudang  
Ureueng teuka wahe duli  
Han lon turi pajan datang

Rupa elok that samlakoe  
Han lon tusoe hai sulotan  
Jijimeucang bagoe ribot  
Lon teumakot hana macam

Ngon su peudeueng tango hat-hut  
Bagoe seunuet didalam blang  
Han lon turi si rimueng uet  
Saleh ho rot jih nyan datang

Nyang di guda pih that rancak  
Jisipak sangat that tajam  
Ladom mate ladom rusak  
Darah ulak han tatuan

Raja deungo rakyat peugah  
Beungeh leupah sang rimueng plueng  
jicok Peudeueng mat u jaroe  
Jihei meuntroe ngon pahlawan

Kalon jinoe buet jaroe kee  
Kumeung seubee nyang kakheun nyan  
Jinoe ho ka guda utoh  
Kukeumeung boh mata peudang

U dalam blang jijak ka troh  
Sangat riyoh hana macam  
Deungon rakyat dum meuree-ree  
Sabab malee ka talo prang

Peuget suwe koh bah bayu  
Jimeusu lam angen tajam  
Raja sikureueng teutap dulu  
Rakyat teungku lon peugah ban

Ureueng nanggroe Anta Beuranta  
Dalam kuta ka troh riwang  
Prang ka meunang ate galak  
Maseng dum jak bak sulotan

Kumiran kheun teuma meunoe  
Prang uroe nyoe pakri macam  
Meuntroe seuot ampon deelat  
Ngon beureukat syahi alam

Ureueng musoh bandum lari  
Wahe duli dalam uteuen  
Sidroe ureueng hai tuanku  
Goh lom lon eu meunan macam

Geujak bantu po meukuta  
Deungon guda that analan  
Sang hana deuh bak talihat  
Bagoe kilat sangat tajam

Jisipak le guda indah  
Han ek peugah musoh simpan  
Ateueh guda sidroe ureueng  
Deungon peudeueng leupah tajam

Ureueng musoh dum binasa  
Nyang buet guda nyang buet peudeueng  
Nyang ka han tom ulon lihat  
Hana sapat na mubayeueng

Nyankeuh ureueng muprang sidroe  
Han lon tusoe hai sulotan  
Kamoe laen tan keurija  
Kalon saja gobnyan muprang

Talo musoh gob nyan gadoh  
Nyan pih saboh patek hireuen  
Deungon guda han meuho le  
Ajeb ate dum sibarang

Wazi meuntroe ngon bentara  
Meunan haba bak sulutan  
Raja tanyong teuma dudoe  
Na tatusoe bungong karang

Pane gampong gob nyan sidroe  
Sangat ragoe ngon pahlawan  
Keu gata nyoe that geugaseh  
Pakri nyang jih han geusayang

Raja syuko keu Po tallah  
Alhamdulillah pujo Tuhan  
Keucubong di cong bak agu  
Leuk kutru di cong keutapang

Teutap dilee haba itu  
Laen laku lon peugah trang  
Bak ulee cut timoh riwat  
Bak ulee jeurat timoh jeumpa

Nyoe lon balek ujung ayat  
Mangat sahbat got tabaca  
Dileuen rumoh timoh giri  
Bak ulee jeungki kupula jawa

Haba hikayat han tatkri  
Maken lawi maken gura  
Nyoe na bacut wahe sahbat  
Ulon surat gantoe meucakra

La ila ha illallah  
Taloe nyang teugoh tamat le gata  
Nyankeuh tungkat atueh titi  
Bek meugule dalam neuraka

**Kalunah** nyan sampie di ate  
Beuteutap sabe didalam dada  
Jan kiamat uroe page  
Jak bak titi Allah peulara

Subhanallah Rabbul ibad  
Nyang balah taat deungon syureuga  
Azeueb peudeh keu si maksiat  
Neuraka neupeujeuet tujoh tangga

Tujoh boh pinto neuraka neupeujeuet  
Peunoh ngon azeueb mubagoe seksa  
Seperti teuseubot wahe teelan  
Peureuman Tuhan nyang that mulia

Wa inna jahannama lamau'iduhum ajmain, laha  
Sab'atu abwabin likulli babin minhum juz un maksum  
Pinto tujoh neuraka jahannam  
Tutong han ban han ek kira

Jeueb-jeueb pinto neujagaan  
Suroh Tuhan kawai neuraka  
Di pinto u pinto peurjalanan  
Tujoh reutoh thon lama masa

Bandum jarak jika beurjalan  
Luah pih meunan sama juga  
Maken sipinti tutong hana ban  
Karonya Tuhan meuganda-ganda

Apui donya tutong hana ban  
Leubeh lom jahannam tujoh ploh ganda  
Meunyo jiteubiet u donya bacut  
Abeh jiuet peue-peue nyang na

Abeh angoh dum sibarang  
Tanoh ngon kareueng jetuet keu sira  
Allah Tuhan poku Rabbi  
Dum umat Nabi beuampon desya

Neuraka tujoh tutong han sakri  
Deungo hai akhi ulon kheun nama  
Nyang phon-phon Jahannam nama geurasi  
Laza lagi teuma nyang dua

Saqar nyang keu lhee keu peuet Hutamah  
Keu limong nyang sah Jahim nama  
Nyang keu nam Sa'ir ingat beuceudah  
Tujoh Hawiah ka seumpurna

Ban tujoh nyan tutong han sakri  
Allahu Rabbi thee sibeuna  
Geusak keukayee bak uroe page  
Maksiat ngon kafe batee pi na

Jibeudoh ju bukon keuh le  
Kaom kafe keukai dalamnya  
Oh noe keuh sagai wahe e teelan  
Hana poh rantam bak lon sibanja

Nyokeuh nyang na lon tuan surat  
Peumeuah sahbat soe-soe nyang baca  
Tapak Tuan rab Meulaboh  
Lhok Susoh ka rab u Banda

Dalam kuta teungoh riyoh  
Le that ka troh laen tantra  
Meusu geundrang sangat kiroh  
Ureueng musoh le that teuka

Di ateueh gle buloh meurindu  
Tadeungo su leupah that gura  
Raja deungo geundrang meusu  
Rakyat karu dum ka subra

Nyang cok beude tarek peudeueng  
Ladom kengkeung baplueng lila  
Dum pahlawan beuhe-beuhe  
Jitajo lagee boh panta

Deungon rakyat meuploh ribee  
Ka teuntee maseng keupala  
Oh troh keudeh u dalam blang  
Jimeucang hana ban pula

Tob ngon leumbeng tak ngon peudeueng  
Keutam-keutum keunong jungka  
Beukah muka teuhah di rueng  
Ka teuganggeung le teuhanta

Nyang su beude ban le meutum  
Meugrum-grum lagee ie raya  
Su meuriam hana teudoh  
Sang guroh reudok keunong sa

Rakyat mate that mubalek  
Nyang rusak han ek takira  
Keunong leumbeng keunong kapak  
Sang geuleupak bruek lam raga

Pahlawan nyang rancak-rancak  
Jipeulikak cokma raya  
Panglima prang utoh-utoh  
Tango riyoh meujuara

Nyang di rakyat han peue pike  
Peulheueh beude han jikira  
Soe nyang keunong laju mate  
Meugule sinan teuhanta

Rot-deh rot-noe darah ile  
Le that mate dum meugisa  
Uroe nyan prang timang leupah  
Hana tiwah dua tantra

Keudeh keunoe hana pipak  
Sabe rancak dum beuntara  
Raja sikureueng saket ate  
Jipinta le saboh mantra

Teuka rimueng saboh kawan  
Ateueh lawan jiteureupa  
Rakyat jikab jiwiet takue  
Ka meuhue-hue dalam tantra

Hana meujan jikheun sapeue  
Han le takue putoh dua  
Rakyat raja meunyum susah  
Rimueng juah han ek sangga

Nyang le akai mita ilah  
Seun silangkah surot lanja  
Yoh masa nyan cut Bangsawan  
Dalam awan deungon guda

Neueu rakyat sangat susah  
Rimueng juah han ek sangka  
Neutron laju u dalam blang  
Cut Bangsawan deungon guda

Neutiek tungkat ateueh bumoe  
Suda beusoe dum meucula  
Suda teuglong sangat tajam  
Miseue pacang pageue kuta

Keunong rimueng bandum abeh  
Ka teueh didalam suda  
Suda bunoe teuma dudoe  
Jeuet keudroe tajam raya

Rakyat raja sikureueng droe  
Ka lam duroe dum seumua  
Abeh teutob jaroe gaki  
Kliek meu'i-'i sang bui luka

Raja sikureueng pih that utoh  
Jisampoh duroe meucula  
Deungon siat rakyat puleh  
Duroe paleh han meuho ka

Peulheueh beude lom jibareh  
Sang beureuteh aneuk nangla  
Rakyat keunong dum teueh-eh  
Keunong bareh keunong lila

Nyang di banta saboh macam  
Dalam awan baplueng guda  
Taeu gaki jiseumipak  
Teubiet utak dum meukeuba

Mate musoh dum mubulak  
Guda sipak peudeueng seuba  
Guda ijo lompat crat-cruet  
Bagoe seunuet peudeueng banta

Rusok mate han ek peugah  
Le that patah nyang buet guda  
Jeungki ijo nan hareujen  
Seunalen bak nek raksasa

Pantah jithat bagoe cicem  
Hareujen guda peurkasa  
Raja sikureueng muka ceuken  
Guda canden han ek sangga

Rakyat mate dum teugageung  
Patah tuleueng ngon patah pha  
Aneuk raja beuet hikeumat  
Trok leugat apui mila

Ateueh banta ka jipeurab  
Deuh neulihat teuma lanja  
Neucok ceumboi dalam jaroe  
Bak jaroe neuseumpom sigra

Na sikeujab teuka ujeuen  
Apui kureueng han le nyala  
Rakyat raja nyang sikureueng  
Abeh bandum lam ie raya

Ladom mate pruet ka cateueng  
Ladom jiplueng dalam rimba  
Le that mate sinan padée  
Gadoh lagee aneuk raja

Nyang na tinggai plueng jikajee  
Apit ulee salle ala  
Dum hikemat han le jikab  
Sangat azeub sakti banta

Nibak puleh lom maken that  
Bandum rakyat ka jiguda  
Raja sikureueng han ek pike  
U dalam gle plueng meutaga

Hikemat le jikheun han jeuet  
Jiseumeusep sare kubra  
Sira jiplueng jiceumarot  
That mupot-pot aneuk raja

U dalam gle dum meusak-sak  
Gadoh rancak han le haba  
Troh lam rimba ka jipiyoh  
Han le tuboh dum ka luka

Keunong duroe keunong kareueng  
Ban sikureueng sama juga  
Raja rakyat surak riyoh  
Jieu musoh ka jiguda

Ate mangat sangat manyoh  
Tango riyoh woe lam kuta  
Prang ka meunang talo musoh  
Bungong ipoh han meuho ka

Deungon guda han meuho le  
Rakyat pike azeub raya  
Ngon ie raya pih hana le  
Gadoh pike rakyat dumna

Rakyat bandum ka troh jiwoe  
Jak hareutoe ubak raja  
Oh troh keudeh beuet jaroe  
Ampon kamoe po meukuta

Prang ka meunang talo musoh  
Hai deelat beh ureueng muda  
Sangat azeub kamoe pandang  
Dalam padang troh ie raya

Rakyat musoh bandum mate  
Teutiek bangke lam ie raya  
Musoh gadoh ie hana le  
Gadoh pike oh takira

Deungon guda hai tuanku  
Jilalu ban kilat paja  
Gadoh sinan teuma laju  
Hai tuanku han meuho ka

Hana meunan ureueng datang  
That analan hana nyang sa  
Oh ban abeh musoh di blang  
Gob nyan hilang han meuho ka

Meunan haba rakyat peugah  
Teuhah babah po teuraja  
Neumarit le teuma pantah  
Lom neupeugah hai syeedara

Pane ureueng pat daerah  
Pane langkah bak takira  
Rakyat seuot tuanku droe  
Han tom kamoe kalon rupa

Nyang lagee nyan hai tuanku  
Goh lom lon eu hai meukuta  
Teuma raja neukheun meunoe  
Bak putroe tac i pareksa

Gamba Unan pat jih teutap  
Cuba leugat jak peunyata  
Bujang beudoh jijak sidroe  
U meuligoe putroe muda

Oh troh keudeh jitanyong proe  
Ubak putroe jipareksa  
E hai po cut nyang sambinoe  
Ulon teunyoe suroh raja

Neuyue tanyong le jonjongan  
Gamba Unan ho saleh ka  
Na tom jiwoe seulawet nyoe  
Bak kamoe neuyue pareksa

Putroe seuot han tom jiwoe  
Ka peuet uroe tan jigisa  
Kaem meunan di jih sabe  
Han ek pike keu si Gamba

Lagi pih nyoe na su beude  
Takot mate pat jigisa  
Kadang kameng pi na karu  
Sabab meusu beude lila

Teuntee gadoh jijak lihat  
Nyankeuh sabab bak lon kira  
Oh lon ingat hanco ate  
Oh lon pike keu si Gamba

Bu jih di pruet han paduli  
Ka peuet hari goh jigisa  
Watee lon tham han lon bri jak  
Droe jih galak bak geumbala

Watee meunoe jeuet keu susah  
Lon neumarah le ayahanda  
Sang-sang lon yue jak meurabe  
Jeueb luengkiek gle jimeuraba

Meunan jikheun sinyak putroe  
Bujang jiwoe ubak raja  
Oh troh keudeh jihareutoe  
Ban kheun putroe jipeuhaba

Po teuraja ka teupike  
Dalam ate yue si Gamba  
U lua hana neulahe  
Dalam ate poteuraja

Teutap raja dalam pike  
Bungong pade lon calitra  
Oh talo prang bungong keumbee  
Neusok bajee kude buta

Muwoe rupa kon ban dilee  
Gaki puree lagee nyang ka  
Gaki puree badan kude  
Ceungkhang ceungkhe geuwoe lanja

Dalam kuta si Unan woe  
Bak putroe Sairah muda  
Dong di yup moh klik meu'i'i  
Teupeh gaki meunan kata

Darah ile nibak puree  
Peugot lagee di cut banta  
Putroe deungo su ureueng moe  
Sang bunyoe su si Gamba

Neutanyong le peue nyan riox  
Jak beusunggoh dalam rimba  
Bek taingat meung bu di pruet  
Pat kajak cruep peuet uroe ka

Unan seuot peue paduli  
Ubat gaki na takira  
Nyang na jeuet bak yue meurabe  
Ubat kude han soe mita

Unan jiek pantah laju  
Jipajoh laju sigra  
Oh lheueh bu Unan sidroe  
Marit putroe jipareksa

Bak Unan putroe sudi  
Pakon gaki darah dum ka  
Pat kajak eh sabe di kah  
Bunoe ayah yue pareksa

Abeh kee-kee keunong marah  
Kareuna kah tan ka gisa  
Unan seuot kameng landok  
Meukeubok jijak let dara

Kameng seuiet ka jeuet keu kleuet  
Ka lon tiyeuep dalam rimba  
Dara saboh landok siploh  
Meureugoh landok beunggala

Bak lon peucrok bunoe u gle  
Teupeh gaki darah dum ka  
Lom ureueng plueng meuhah-meuhah  
Nyang let gajah nyang let rusa

Sinanpih lom lon rab bicah  
Lah na bagah lop lam rimba  
Nyangkeuh sabab jeuet treb lon woe  
Dalam nanggroepih that subra

Meunan narit Unan sidroe  
Seungap putroe han le haba  
Bit ceudah buloh peurindu  
Oh jimeusu le that rupa

Teiduek haba Unan teungku  
Musoh karu lon calitra  
U dalam gle ka teueng bayeueng  
Raja sikureueng ka lam rimba

Hingga teuma ka meusapat  
Duek mupakat lam beuluka  
Raja sikureueng tanyong padan  
Pakri jalan hai syeedara

Geutanyoe dum cit ka teuntee  
Meunalee leumah ulua  
Han ek lawan ureueng sidroe  
Sangat ragoe deungon guda

Pane ureueng jih nyan sidroe  
Han tom kamoe kalon rupa  
Jinoe pakri cuba pike  
Pakri hase dum na gata

Aneuk raja seuot meunoe  
Sang bagoe lon kalon rupa  
Sang nyo ureueng di yup kayee  
Nyang boh lagee ubat mata

Bak tanyoe bloe ubat dilee  
Di yup kayee saboh masa  
Sang nyo ureueng bak lon lihat  
Ureueng meukat ubat mata

Aneuk raja meunan kisah  
Teuntee sudah meunan haba  
Raja sikureueng lom kheun meunoe  
Pakri jinoe toh bicara

Di atueuh cot tajok pade  
Di atueuh gle tajok langla  
Dang-dang dong-dong pike syawe  
Teuringat le sidroe raja

Saboh meuntroe that juhari  
Ngon sakeuti meugah raya  
Dalam nanggroe Darman Jali  
That juhari meuntroe a'la

Meuntroe Sani nan geuuroh  
Hana saboh nyang ek sangga  
Jiduek nibak ujung nanggroe  
Jih meuntroe harapan raja

Meunyo ngon nyoe ek jiilah  
Beuthat meugah han jitaba  
Beuthat meugah deungon ragoe  
Oh jiampoe reuloh jungka

Bah tajak tueng meuntroe Sani  
Wase tabri bagi dua  
Meung ek talo ayah putroe  
Bupaloe ngon ureueng muda

Bah le tabri wase nanggroe  
Meung ek sampoe ban nyang hawa  
Aneuk raja bandum seuot  
Meunan patot bak lon kira

Meuntroe Sani cit geubileueng  
Han ek linteueng bandum raja  
Meunyo ngon nyan ek jiheumpah  
Gaduh ilah ureueng muda

Hingga keumah meunan pakat  
Beudoh leugat le jibungka  
U nanggroe Darman Jali  
Jipeureugi bandum raja

Oh troh keudeh jihareutoe  
Sikureueng droe aneuk raja  
Meuntroe Sani cit ka teuntee  
Cit jilakee nyang pareksa

Abeh bandum jihareutoe  
Sani meuntroe galak raya  
Keumah pakat sikalian  
Jibeurjalan deungon tantra

Dalam ate jih that seunang  
Teuntee meunang bak jikira  
Meuntroe sani teungoh jijak  
Geureutak han ek takira

Aneuk raja sikureueng droe  
Jipeujok droe bak beulaga  
Hai tuanku nyang that meugah  
Lon nyoe sudah talo gaza

Tulong kamoe hai deelat syah  
Neuseuleuah hai meukuta  
Harap sangat wahe duli  
Wase lon bri ban nyang hawa

Meung ek talo ayah putroe  
Sikureueng nanggroe droneuh raja  
Wase lon bri sikureueng nanggroe  
Cut putroe neubri keu hamba

Meuntroe Sani seuot pantah  
Putroe indah cit keu gata  
Lonkeuh nyang bri Ti Sairah  
Lon peunikah deungon gata

Soe nyang han bri taeu kucang  
Han kupandang walee raja  
Walee meugah deungon sakeuti  
Kutadi bek jan jihei ma

Padum-padum lon masok prang  
Han ek teuntang bandum raja  
Hana sidroe nyang soe padan  
Ulon tuan cit jipuja

Meunan jikheun Sanī pindoe  
Jiharap droe that kuasa  
Laju jijak rot lam uteuen  
Buket kareueng han jikira

Deungon rakyat sadum naleueng  
Sangat kengkeueng ngon seunjata  
Padum na trep jijak sabe  
Di ureueng gle jibloh rimba

Abeh uteuen leumah nanggroe  
Ka sampoe Anta Beuranta  
U dalam blang laju jijak  
That mubulak bala tantra

Gajah guda peudeueng kapak  
Leumbeng tumbak cokma raya  
Maseng-maseng peugot teumpat  
Bandum rakyat raja-raja

Bak duek raja meuntroe Sani  
Teumpat jibri nyang jroh rupa  
Raja sikureueng nyang peuindah  
Meuntroe meugah ngon peurkasa

Hase teumpat dum sinaroe  
Teuduek oh noe saboh leua  
Bukon sayang jumpa puteh  
Timoh sideh dalam kuta

Nyang ka teungeut ban dum jak eh  
Watee mureh baro jaga  
Leuek jikutru di cong kandeh  
Siwah paleh troh jiteuka

Kumiran raja nyang areh  
Haba keudehpih geuthee ka  
Di dalam blang le that musoh  
Nanggroe jeuoh meuntroe teuka

Yoh masa nyan lom ka susah  
Rakyat neukrah pantah sigra  
Neuhei waki deungon meuntroe  
Jeueb-jeueb nanggroe yue seuranta

Neuyue pangge raja taklok  
Musoh ka trok laen raja  
Hingga teuma haba nyang rab  
Waki leugat jak me haba

Han padum trep teuma dudoe  
Ka troh sampoe bala tantra  
Cit ka hase sikalian  
Seunampang peudeueng ngon khanja

Dalam kuta dum geupioh  
Jaga musoh nyang ban teuka  
Dalam paya bak teumiki  
Di pasi aron mubanja

Rakyat raja siat nanti  
Meuntroe Sani lon peugisa  
Beungoh uroe pagi hari  
Jiantri bandum lasyeuka

U dalam blang dum sipai  
Meuntroe Sani sama juga  
Peh ngon tambo yup napiri  
Keucapi geundrang biula

Jisurak ngon jimeunari  
Meuntroe Sani nyang keupala  
Raja sikurueng ireng sajan  
Pahlawan nyang teuga-teuga

Jigrop-grop jimeudeundang  
Sangat garang urang teuka  
Jisurak sangat meunguncang  
Sang karam Anta Beuranta

Rakyat raja nyang po nanggroe  
Nyanpih sampoe lam blang raya  
Meuhadap le dua pihak  
Meuntroe rancak meujuara

Tanyong manyong dua lhee krak  
Lheuehnyan meugrak jaroedua  
Peulheueh beude beuet kapak  
Leumbeng tumbak dum meucula

Ladom mate ladom rusak  
Darah ulak dum meukeuba  
Meuriam lila laju jicoh  
Alah hai beh that meutaga

Rakyat mate seun-seun siploh  
Seuneujoh han ek takira  
Meuntroe Sani nyang that utoh  
Jicang musoh han ban publa

Beukah muka teulhoh gigoe  
Prang that tanggoe nibak nyang ka  
Pahlawan sabé pahlawan  
Jikuran cokma meulila

Uroe nyan prang that meuhayak  
Tan na meugrak dua tantara  
Rusak mate that mubulak  
Leubeh rancak ureueng teuka

Jipeukek prang meuntroe Sani  
Jikap bibi jipet mata  
Baranggasoe han paduli  
That beurani meuntroe raja

Ureueng nanggroe han peue pike  
Peulheueh beude han le reuda  
Uroe malam jimeupake  
Darah ile ka jeuet paya

Raja sikureueng pih beungeh that  
Jikarat u teungoh laksa  
Saboh meuntroe blah sulotan  
That analan ngon peurkasa

Lam nanggroe nyan cit geuturi  
Ngon sakeuti hana ngon sa  
Di dalam prang cit geuujoe  
Baranggasoe gadoh bisa

Syam Sabi meuntroe analan  
Di Sulotan cit syeedara  
Uroe nyan prang nyang that meugah  
Meuntroe indah nyang keupala

Deungon Sani ka meuhadap  
Sangat cakap gob nyan dua  
Ban dua blah sabe maju  
Sangat karu lam blang raya

Syam Sabi meuntroe juhari  
Jipeunari cokma raya  
Han jipantang baranggari  
Bah meuseuki aneuk raja

Raja sikureueng han ek teuntang  
Leubeh garang meuntroe raja  
Syam Sabi leubeh that garang  
Rakyat neucang han ban publa

Meuntroe Sani teuma tanyong  
Hai nyak bungong pane gata  
Peue geuheu nan cuba peugah  
Pat dairah keunoe tahila

Lon eu carong leubeh rancak  
Kumeung sipak nibak muka  
Takheun laju haba sikrak  
Yoh goh kutak nibak jungka

Kadang sampoe karong wali  
Bek teukeudi atueuh gata  
Syam Sabi teuma jiseuot  
Deungon meudhot that suara

Nyoekueh ulon nyang Syam Sabi  
Na neuturi hai cilaka  
Di dalam prang cit geuujoe  
Baranggasoe han kutaba

Nyoekueh ulon nyang that garang  
Di dalam prang cit geupuja  
Baranggasoe han kupandang  
Taeu kucang beu meutimpa

Aneuk raja nyang sikureueng  
Eu kuteuntang putoh dua  
Gata soe nan kheun beuteupat  
Tan kulihat dilee nyang ka

Pajan keunoe tameulangkah  
Pat dairah nanggroe gata  
Meuntroe Sani seuot meunoe  
Cit uroe nyoe baro teuka

Darman Jali lon jeumeurang  
Nyang analan nyoekueh hamba  
Meuntroe Sani nyang meulakab  
Nyang meugah that jeuep-jeuep raja

Lam puprangan cit jituri  
Meuntroe Sani nyang peurkasa  
Meung ngon gata sang han timang  
Peunyum meunan bak lon kira

Ube nyang ka kumasok prang  
Han ek reumbang sabé padra  
Jinoe pakri katem taklok  
Yoh goh lom trok cokma raya

Meuntroe Sani han peue teuntee  
Cit ka jithee jeuep-jeuep raja  
Di lon mantong kupeuingat  
Saket mangat droeteuh rasa

Syam Sabi seuot le pantah  
Dum ruman kah kameng daya  
Ka kuto'oh han peue peugah  
Nak le upah peukreueh jungka

Kamoe sinoe han peue kiam  
Bandum agam bukon dara  
Bak gop meugah meuntroe Sani  
Bak kami bek tapeuhaba

Meuntroe Sani deungo meunan  
U tangan peudeueng jihila  
Jitak ateuéh meuntroe indah  
Jikilah bagoe cempala

Ban dua droe hana tiwah  
Sabe meugah ngon peurkasa  
Keudeh keunoe jimeurupah  
Sangat gagah ureueng dua

Dalam tantra jimeulet-let  
Rakyat areh kalon rupa  
Di rakyatpih han peue pike  
Peulheueh beude han jikira

Ngon meuriam laju jicoh  
Alah hai beh that meutaga  
Rakyat mate seun-seun siploh  
Prang meukucoh hana ngon sa

Nyang ladom tak deungan peudeueng  
Keutam keutum su bruek jungka  
Ladom jitop ladom jitak  
Ladom kapak ladom nuga

Nyang ladom top deungan leumbeng  
Ka mupateng dum meucula  
Nibak keuieng dum teuglong-glong  
Go leumbeng kong han ek hila

Jitop keunong nibak jidong  
Laju teugom ka mupula  
Keunong dada keunong di rueng  
Ka teugageueng le teuhanta

Rusak mate han ek bileueng  
Mirah naleueng lam blang raya  
Darah ile ban ie paseueng  
Mate ureueng dum meukeuba

Uroe nyan prang timang leupah  
Sangat gagah sabe padra  
Keudeh keunoe hana tiwah  
Sabe meugah meuntroe dua

Nyang su beude han le meutum  
Meugrum-grum sang ujeuen raya  
Su meuriam dum meugum-gum  
Ka'am ka'um nyang su lila

Bangke guda bangke gajah  
Jai sileupah dum meukeuba  
Dalam gampong bandum susah  
Sayang leupah aneuk dara

Uroe malam daok jimoe  
Sayang lakoe tan jigisa  
Ureueng laen han peue peugah  
Ija basah ro ie mata

Lakee tulong u bak Allah  
Beu leupah ladom syeedara  
Sabab musoh le that datang  
Di beulakang teungoh teuka

Jieu le that teuka musoh  
Nyang moe rioh aneuk dara  
Jiduek jidong jimoe bae  
Tingat judo lam prang raya

Jiploh ngon ok jitumbok droe  
Sayang lakoe tan meugisa  
Uroe malam prang han teudoh  
Ureueng musoh that peurkasa

Meusu peudeueng deungon cakcoe  
Dalam nanggroe sang jeuet geumpa  
Di sulotan pih that karu  
Neuyue bantu nyan syeedara

Sabab neueue ka lhee uroe  
Hana sidroe pih meugisa  
Nyang su beude hana teudoh  
Meugeurupoh nyang su nila

Rakyat mate ma teungku beh  
Meureutoh ploh han ek kira  
Meuntroe Sani ka beungeh that  
Bantu le that jieu rupa

Jicipta le saboh sakti  
Nyang juhari tujoh naga  
Ateueh musoh dum jipeurab  
Jiuet rakyat nanggroe raja

Syam Sabi teuma jilihat  
Taloe jeurat laju jicipta  
Naga tujoh ka meuikat  
Ka keurawat bandum seureupha

Sani kalon naga mate  
Saket ate hana tara  
Jicok tanoh saboh reugam  
Dalam awan jigeulawa

Na sikeujab ujeuen datang  
Didalam blang jeuet ie raya  
Rakyat sabe bandum jicron  
Abeh jiron gajah guda

U dalam ie abeh hanyot  
Han le bak sot beude lila  
Rakyat musoh ka jisurak  
Jilikak-likak atueh rueng guda

Syam Sabi ka beungeh leupah  
Cok kupiah di keupala  
U dalam ie jisrom pantah  
Padang luah han meuho ka

Ngon ie raya pih hana le  
Puleh sare rakyat dumna  
Ka muwoe ban miseue dilee  
Padang Anta han meuho ka

Rakyat Sani bandum hilang  
Deungon padang han le nyata  
Meuntroe Sani tinggai sidroe  
Sinaroe hana meuho ka

Ka jeuet keu gle deungon paloh  
Bandum musoh ka lam rimba  
Meuntroe Sani muwoe u blang  
Jieu rakan sidroe hana

Gadoh ingat Sani meuntroe  
Rakan sidroe han meuho ka  
Trok lhee uroe sabe meunan  
Sani sinan lam beuluka

Sani yoh nyan ka teuingat  
Jihikeumat meuntroe raja  
Jicok tungkat nibak jaroe  
Bak meuwoe jiseumpom sigra

Gadoh rimba muwoe padang  
Sikalian deungon tantra  
Ka meusapat deungon meuntroe  
Peudeueng cak-coe meusuara

Jimuprang lom miseue dilee  
Hana jithee uroe jula  
Syam Sabi nyang sangat lisek  
Lom jibalek bandum tantra

Ladom unoed lalom cangat  
Jikab rakyat musoh teuka  
Ureueng musoh leupah urat  
Unoed le that kab lam mata

Nyang lawan tan le meung sidroe  
Bandum unoed jieu teuka  
Ureueng musoh leupah arat  
Han jitupat jak som muka

Ladom nyang lob dalam naleueng  
Unoed jirueng jikab lanja  
Le that mate bak unoed kab  
Siblah rakyat meuntroe teuka

Ladom nyang kliek lakee bantu  
Pat ka karu unoed cilaka  
Meuntroe Sani hana that pueh  
Sabab musoh hana nyata

Nyankeuh rakyat nyang that riyoh  
Alah hai boh pakri daya  
Ladom nyang lob uyub naleueng  
Seulinteueng reubah mupula

Leumbeng peudeueng hana le pueh  
Ka seb gadoh deungon biasa  
Nyang blah musoh le that mate  
Unoed sabe kab lam mata

Dun pahlawan gadoh rancak  
Leumbeng kapak jigeulawa  
Meuntroe Sani teuma peurab  
Unoed le that jieu rupa

Jieu hana sidroe musoh  
Unoë biyoh sangat that bahra  
Rakyat manoe dum meureutoh  
Unoë buboh di keupala

Rakyat mate jeueb-jeueb lampoh  
Nyang lam iboh nyang lam paya  
Meuntroe Sani sangat hireuen  
Raja sumbang le jicinta

Deungon siat keunan sampie  
Sani meuntroe le pareksa  
Wahe adek bungong karang  
Ulon tuan susah raya

Pakon musoh hana sidroe  
Sinaroe unoë meugunca  
Raja sumbang le peugah kri  
Leubeh sakeuti meuntroe raja

Nyankeuh unoë bandum rakyat  
Ka meuhat jibalek rupa  
Raja sumbang laju puleh  
Unoë jih puwoe ban nyang ka

Manusia ka meuriwang  
Lom jimuprang miseue nyang ka  
Raja sumbang jipeujeuet droe  
Tok beuragoe siwah raja

Syam Sabi jimeung publoe  
Tok beuragoe utoh raja  
Laju jiboh ngon hikeumat  
Gadöh ingat meuntroe raja

Hana neutuho bungong uroë  
Jiboh taloe na ube pha  
Bukon sayang bungon panjoe  
Angen tampoe u antara

Syam Sabi muda samlakoe  
Prang uroe nyoe ka binasa  
Bukon sayang bungong pade  
Abeh reule lam ie raya

Syam Sabi ka jiboh rante  
Jibapo le dalam rimba  
Oh troh keudeh jitiek leugat  
Lam rimba that le beuluka

Raja sumbang laju jiwoe  
Ka sampoe ban hajat pinta  
Syam Sabi ka tinggai sidroe  
Po samlakoe keunong mintra

Dalam uroe sinan pangsan  
Bukon sayang po jroh rupa  
Neutinggai didalam blang  
Jimeucang ngon musoh teuka

Meuntroe Sabi hana neuthee  
Keunong tipee siwah raja  
U dalam gle jiboh euntee  
Putik jambee geuleuntie ba

Oh hana le po samlakoe  
Sani pindoe sangat suka  
Meuntroe Sani sangat garang  
Rakyat jicang dum meukeuba

Ngonjisurak sangat riyoh  
Ureueng musoh meujuara  
Rakyat raja ka meunyum gli  
Meuntroe Sani that angkara

Syam Sabi oh tan le di blang  
Rakyat pandang ate lia  
Rakyat raja ka jisurot  
U likot laju jigisa

Dalam ate that teumakot  
Bacut-bacut surot lanja  
Badan kuyu ateji gli  
Syam Sabi hana meuho ka

Rakyat raja laju jiplueng  
Langkah jareueng le jimita  
Maseng-maseng peusiblah droe  
Ladom nyang woe dalam kuta

Ureueng musoh laju karat  
Jirapat bak kuta raja  
Kumiran ka meunyum susah  
Neutron pantah bale rakna

Rakyat nyang woe ladom peugah  
He deelat po meukuta  
Nyak Syam Sabi ka hana le  
Saleh mate lam blang raya

Hana le deuh kamoe lihat  
Bak meunyum brat ka binasa  
Ureueng musoh hai tuanku  
nyoe ho laju ka rab kuta

Raja deungo haba meunan  
Sret le mufram ngon ie mata  
Neucok peudeueng mat u jaroe  
Neuteubiet droe dalam tantra

Seureuta ngon wazi meuntroe  
Sinaroe pahlawan teuga  
Ti Sairah lam meuligoe  
Laju jimoe ro ie mata

Sabab jieu teungku ayah  
Ka leupah dalam prang raya  
Yoh masa nyan aloh-alah  
Ti Sairah jimoe rukha

Jimeulakee jileueng jaroe  
Bek mupalbe nyan ayahanda  
Beu neutulong hai ya Rabbi  
Bek neubri ayah binasa

Allah-allah ya Tuhan  
Beutroh bantu laju sigra  
Sira jimoe bungong giri  
Ubak Rabbi jimupinta

Ia mata ro hana sakri  
Sairah ti jimeunaza  
Nyang mangat bee ukheue usi  
Ureueng tari dum jak mita

Teuduek haba keu putroe ti  
Lon peugah kri banta indra  
Keucubong di cong bak asan  
Cicem subang di cong buga

Po banta cut dalam awan  
Jeungki sajan neutron lanja  
Neukalon prang sangka tiwah  
Bungong mirah beungeh raya

Neusuet peudeueng mat u jaroe  
Guda ragoe lumpat lanja  
Dalam kawan lumpat meucret  
Sang seunuet peudeueng cut banta

Rakyat raja nyang sikureueng  
Le that cateueng lam blang raya  
Meuntroe Sani laju lihat  
Beungeh jithat hana ngon sa

Ateueh banta ka jikarat  
Ngon raya that jimeusuara  
Wahe ureueng muda jungkat  
Tan kulihat baroe gata

Pajan keunoe tabeurangkat  
Kheun beu teupat laju sigra  
Pane gampong deungon nanggroe  
Namateuh soe nyak di gata

Umu gata muda seudang  
Sangat alang bak lon kira  
Nyang got jinoe jak leh tawoe  
Bek mupaloe atueuh gata

Ulontueh nyoe meuntroe Sani  
Cit jituri jeuep-jeuep raja  
Jarak nanggroe lon peureugi  
Darman Jali nyang teupuja

Lon meuhajat tueng putroe ti  
Lon keumeung bri keu aneuk raja  
Di gata nyak peue na hajat  
Peugah leugat nak lon mita

Banta seuot neukheun meunoe  
Bit asee nyoe sang ka gila  
Ti Sairah judo kamoe  
Pakon kah nyoe meung jak hila

Masa geucok yoh geupeusak  
Pakon seungkak han taraba  
Pakon talob uyub bateueng  
Bek leumah rueng bak Buraksa

Jinoe pakon tajak reupah  
Nyang upah lon cang Buraksa  
Nyankeuh ulon nyang Bangsawan  
Lon ceumeurang Kubat mata

Cang Buraksa lon keuh nyang sah  
Nyang lhab darah sikureueng raja  
Nyang got jinoe jak keumbali  
Bek teukeudi hai beulaga

Putroe laen jeuet kamoe bri  
Tan sipai kawai rusa  
Ti Sairah meunyo kacok  
Kuseukok bek jan kahei ma

Meuntroe Sani deungo meunan  
U tangan tungkat jihila  
Jiseupot le nibak bumoe  
Teubiet le nyoe apui mila

Ateueh banta laju jililet  
Bungong ruseb tarek ija  
Saputangan dalam reugam  
Neusiram ngon mawo atra

Apui gadoh siat padam  
Meuntroe suwang lom jimintra  
Banta muda bungong meulu  
Saboh lampu le tacinta

Lampu teudong dalam padang  
Meujeureulang peungeuh raya  
Sagob bunoe yohnyan hilang  
Ka beundeurang ngon lampu banta

Ureueng nanggroe tahe mandang  
Sang peurasan lam blang raya  
Cut Bangsawan nyang that lisek  
Lom neutarek sikrak ija

Saputangan dalam reugam  
Neureutek ban siseun lingka  
Bee that harum sang keusturi  
Meuntroe Sani pangsan sigra

Meuntroe Sani laju reubah  
Banta indah tron cong guda  
Neucok taloe laju bagah  
Meuntroe meugah neuboh singkla

Neuboh taloe ban teurajee  
Hana jithee meuntroe raja  
Ban taikat jaroe gaki  
Neugari ret likot guda

Oh lheueh neudrob meuntroe Sani  
Neucari sikureueng raja  
Tunong baroh neupeureugi  
Guda ahli neupoh lawa

Keudeh keunoe guda lumpat  
Meuhadap sikureueng raja  
Raja sikureueng deuh jilihah  
Yo meutat-tat hana tara

Jieu meuntroe ka meukat  
Aneuk deelat ka jeuet geumpa  
Bangsawan grak laju peudeueng  
Raja sikureueng le pareksa

Wahe ureueng muda seudang  
Ulon tuan na peue haba  
Soe bu nama gata sidroe  
Pane nanggroe keunoe teuka

Cuba peugah ubak kamoe  
Uroe nyoe lon turi gata  
Kadang-kadang nyawong abeh  
Kheun beugleh soe nan ayahanda

Banta seuot neukheun teupat  
Nanggroe Kubat teumpat hamba  
Nyankeuh aneuk Indra Bungsu  
Meusyeuhu Bangsawan Indra

Aduen kamoe nan Syahparai  
Nyang juhari cang geureuda  
Nyang busu bleuet dalam reugam  
Nyo lon tuan Bangsawan Indra

Pakri jinoe tameuhajat  
Kheun beuteupat bek le haba  
Raja sikureueng teuma seuot  
Leumbah-leumbot ngon suara

Meunyo meunan tuan putroe  
Sujud kamoe ubak gata  
Meunggata Indra Bangsawan  
Lon tuan taklok bak gata

Han lon turi bungong karang  
Ulon tuan seupot mata  
Jiangkat le deungon jaroe  
Ampon kamoe wahe raja

Jinoe ampon hei deelat syah  
Buet ka salah hei meukuta  
Cut Bangsawan seuot meunoe  
Bak kamoe meuah deesya

Jipeurab le dum sinaroe  
Samlakoe jipeumulia  
Raja sikureueng com bak gaki  
Horeumat jibri uleh banta

Meuntroe Sani pih jitaklok  
Droe jipeujok bak cut banta  
Jihei ampon hai tuanku  
Buet ka lalu bek neukira

Kamoe ikot hei deelat syah  
Ho nyang langkah po meukuta  
Lahe baten nyang ka leupah  
Neupeumeuah wahe raja

Banta seuot insya Allah  
Ka lon leupah cut ngon raya  
Tapi jinoe ulon peugah  
Jarak langkah siat hamba

Uroe dudoe troh lon riwang  
Beu ek sajan lon ngon gata  
Teuma jinoe wahe sahbat  
Woe u teumpat bandum gata

Kadang peue-peue na meularat  
Sabab treb that ka teuhala  
Uroe dudoe jeuet lon peusan  
Sikalian nyang syeedara

Abeh dumpeue geuhareutoe  
Mumat jaroe laju gisa  
Meuntroe Sanipih laju woe  
U nanggroe droe dilee nyang ka

Raja sikureuengpih jiriwang  
Didalam blang tinggai banda  
Tinggai sidroe cut Bangsawan  
Laen rakan ka jigisa

Han le pake prang ka teudoh  
Bungong ipoh pasang guda  
Dalam hawa neuteureubang  
Rakyat pandang azeb raya

Soe nyang kalon tahe mandang  
Siat hilang han meuho ka  
Bandum ureueng teukap jaroe  
Hana meusoe ka lam migia

Prang pih han le nyan ka teudoh  
Ureueng musoh ka jigisa  
Rakyat raja pih laju woe  
Hingga sampoe dalam kuta

Troh bak raja jibet jaroe  
Jihareutoe laju sigra  
Jipeugah buet po samlakoe  
Teukap jaroe po teuraja

Raja deungo tahe mandang  
Teuka hiran dalam dada  
Neutanyong le laju rijang  
Ho beurjalan nyang jinoe ka

Oh meuteumee na taturi  
Ban lagee hi taeu rupa  
Barangkaban barangkari  
Ulon turi ka lon tanda

Raja neukheun wahe rakan  
Sikarang tajak peunyata  
Cuba mita dalam peukan  
Beurijang tajak peuhaba

Kadang cit nyo cut Bangsawan  
Soe ek tuban aneuk raja  
Meunyo teuntee nyo Bangsawan  
Bak lon tuan beutroh haba

Meunan neukheun le sulotan  
Bak rakan neuyue pareksa  
Beureugom dong di cong reuhat  
Jiragab le siwah raja

Teuduek oh noe dilee siat  
Jaroe kuweuet hai syeedara  
Nyoé nā bacut lon tuan surat  
Beujeuet keu ubat soe-soe nyang baca

Ihwal syurga bacut lon surat  
Pumeuah sahbat bandum syeedara  
Alhamdulillahi Rabbil Alamin  
Ureueng nyang mukmin tamong syurga

Syurga neupeujeuet uleh hadarat  
Na lapan pangkat bandum simua  
Syurga nyang phon Darul Jalal  
Darus Salam syurga kedua

Jannatul Makwa nama nyang keulhee  
Jannatul Khuldi nyang keupeuet teuma  
Nyang keulimong Jannatun Naimi  
Jannatul Firdausi nyang keunam nyata

Darul Qarar keutujoh teelan  
Jannatu Adnin keulapan teuma  
Ihwal syurga sangat luasan  
Linteueng ngon panyang han ek soe kira

Syurga teuseubut saboh habaran  
Deungo e rakan ulon peuhaba  
Sireutoh deurajat dum sikalian  
Allah Tuhan nyang karonya

Deurajat keu deurajat peurjalanan  
Limong reutoh thon lama masa  
Beurmacam-macam keu seunangan  
Didalam nyan nikmat meuganda

Dum boh kayee didalam nyan  
Lazat han ban jati rasa  
Padum-padum krueng disinan  
got that bangon yub astana

Krueng dadeh arak na sinan  
Krueng minoman seudap rasa  
Krueng madu deungon krueng laban  
Lazat han ban asoe syurga

Seupeurti ban peureuman Tuhan  
dalam Kuruan nyang that mulia  
Kaannahunnal yaqutu wal marjan  
Meunan Tuhan neubeurkata

Lam syurga lazat pandangan  
Le that didalam aneuk dara  
Budiadari dum didalam  
Ceudah han ban cantek that rupa

Na teuseubut dalam Kuruan  
Wahe teelan nyoe tabaca  
Fiha mala ainun raat wa la uzunun  
Samiat wa la khatara ala qalbi basyar

Padum le nekmat beurmacam-macam  
Han tom takalon di dalam donya  
Bandum neubri le hadarat  
Keusoe nyang taat amalan jiba

Keusoe nyang ikot peurintah Tuhan  
Sikalian hamba takua  
Keusoe nyang sunggoh le balasan  
Soe le amalan le that pahala

Meuteumeu dudoe nekmat Tuhan  
Nyang larang han jikeurija  
Teumpat indah nekmat neubri  
Murah that Rabbi gaseh keu hamba

Subhanallah Rabbul Ghafo  
Nekmat neuhambo dum keu hamba  
Rahmat Tuhan han le neusom  
Dum sikalian dalam syureuga

Nekmat dudoe khusus meuteuntee  
Kafe han le jiteumee rasa  
Pinto syureuga bukon le indah  
Sangat ceudah lazat that mata

Asoe di dalam budiadari  
Ceudah han sakri tan bandeng rupa  
Tuhan neupeujeuet budiadari  
Nibak kasturi tanoh amba

Taek u gle takoh bak geutoe  
Kulet tapuwoe ngon talhab ija  
Tuhan neupeujeuet asoe meuligoe  
Hak sidroe tujoh ploh dua

Khem teuseungeh ngon leumah gigoe  
Hu sinaroe limpah that cahya  
Wareuna meuuke peukayan diasoe  
Ceudah that han soe aneuk syureuga

Dalam meuligoe nyan dara baro  
Mata bak pinto preh-preh woe gata  
Paleuet neutheun nyan ie mata ro  
Neulakee linto beu rijang teuka

Kaso ka teuleueng bantai meuato  
Teuduek judo preh-preh woe gata  
Wahe e wareh rakan ngon sahbat  
Soe na hajat nekmat syureuga

Meungna meunasu bek le tahe  
Beudoh le laju amai jak mita  
Pubuet beu yakin niet beu teupat  
Pubuet ibadat beu seumporeuna

Dudoe meuteumeung pahla balasan  
Nyang keubajikan amai sijahtra  
Sepkeuh oh noe wahe e rakan  
Nibak lon tuan gantoe meucakra

Teuduek oh noe dilee siat  
Meuwoe seunurat Bangsawan Indra  
Cicem beureukiek buleejih kureng  
Cicem peureuleng nyang mirah mata

Jinoe lon kisah wahe e cut da  
Leubeh that gura nibak nyang ka-ka  
Seureuta ayat ulon peumireng  
Meulaen-laen bak ujong banja

Aneuk jampok di cong bak pala  
Aneuk meurua jilop lam tapeh  
Teduek siat haba keu raja  
Ulon peugisa keu cut banta jeh

Udalam hawa laju teureubang  
Ka troh datang ubak nanggroe jeh  
U bak nek Tu nyang raksasa  
Cut banta ka sampie keudeh

Tren cong guda cut Bangsawan  
Seumbah rijang bak teuot nekjih  
Po nek tanyong pantah rijang  
Keu pasai prang bak nanggroe jeh

Yoh nyan banta neupeugah le  
Neurawe seun-seun silapeh  
Di awai fon sampie akhe  
Bungong pade kheun dum meuceh

Hana bacutpih na silap  
Khem raya that di po nek jeh  
padum na trep teutap sinan  
Nibak nek nyan nyang that areh

Teuma banta neulakee droe  
Lon keumeung woe hai nek keudeh  
Po nek seuot idin kamoe  
Jak woe jinoe bungong nireh

Cut Bangsawan laju gisa  
Deungon guda nyang that areh  
Sok ngon bajee nyang sakeuti  
Ka tari lagee uroe jeh

Gamba Unan meuwoe lagi  
Puree gaki ngon kudejih  
Kon le rupa cut Bangsawan  
Neuteureubang leugat keudeh

Banta neutren di dalam blang  
Neuyue riwang guda areh  
Tinggai sidroe bungong karang  
Neuriwang dalam kuta jeh

Ka jeuet rupa gamba Unan  
Bak cut Sani neuwoe keudeh  
Si Unan ek u meuligoe  
Marit putroe nyang peureuseh

Putroe tanyong yoh nyan leugat  
Jisasat bak Unan jeh  
Unan han tom kamoe lihat  
Lam rimba pat ka tajak eh

Jiseuot le leupah cakap  
Meukurab kameng inong jeh  
Sabab gadoh lon boh ubat  
Nyankeuh sabab jeuet treb sideh

Dalam nanggroepih that rioh  
Lon ngo musoh jimubareh  
Han lon jeuet woe bungong ipoh  
Lam geurugoh sabe lon eh

Putroe deungo sang-sang teukhem  
Sabab kaem jimeurinteh  
Nyang utoh that tok beuragoe  
Jigeurudoe kayee abeh

Teiduek haba Unan sidroe  
Raja nanggroe ulon peujeh  
Marit raja bak siuroe  
Neupeugah proe bak bujang jeh

Neuyue jak tueng sinyak putroe  
Nyang aneuk droe bungong puteh  
Bujang beudoh jijak leugat  
Deungan siat ka troh keudeh

Oh troh keunan jikheun teupat  
Suroh deelat jikheun meuceh  
Ampon po cut bungong riwat  
Neuwoe siat dilee keudeh

Deungon kamoe jinoe sajan  
Sulotan meunan neupeujeuet  
Putroe beudoh neutron leugat  
Beurangkat sajan bujang jeh

Oh troh keudeh dalam kuta  
Com ayahanda bak teuot jeh  
Raja sambot po mulia  
E aneukda bungong puteh

Bu meutuah mubahgia  
Ka troh gisa bungong nireh  
Neiduek le rab peurmaisuri  
Raja nanggri tanyong meuceh

Neutanyong le po teuraja  
Neupareksa bak cut puteh  
wahe aneuk putroe muda  
Si Gamba pat tayue jak eh

Pakon tayue jak meurabe  
U dalam gle sabé keudeh  
Pakon tabri kameng jiba  
Hai aneukda han tapateh

Han neutakot malee keuji  
Lon ngon cut ti gob kheun paleh  
Ka lon peugah masa dilee  
Bungong keumbee beu tapateh

Cit ka lon tueng keumeulintee  
Dalam juree beu tapeueh  
Han neupateh bungong keumbee  
Masa dilee ka lon peujeh

Jeuheuet nama gata ngon kee  
Meulintee geubeue kameng jeh  
Beu tadeungo wahe bulueun  
Lagee lon kheun beu tapateh

Adak han mee lam keurajeuen  
Bek lam uteuen sideh jieh  
Nyankeuh aneuk lon peuingat  
Puteh lumat nyang lon gaseh

Tapeulara ngon tapapah  
Aja teugah hai cut puteh  
Soe tube thee buet di Allah  
Hina meugah meuri keudeh

Meunan neukheun po teuraja  
Aneuk dara jawueb meudeh  
Putroe seuot deelat ampon  
Tadeungo lon kheun beu meuceh

Geubeue kameng ka lon suroh  
Droe jisunggoh jijak keudeh  
Jeuet tuanku neupareksa  
Bek sangka han neupateh

Yoh nyan putroe hei si Gamba  
Troh le teuka po kude jeh  
Neumarit le pantah sigra  
Ngon si Gamba nyang that areh

Gubeue kameng pajan kuyue  
Uroe peue nyang na meutangkeh  
Unan seuot pantah han soe  
Lon suka droe hai cut puteh

Adat neutham di lon kujak  
Sabab galak keu kameng puteh  
Meukon galak lon geumeubeue  
Pane lam weue lon jak tem eh

Sabab kameng le gob suka  
Nyang jeuet hamba han lon pateh  
Hana salah po cut ampon  
Nyo salah lon e cut puteh

Raja seuot neukheun meunoe  
Bandua nyoe han kupateh  
Bandua gata that sulet  
Janji ka seb bunoe sideh

Teuma lom jinoe ulon peugah  
Bandua kah beu kapateh  
Kubri hukom bandua kah  
Hai Sairah bungong nireh

Seuot putroe bungong meulu  
Hai tuanku lon tem pateh  
Ban nyang napsu patek ikot  
Han lon surot nibak ureh

Kheundak Tuhan bah lon pakri  
Buet di Rabbi neugrak sideh  
Meunan narit cut putroe ti  
Raja duli lom kheun meudeh

Bak si Gamba raja Sudi  
Di kah pakri katem pateh  
Unan seuot cit hana kri  
Ho nyang cut ti keunan lon eh

Yoh nyan putroe hukom neubri  
Neuheui kali bri hukum jih  
Deungon siat troh peurgi  
Teungku kali nyang that areh

Mubri saleuem mumat jaroe  
Raja nanggroe neupeugah jeh  
Wahe teungku guree kamoe  
Hukom jinoe neubri keudeh

Si Gamba deungon putroe ti  
Jinoe pakrii guree areh  
Teungku tanyong laju pantah  
Neuisyarah laju keudeh

Teungku tanyong jeuep-jeuep jalan  
Jawueub intan bungong puteh  
Putroe seuot jeuet barang ban  
Bak kamoe tan meunoe meudeh

Ban nyang hukom lon rilaan  
Hana jalan ulon langgeh  
Rila kamoe ban dua droe  
Ban suka droe áu nyang areh

Yoh nyan kali neupeuhaba  
Ubak raja neukheun meuceh  
Neuyue peuget geudong glab  
Ngon siat ka hase binteh

Lam beujana cit ka hase  
Dua bate nyang peureuseh  
Saboh bate meuh mubhak-bhak  
Saboh pirak ceudah abeh

Lam peunjara neuyue bawak  
Meuh ngon pirak bandua jeh  
Deungon alat cawan pingan  
Ngon peunuman bantai tika eh

Teuma laen dum makanan  
Miseue madu deungon dadeh  
Sinyak putroe didalam nyan  
Bandua ngon si Unan jeh

Nyang laen han jeuet rab keunan  
Raja sinan yue boh ureh  
Pinto geutob gunci sajan  
Didalam dua ureueng eh

Lingka geudong dum sipai  
Kawai cut ti nyang peureuseh  
Sabab raja neukeumeung uji  
Buet jih pakri si IJnan jeh

Teutap putroe lam peunjara  
Bandua ngon si Gamba jeh  
Uroe seupot malam laju  
Putroe bungsu teuma jak eh

Poh dua blah hingga sampie  
Teungeuet putroe lam tika eh  
Unan kalon putroe pangsan  
Gatai badan kude paleh

Peurab laju bak peunyala  
Keubah ija bandum abeh  
Si Unan suet bajee kude  
Cahya muble that peureuseh

Muwoe rupa cut Bangasawan  
Peungeueh bandrang lam bielek jeh  
Konle rupa Gamba Unan  
That budiman ilok pareh

Oh lheueh manoe neumeusalen  
Bungong husen lom neujak eh  
Ubak gaki sinyak putroe  
Rupa muwoe lom Unan jeh

Seureuta ngon peulara droe  
Bek mupaloe buet nyang meudeh  
Deungon tulong Tuhan sidroe  
Bungong geutoe han meulangkeh

Hingga beungoh le ngon uroe  
Jaga putroe lam tika eh  
Jak srah muka Sairah Ti  
Bak batee ie peurab keudeh

Putroe kalon lam peunyala  
Ie dum hana sudah abeh  
Teuka hireuen sinyak putroe  
Pakon sampie ie dum abeh

Pane ureueng saleh manoe  
Lam bilek nyoe dua ku eh  
Ate sangsi putroe muda  
Dalam dada teuka seudeh

Sabab gunci na u lúa  
Soe meuraba aneuk paleh  
Meunan leumah dalam ate  
Bungong pade susah abeh

Ate susah hana macam  
Saleh waham di cut puteh  
Kadang cit gob tamong keunoe  
Lheueh jimanoe jijak keudeh

Ie hana le pat lon manoe  
Pakri jinoe sang ka paleh  
Nyang get jinoe lon jak peugah  
Ubak ayah leugat keudeh

Lheueh jipike putroe muda  
Ureueng jaga jihei meuceh  
Wahe teungku nyang di lúa  
Keu hamba beuna neugaseh

Buka pinto dilee siat  
Kamoe hajat meung jak keudeh  
Ubak ayah nyang sulotan  
Na habaran meugriet abeh

Ban jideungo putroe peugah  
Buka pantah le pinto jeh  
Putroe muda teubiet bagah  
Woe bak ayah leugat keudeh

Raja kalon woe aneukda  
Neupareksa laju abeh  
E hai putroe Ti Sairah  
Peue na susah bungong puteh

Pakon rijang that tateubiet  
Peue na meugriet lam bilek jeh  
Seuot putroe nyang sambinoe  
Ie lon manoe dum ka abeh

Pinto teutop lom meugurici  
Dan lagi lingka ureueng eh  
Ie bandum tho lam peunyala  
Hai meukuta soe peuhabeh

Kadang ureueng eh di lua  
Oh jula jitamong keudeh  
Nyum sang meunan hai meukuta  
Lon aneukda susah abeh

Seuot raja bek tagundah  
Hai meuh mirah nyang lon gaseh  
Wahe aneuk Ti Sairah  
Bek that susah bah beuabeh

Jeuet hai aneuk lon yue gantoe  
Gata tawoe jinoe keudeh  
Tapi bacut lon peuingat  
Puteh lumat beutapateh

Euntreuk malam putroe muda  
Pura-pura teungeuet taeh  
Tacuba eu hai Si Gamba  
Ayahanda teujalok habeh

Kadang-kadang le peurasat  
Teujalok that lon cut puteh  
Kadang watee teungeut gata  
Laen rupa si Unan jeh

Kadang aneuk jimanoe lom  
Bungong neuprom bah beuabeh  
Putroe deungo kheun ayahanda  
Neuwoe lanja bak bilek jeh

Uroe seupot teuka seunja  
Malam jula putroe jieh  
Peuteungeuet droe putroe muda  
Lagee haba baroe sideh

Jisemeungo bagoe pot-pot  
Puyoh meulot lam tika eh  
Unan deungo putroe teungeuet  
Badan tiet-tiet po puree jeh

Jibeudoh duek sinan sidroe  
Jipeh jaroe bak tika eh  
Unan jikheun le that pijet  
Di kab saket asoe peudeh

Dalam ate dalem Gamba  
Mantong jaga putroe nyang eh  
Teiduek oh noe dilee siat  
Nyoe lon surat laen hai akhi

Nyoe na bacut ulon surat  
Wahe sahbat bumangat ate  
Bek that laloe wahe sahbat  
Ingat lam jeurat watee mate

Donya tinggai bandum hei teelan  
Hana sajan u dalam bumi  
Nyang na saja amai gata  
Nyang bahgia dan nyang keuji

Oh watee troh dalam kubu  
Troh le laju Munkar wa Nakir  
Nibak mayet geukheun meunoe  
Surat jinoe buet barangkari

Yoh didonya masa dilee  
Hana malee amai nyang keuji  
Jinoe kasurat got ngon jeuheat  
Saket mangat kapeumeuri

Seuot mayet ngon peue lon surat  
Hana daweuet nibak kami  
Kalampih han keureutahpih tan  
Toh keuh padan neupeugah kri

Malaikat jawaueb pantah  
Neupeugah bak ulon mate  
Nyan keureutah ija kafan  
Nyankeuh kalam aneuk jari

Ie babah kacok keu daweuet  
Ija kafan jeuet keureutah safi  
Kacriek bacut nibak kafan  
Surat yoh nyan bek le lanti

Mayet surat amai nyang goi  
Oh troh jeuheuet han jadeh le  
Amai nyang jeuheuet keumeung han surat  
Kheun Malaikat ka neudhot le

Kah that salah masa dilee  
Pakon malee masa ini  
Neusuet cokma le Malaikat  
Geukeumeung seupot mayet asi

Seuot mayet neupreh dilee  
Ulon malee hana sakri  
Jinoe lon surat bandum abeh  
Peue nyang sideh buet di kami

Oh lheueh abeh geusurat  
Teuma neuikat nibak lihe  
Munkar wa Nakir teuma lon sueue  
Sang geulanteue su han sabe

Teubiet apui dalam babah  
Meujeureulah hana sakri  
Dua gob nyan cit that jungkat  
Raya tungkat nibak beusi

Saboh-saboh raya tungkat  
Jakalee meusapat asoe bumi  
Han ek tagrak tungkat gob nyan  
Kuasa Tuhan Rabbul jali.

Teuma geusueue su pih meudhot  
Mayet teukeujot meututo ate  
Lom teukeujot yo meutat-tat  
Tuleueng urat nyum ka ragi

Teuma geusueue yoh masa nyan  
Toh keuh Tuhan deungon Nabi  
Mayet seuot yoh masa nyan  
Droe neuh Tuhan deungon Nabi

Lom geuseueue man rabbuka  
Madinuka wahe asi  
Mayet lom lagee sot  
Lom geuseupot hana khali

Lom geusueue meuturot-turot  
Mayet seuot tan kuturi  
Dua gata nyan po tallah  
Bek le neupoh ulon ini

Lheueh nyan jigrueb uleh bumoe  
Dumna asoe abeh cre-bre  
Teuma geupeulheueh uleue ngon kala  
Binatang bisa nyang lam bumi

Bui ngon asee abeh keunan  
Bak mayet dum ka hase  
Abeh jipajoh dumna asoe  
Ulat sinaroe dum meuriti

Pinto neuraka lom geupeuhah  
Meujeureulah hana sakri  
Nyan ka kalon seksa Tuhan  
Bek dilee han ikot Nabi

Wahe adek bungong langsat  
Beudoh teebat bek lale le  
Adak tajak timu barat  
Tahareukat han kaya le

Nasib kah oh noe wahe rakan  
Keu ulon tuan bek upat caci  
Nyang got neupuwoe nyang brok neubuang  
Wahe abang bek weueh ate

Jinoe muwoe lom ubak sot  
Bak putroe got lam tika eh  
Tuan putroe panyot ceulot  
Unan peugot neutupeue abeh

Dua lhee go jipeh tika  
Hana jaga cut putroe eh  
Gamba Unan suet le bajee  
Muwoe lagee Bangsawan jeh

Rupa jroh that sang buleuen trang  
Peungeueh bandrang han bilek jeh  
Cut putroe nyang eh peurasat  
Yo meutat-tat lam tika eh

Oh jikalon laen lagee  
Rab ratee cut bungong puteh  
Putroe peurab jicok bajee  
Jisom dilee yub tika eh

Oh lheueh jisom sarong banta  
Putroe muda lom jijak eh  
Sinyak putroe jieh laju  
Bungong meulu nyang peureuseh

Dalam ate sangat ragu  
Ka tunu jieu teungku jeh  
Adat jeuet jiteugom jiwa  
Dum nan suka abeh-abeh

Ingat malee ek jisaba  
Bak ayahanda geuthee keudeh  
Dalam ate meunan kira  
Bek binasa buet nyang meudeh

Jimeulakee ubak Rabbi  
Bungong giri nyang that areh  
Ya Tuhan ku po di kamoe  
Bak malam nyoe beuseuliseh

Bek neubri roh buet nyang keuji  
Ya Rabbi beuthat neugaseh  
Hingga putroe jieh laju  
Seumeungo su ban poh-poh jeh

Cut Bangsawan pih lheueh manoe  
Meusalen droe bungong puteh  
Sok siluweue deungon bajee  
Bungong keumbee ceudah abeh

Lom neupeurab ubak bajee  
Nyang puree lagee kude jeh  
Banta kalon han meuho ka  
Ka neumita keunoe keudeh

Jeueb-jeueb sagoe ka neuraba  
Han meuho ka bajee paleh  
Han meuho le bajee budok  
Bak kutumpok bunoe sideh

Susah ate bungong teuprom  
Han jeuet meusom ban uroe jeh  
Neumeung tanyong ubak putroe  
Samlakoe sang malee abeh

Ti Sairah buleuen peunoh  
Kalon meh-moh di teungku jeh  
Putroe ingat dalam dada  
Nyoe nyang teuka dilee keudeh

Nyankeuh gob nyan cang Buraksa  
Peue han tanda geuba keudeh  
Geupeugah dilee mita bayeuen  
Meunan geukheun dilee sideh

Lheueh nyan putroe jigeuriwat  
Peue karu that teungoh gob eh  
Nyan sa di gob teungeut mata  
Malam jula ka rab mureh

Banta seuot han le bajee  
Lon sak dilee yub tika eh  
Seuot putroe pajan tasak  
Meusawak sinan bak binteh

Cut Bangsawan han le haba  
Ka neugisa keue lam binteh  
Putroe beudoh teuma lanja  
Pura-pura haba meudeh

Pat ka jieh Gamba Unan  
Bunoe sinan lon eu teueh  
Le sagoe toh ka jijak pet  
ureueng sulet han mupateh

Sinyak putroe beudoh leugat  
Ka jipeurab bak teungku jeh  
Putroe kheun le teuma meunoe  
Ampon kamoe bungong puteh

Neupeungeut lon padum masa  
E meukuta ilok pareh  
Putroe jieh dalam leumueng  
Hana jikheun meunoe meudeh

Hai tuanku bungong uroe  
Keu lon adoe beule gaseh  
Pat bu gampong deungon nanggroe  
Nama neusoe cuba peujeh

Soe nan ayah deungon ibu  
Neukheun teungku meung silapeh  
Ube teupat tuanku droe  
Kheun bak adoe nyang that jaeh

Pakon jeuet roh bak neubungka  
Hai meukuta bungong nireh  
Cuba peugah hai kakanda  
Asai mula neukheun abeh

Sinyak putroe jimoel bae  
Ie mata ro ban ban ujeuen jeh  
Dalam leumueng teungku linto  
Jimoel bae rukha abeh

Teuma seuot Cut Bangsawan  
Bungong karang deungo beugleh  
Nama lon nyoe Gamba Unan  
Beuklam sinan lagi lon eh

Pakon han le lon taturi  
Pakon beuncu bungong puteh  
Pajan masa nyang ka meunoe.  
Keu kamoe han le neugaseh

Nyang baroe kon cut sambinoe  
Keu kamoe leubeh neugaseh  
Jinoe pakon putroe muda  
Taseurapa teungoh lon eh

Pakon sabab bungong meulu  
Tapeukaru teungoh lon eh  
Meunyo meunan bungong keundo  
Buka pinto nak jak keudeh

Lon meung jak eh barang kapat  
Teungeuet lon that hai cut puteh  
Putroe deungo narit teungku  
Sangat tunu lam ate jeh

Lom ka Jimoe sinyak putroe  
E samlakoe bungong puteh  
Hai teungku cut bungong uroe  
Keu ion hai adoe han neugaseh

Lon kheun meudeh neukheun meunoe  
Pihak kamoe ureueng jaeh  
hai teungku cut deelat ampon  
Neupeuengeut lon bungong nireh

Neupeugah droe ureueng duson  
Keunoe neutron jak mita jeh  
Neujak mita cicem bayeuen  
Meunan neukheun yoh uroe jeh

Keu ion adek that neubeunci  
Han neuturi ulah-aleh  
Phon dilee kon lom neusom droe  
Bak meuligoe lam padang jeh

Cit tuanku cang Buraksa  
Peue han tanda neubah keudeh  
Neupeugah droe ureueng teuga  
Neujak mita bayeuen meujeh

Han neupeugah ban nyang teupat  
Neupeuwot-wot keunoe keudeh  
E tuanku bungong mirah  
Neupeugah hai bungong nireh

Putroe Jimoe ngon raya su  
Sang-sang karu lam bilek jeh  
Bangsawan kheun teuma meunoe  
Bek le tamoe bungong puteh

Nyoekueh ulon nyang Bangsawan  
Lon jeumeurang di nanggroe jeh  
Aduen kamoe nan Syahpari  
Nyang juhari hai cut puteh

Nyang busu bleuet dalam jaroe  
Bak ibu droe di nanggroe jeh  
Lon adoe peudeueng lam reugam  
Kheundak Tuhan dumpeue meuceh

Ayah kamoe Indra Bungsu  
Deungon ibu di nanggroe jeh  
Nama nanggroe Syahri Kubat  
Bungong riwat deungo beu gleh

Nama neklonpih cit Kubat  
Jarak teumpat lon disideh  
Nama rab sinoe Padang Anta  
Nek raksasa syeedara jeh

dilee masa hai cut bungong  
Na neutanyong bak Unan jeh  
Peue jeuet awai keunoe meuthee  
Bungong keumbee soe nyang ranteh

Seuot putroe e meukuta  
Lam calitra awai meuceh  
Lam calitra na meusurat  
Dilee treb yoh jameun jeh

Indra Bangsawan cang Buraksa  
Cang geureuda Syahpari jeh  
Di ranggroe Anta Beurahi  
Nur Alangki raja sideh

Putroe muda Keumala Sari  
Di Syahpari cit judojih  
Diwa Rakna Keumala Sari  
Deungon abi cit roh wareh

Meunan jikheun sinyak putroe  
Di samlakoe tupeue meuceh  
Hingga beungoh le ngon uroe  
Seungab putroe jijak keudeh

Ubak ayah nyang Kumiran  
Bungong karang ate puleh  
Ban neukalon le ayahanda  
Aneuk dara kawai sideh

Raja tanyong neupareksa  
Hai aneukda pat na langgeh  
Pakon rijang tawoe keunoe  
E sambinoe ilok pareh

Seuot putroe he du raja  
Luem rahsia beuklam sideh  
Patek beuklam lon meujaga  
Si Gamba jibeudoh bak eh

Jijak manoe bak piala  
Ngon ija sawak bak binteh  
Jikeubah le deungon bajee  
Nyang puree lagee kude jeh

Muwoe rupa kon ban dilee  
Jroh that lagee ilok pareh  
Gadob dijih teungoh manoe  
Lale kamoe som bajee jeh

Bajee kude ka lheueh lon som  
Ka lon lhom uyub tika eh  
Jimita le keudeh keunoe  
Jeueb-jeueb sagee dalam binteh

Patek teuma beudoh leugat  
Lheueh lon lihat buet di gob jeh  
Nyoe ho laju ulon teuka  
Nyang banta mantong disideh

Raja deungo that meuuntong  
Ate rihong su ka abeh  
Wahe aneuk putik sukcon  
Tuhan tulong bungong nireh

Lam ate lon brat teujalok  
Lon hana syok keu Unan jeh  
Bungong seuke dalam jantong  
Leumah ujung taeu puteh

Meutuah sinyak bungong trueng  
Ek troh langsung nyang lon gaseh  
Gaseh Tuhan deungon Nabi  
Karong wali lom ngon wareh

Cut Bangsawan ka teujali  
Han soe turi sabab meudeh  
Nyankeuh ureueng cang Buraksa  
Lam calitra masa yoh jeh

Meunyo laen pat kuasa  
Meungkon banta di nanggroe jeh  
Bit ceudah that bintang kala  
Peungeuh cahya watee mureh

Biet meutuah aneuk dara  
Bak Buraksa ek seuliseh  
Le paidah pula pisang  
Watee jeumpang meukhanduri

Ureueng hina tapeusayang  
Keu balasan teuntee geubri  
Na meukeusud pula birah  
Watee susah deuk han sakri

Ureueng hina bek peujaeh  
Bri potallah kadang pakri  
Han tatuoh buet di Tuhan  
Geutanyoe insan han tatukri'

Walee raja uleebalang  
Keuhinaan na cit neubri  
Mungkin Tuhan leungkap sangat  
Kri nyang keuheundak neupeulahe

Wahe kaum dum syeedara  
Ingat kada Tuhan Rabbi  
Teiduek oh noe dilee siat  
Nyoe lon surat lom keuduli

Raja yoh nyan neuhei meuntroe  
Dum sinaroe ngon teungku kadi  
Han jan siat ka troh sampoe  
Angkat jaroe ubak duli

Teuma raja neuhareutoe  
Ubak meuntroe ngon bak kadi  
Peue roe lon meuhei gata keunoe  
Ulon teunyoe na peue takbi

cut Bangsawan ka troh keunoe  
Sideh jinoe lam meuligoe  
Nyang tahei-hei Gamba Unan  
Nyankeuh gob nyan nyang juhari

Meunan raja haba neupeugah  
That babah meuntroe ngon kadi  
Bandum ureueng apoh-apah  
sang-sang sudah hilang budi

Meuntroe seuot bit analan  
Han tatuban padum lawi  
Bit meutuah ngon meuuntong  
Bungong tanjong nyang juhari

Bangsawan nyang sangat meugah  
Cut Sairah meusuami  
Hingga teuma suroh raja  
Jak tueng banta lam meuligoe

Bujang kali teungku meuntroe  
Dum sinaroe geupeureugi  
Oh troh keudeh sujud seumbah  
Meugeupeugah hajat duli

Tuanku langkah sajan kamoe  
U bale droe nyang juhari  
Banta seuot insya Allah  
Ngon ayah sama peureugi

Banta neutron di meuligoe  
Wazi meuntroe ajeb ate  
Jieu rupa jroh samlakoe  
Sinaroe ka hilang budi

Laju neujak bungong uroe  
Kali meuntroe ireng sare  
Troh u bale banta langkah  
Dum kapilah dong meuriti

Kumiran jak peumulia  
Sigala meuntroe ngon wazi  
Di banta cut nyang meutuah  
Sangat reundah horeumat neubri

Raja bri le deungon teumpat  
Nyang indah that hana sakri  
Keurusи meuh nyang meukasab  
Hu meukilat cahya meuri

Kumiran duek sapeng-sapeng  
Di geunireng banta ahli  
Marit raja nyang sultanan  
Hai buleuen trang han lon turi

Cit lon hajat bungong karang  
Lon cintaan malam hari  
Cit lon preh troh aneuk badan  
Lon kira sang goh peureugi

Lon waham bit Gamba Unan  
Meusidroe tan na soe turi  
Padum na treb bungong mirah  
Talangkah sideh di nanggri

Pakon laen bungong karang  
Saleh waham han meuturi  
Soe bu nama bungong keumbee  
Masa dilee yoh di nanggroe

Nanggroe indah peue geuheu nan  
Sulotan peue nan geurasi  
Bunda abi beuta peugah  
Aneuk lidah jantong ate

Seuot banta hai tuanku  
Sang-sang sipu malee kami  
Sabab treb that lon ka keunoe  
Nama nanggroe tuwo kami

Saleh takot bunda ayah  
Hai deelat syah han lon turi  
Seuot raja pirak lipat  
Ka awai that kamoe turi

Tapi cinta lam lon hajat  
Bungong kasab lon beureuhi  
Padum lawet peurcintaan  
Uroe malam rindu ate

Jaweueb banta bungong meulu  
Hai tuanku deungo kami  
Deungo lon kheun hai sulotan  
Lon peugah ban bunda abi

Nama ibu Kande Laila  
Bangsawan nyang nama kami  
Indra Bungsu ayah badan  
Aduen lon tuan nan Syahpari

Nama nanggroe Syahpari Kubat  
Cit jarak that wahe duli  
Bukon sayang bungong jeumpa  
Oh mala luroh meutabu

Teuduek oh noe dilee siat  
Ujong ayat laen lagu  
Hai wareh bek seurapa  
Calitra lon balek buhu

Asai mantong bek meutuka  
Ujong banja nyang napsu  
Pat nyang karot deungon salah  
Tulong tamah wahe teungku

Sang han ek le lon seumurat  
Lon kayem that ate ragu  
Pat nyang karat neupeureumbang  
Keu lon tuan bek neua'u

Jeuet neutamah sigak sanjak  
Mangat galak deungo laku  
Takoh dan-dan tapula dan-dan  
Di yub asan kunyet keutumbu

Meuhaba Indra Bangsawan  
Ubak sulton nyang meusyeuhu  
Nama nanggroe Syahri Kubat  
Cit jarak that nanggroe itu

Raja dilee pih nan Kubat  
Ka meuhat nama meuteuntu  
Hai tuanku raja deelat  
Buet hadarat peue di aku

Kuasa po Rabbul Ibad  
Laot darat buet Tuhanku  
Masa lahe peudeueng lam reugam  
Lon Bangsawan hai tuanku

Nyang busu bleuet dalam jaroe  
Aduen droe di leuen hai teungku  
Meunan haba Cut Bangsawan  
Sangat hireuen tuanku

Seuot raja nyang sulotan  
Hai intan cut bungong meulu  
Cit ka awai na keuneubah  
Bungong mirah nyang meulaku

Lam lon cinta uroe malam  
Judo intan bungong meulu  
Cit ka awai ulon turi  
Bungong giri ka lon taeu

Poh geureuda cut Syahpari  
Keumala Sari judo teuntu  
Cang Buraksa Cut Bangsawan  
Cit ka muban meunan laku

Jinoe aneuk ngo' lon peugah  
Bungong mirah nyang meulaku  
Gata jinoe lon peunikah  
Ngon Sairah bintang timu

Bek tapike meudeh meunoe  
Milek droe e bungong meulu  
Jawueub banta bungong keumbee  
Ateueh ulee lon tuanku

Tapi siat lon meutanggoh  
Lon woe beutroh ubak nek tu  
Lon woe bak nek nyang raksasa  
Di Padang Anta nyang meusyeuhu

Dua uroe troh lon gisa  
Bek na mara bri Tuhanku  
Lheueh neukheun nyan bintang canden  
Hareujen neucinta laju

Deungon siat keunan datang  
Neupasang le bintang timu  
Jibapo le dalam awan  
Bandum hiran soe nyang na eu

Raja-raja teukab jaroe  
Tahe keudroe hana le su  
Mata mandang ate laloe  
Azeub tuloe hai tuanku

Deungon siat han le meuho  
Jibapo deungon meu'u'u  
Teutap raja tahe keudroe  
Po samlakoe troh bak nek tu

Ka troh neuwoe po cut banta  
Nek raksasa tanyong laju  
Pajan aneuk tawoe keunoe  
Cuco kamoe nyang beurbau

Banta seuot na ban siat  
Sira peurab seumbah nek tu  
Banta neuduek le bak teumpat  
Bungong kasab nyang meurindu

Nek raksasa cinta hidang  
U hadapan teuduek laju  
Ukeue banta bungong karang  
Saboh idang nyang meulaku

Ngon seuhab jroh meuuh peurmata  
Idang raya kon sigeutu  
Neubuka le po samlakoe  
Srah jaroe lam tulak bau

Banta makeuen sibuju jaroe  
Nikmat ka troe-broe Tuhanku  
Oh lheueh makeuen srah jaroe  
Idang keudroe gadoh laju

Marit banta teuma dudoe  
Deungon nek droe nyang meusyeuhu  
Ampon hai nek nyang mulia  
Hajat hamba deungon napsu

Nyangkeuh jeuet troh lon woe keunoe  
Ubak nek droe lon bri tau  
Patek hajat nak meukawen  
Puteh licen bintang timu

Deungon putroe Ti Sairah  
Hajat nikah jinoe laju  
Harap ulon keu nek badan  
Sikalian hai nek teungku

Lon nyoe sidroe tan syeedara  
Lom ngon hina pakri laku  
Rakyat pih han rakan pih tan  
Ulon tuan sidroe teuntu

Jeuet keu aeb lom ngon malee  
Pakri lagee nyang meulaku  
Nek raksasa seuot pantah  
Bek tagundah bintang timu

Meunyo rakyat le disinoe  
Cuco kamoe pakon karu  
Tapreh siat lon dang pangge  
Bungong pade bek le karu

Yoh masa nyan nek raksasa  
Dakar Diwa neuhei laju  
Dakar Suna Dakar Diwa  
Pari rimba nyang meulaku

Troh le keunan jen nyan dua  
Bak raksasa tanyong laju  
Dikeue banta sinan teudong  
Jiteumanyong roh meulaku

Ampon tuanku po jonjongan  
Neuheu laman peue na napsu  
Nek raksasa seuot pantah  
Gata lon srah keu cut meulu

Gata lon bri keu cuco droe  
Sinaroe beutabri tau  
Ban nyang suroh takeurija  
Peugot kuta ban nyang napsu

Ban nyang hajat ban nyang awa  
Ban nyang suka tapeulaku  
Yoh nyan teuma nek raksasa  
Keu banta neupulang laju

Hase dum peue si anika  
Lakee gisa bungong meulu  
Lheueh izin nibak nek droe  
Po samlakoe neuwoe laju

Lheueh seureuta raja sakti  
Bungong giri ate seuu  
Ret Antara neuteureubang  
Troph bak padang neutron laju

Banta peugah bak jen dua  
Peugot kuta aduen teungku  
Oh lheueh hase kuta leungkap  
Tahei rakyat teuma laju

Lheueh nibak nyan hai kakanda  
Jak lam kuta bak tuanku  
Neujak tanyong pajan gaca  
Putroe muda nyang beubau

Neujak laju bek treb lambat  
Kamoe hajat woe bak ibu  
Dakar Suna deungo meunan  
Cinta yoh nyan kuta batu

Manyang lusoh troh lam awan  
Didalam nyan meuligoe teuntu  
Ka teudong le dalam padang  
Sangat hiran soe nyang na eu

Lheueh nibak nyan Dakar Diwa  
Jiteupok pha teuma laju  
Teubiet asap that mubura  
Deungon tantra ka na laju

Seurdadu ngon dum pahlawan  
Sikalian alat teuntu  
Kawai pinto lua dalam  
Ngon meuriam dum teudu-du

Cukop ase bandum leungkap  
Deungon rakyat that meuteuntu  
Lheueh nibak nyan na sikeujab  
Jibeurangkat teuma laju

Dakar Suna Dakar Diwa  
Jak bak raja nyang meusyeuhu  
Oh troh keudeh teuma jideelat  
Jiangkat jaroe jaroe meulaku

Deungon rupa sangat cakap  
Duek meungadap ngon tuanku  
Po teuraja neubri teumpat  
Nyang cakap deungon meulaku

Dakar Diwa marit yoh nyan  
Ampon laman hai tuanku  
Lon neusurot uleh banta  
Yue pareksa bungong meulu

Pajan jadeh po meukuta  
Neuboh gaca bintang timu  
Lon seulangke cut Bangsawan  
Nyang lam padang kuta makmu

Jaweueb raja hai aneuk droe  
Bak kamoe beujinoe laju  
Cit baroe kon lam cintaan  
Bangsawan ulon nyang rindu

Lah cit na troh haba banta  
Adat han ka kamoe ragu  
Euntreuk malam lon peujadeh  
Tan soe lon preh laen teungku

Dakar Suna jibet jaroe  
Nibak kamoe pih meulaku  
Mangat rijang buet seuleusoe  
Bek le uroe jeuet keu karu

Tapi bacut banta intan  
Peurjanjian yoh dahulu  
Watee troh hat puphon gaca  
Bak syeedara neuyue bri su

Meuntroe Sani raja sikureueng  
Ka lheueh meukheun masa dulu  
Meung goh lom troh gob nyan teuka  
Han jeuet gaca bungong meulu

Raja seuot teuma meunoe  
Ngon kamoe musoh ka teuntu  
Raja sikureueng ka lheueh muprang  
Yoh dalam blang dilee karu

Pakon jeuet roh deungon banta  
Asai mula cuba teuntu  
Dakar Diwa peugah leugat  
Ka jeuet sahibat ngon tuanku

Masa jijak dalam rimba  
Ubat mata jimeunapsu  
Ka lheueh neucok uleh banta  
Bak uram pha ngon beusoe hu

Ban neudeungo meunan haba  
Takhem raya di tuanku  
Dakar Diwa dum jipeugah  
Bak deelat Syah jipeuteuntu

Laen bak nyan hai sulotan  
Yoh masa prang got that karu  
Ka lheueh takluk sikalian  
Yoh talo prang ngon tuanku

Meunan narit Dakar Diwa  
Po teuraja ate seuu  
Raja pike deungon meuntroe  
Prang saboh roe gob nyan bantu

Teuhah babah dum sinaroe  
Wazi meuntroe ngon pahlawan  
Lheueh nibak nyan po teuraja  
Ubak Diwa neukheun laju

Wahe aneuk Dakar Diwa  
Deungo hamba bungong meulu  
Meunyo meunan lon peuteuntee  
Bungong keumbee bek le karu

Malam peuet blah buleuen Rajab  
Tapeuhijab kaman laju  
Dakar Diwa teuma seuot  
Patek sambot kheun tuanku

Lheueh nibak nyan Dakar Diwa  
Bandua seumbah tuanku  
Lakee idin nibak raja  
Dakar Diwa pulang laju

Han jan siat han meuho ka  
Ajeb raja kon sigeutu  
Dakar Diwa jibeurangkat  
Ubak sahbat bungong meulu

Oh troh keudeh jipeuhaba  
Suroh banta nyang meusyeuhu  
Raja sikureueng meuntroe Sani  
Beujinoe le deungon aku

Hajat banta nyang Bangsawan  
Hai rakan beujinoe laju  
Ban jideungo meunan kalam  
Sikalian beudoh laju

Deungon rakyat dum lasyeuka  
Ikot raja dum meuteuntu  
Padum na treb peurjalanan  
Sampoe yoh nyan padang makmu

Dakar Diwa ka troh riwang  
Seurta kon raja itu  
Geutamong le nyan u dalam  
Uleebalang meuntroe itu

Raja sikureueng ka troh datang  
Bak Bangsawan nyang meusyeuhu  
Dakar Suna laju peurab  
Jak deelat cut bungong meulu

Meuntroe Sani raja sikureueng  
Jak ampeueng Dakar meuteuntu  
Geuba laju dalam kuta  
Bak cut banta nyang beurbau

Troh bak banta mumat jaroe  
Yue duek jinoe teuma laju  
Teuma geuduek hadap banta  
Peugah haba seun sigeutu

Teutap sinan dalam kuta  
Sajan banta bungong meulu  
Dalam lubok jiduek buya  
Dalam paya uleue leumbu

Raja sikureueng siat reuda  
Lon peugisa keu tuanku  
Di lampoh geupula birah  
Lam nicah geupula labu

Haba banta siat dasyah  
Lon peugah raja meusyeuhu  
Ayah putroe nyang analan  
Kumiran nama meuteuntu

Yoh masa nyan di sulton  
Neusurohan bandum teungku  
Dumna ureueng dalam nanggroe  
Sinaroe ka neuyue bri su

Meuntroe wazi ngon beuntara  
Peutua imum meusyeuhu  
Laen bak nyan dum peurasan  
Sikalian neuhei laju

Malam peuet blah linto teuka  
Bak beuntara neuyue bri su  
Keubeue leumbu neuyue drob le  
Nyang pade neuyue tob laju

Mita kayee mita pisang  
Gampong ladang riyoh karu  
Nyang meu haba nyang me surat  
Jeueb-jeueb teumpat barat timu

Waki meuhei aneuk nanggroe  
Sinaroe jitron meu 'u-'u  
Hingga bandum ka meusapat  
Suroh deelat teuma laju

Yoh masa nyan aneuk rakyat  
Maseng babat jipeulaku  
Rakyat jitron han ek peugah  
That bahrullah han jeuet taeu

Inong agam dum meuron-ron  
Oh meukong han meuho lalu  
Dalam kuta rame tuloe  
Malam uroe ka'a ka'u

Gadoh aneuk gadoh cuco  
Gadoh lakoe nyang that karu  
Po isteuri bit that susah  
Jiduek salah jidong tunu

Nyang peurasan han peue peugah  
Macam ulah tadeungo su  
Saman inong saman agam  
Lon geundeurang runggeng meulayu

Oh seupot ka na tandeng bhan  
Oh malam le that-that lagee  
Malam peuet blah sudah sampoe  
Samlakoe woe yoh nyan mampleue

Nguei peukayan teungku linto  
Woe bak judo teuma laju  
Teutap rakyat intat linto  
Dara baro lon peuteuntu

Peusok ngon gleueng cit ngon indam  
Peusok subang teuma laju  
Peusok incien troh lhee macam  
Mata intan takalon iu

Dalam seupot jibeudoh trang  
Meujeureulang cahya jihu  
Ija sutra sawak pinggang  
Beurlian meujampu-jampu

Cüt putroe Ti nyang Sairah  
Siulah sang bungong meulu  
Soe nyang pandang ro ie babah  
Sangat indah bagoe lampu

Hase cukop di meuligoe  
Teuduek oh noe dara baro  
Cut Bangsawan troh geuintat  
Deungon rakyat meuploh ribu

Didalam blang salli ala  
Ka'a ka'u tadeungo su  
Rakan banta nyang sakeuti  
Biek jen Pari nanggroe makmu

Raja sikureueng ireng banta  
Dakar Diwa nyang boh laku  
Dakar Suna Dakar Diwa  
Nyang keupala blah rot linto

Sakeuti le hana macam  
Ate didalam hana kuyu  
Babah rancak bak meukalam  
Dalam kawan hana malu

Blah rot raja pih neusuroh  
Jak rakan boh ampeueng laju  
Saboh meuntroe that analan  
Bri atoran ulee iku

Babah rancak hana macam  
Takon Nilam meuntroe itu  
Oh troh keunoe ka meuhadap  
Bri horeumat Nilam teuntu

Meunan jikheun phon jimula  
Ngon suara jroh meulaku  
Assalamualaikum teungku meutuah  
Oh na langkah bandum teungku

Ranub bungkoh pisang teubee  
Nyang toh ulee neukheun laju  
Dakar Diwa teuma seuot  
Narit patot that meulaku

Wa alaikum salam warahmatullah  
Jarak leupah kamoe lalu  
Lam paya timoh bak reuhat  
Meusapat deungon beuru-ru

Kamoe langkah jarak teumpat  
Raya hajat deungon napsu  
Takon Nilam seuot pantah  
Insya Allah wahe teungku

Jeuet kamoe bri meung na mudah  
Meunyo payah han meungaku  
Dakar Diwa lom jiseuot  
That meusambot tadeungo su

Bubirah reubah lam paya  
Meutimpa ateueh bururu  
Nyang lon hajat ka na saja  
Cit awai ka dilee lon eu

Takon Nilam teuma seuot  
Leumah leumbot bak jimeusu  
Buleuen peungeuh cahya bandrang  
Reudok itam teuka laju

Dilee cit jinoe ka tan  
Pakri jalan tapeulaku  
Dileuen rumoh timoh riwah  
Meusapat ngon bungong meulu

Jeuet neupeugah nyang neuhajat  
Kadang cit rab nak lon jak eu  
Kadang jeuoh pakri kan ban  
Hana jalan lon meungaku

Dakar Diwa jaweueb sabet  
Ubat saket lon meunasu  
Peunyaket deundam cinta beureuhi  
Hana beurhenti meung sigeutu

Takoh trieng peugot keu pacok  
Meureubok di cong bak agu  
Saket ulee lom ngon batok  
Sigo geureutok sang-sang nyum ku

Lon cre gampong tinggai teumpat  
Nyankeuh ubat lon meunapsu  
Cit malam nyoe lon meuhajat  
Nyang goh lom brat wahe teungku

Bukon sayang cicempala  
Got that gura bulee iku  
Oh nan teutap ureueng dua  
Linto nyan geuba keunan laju

Troh u rumoh peuduek linto  
Ateueh kaso meuh meutabu  
Teungku kali le peunikah  
Alhamdulillah neukheun laju

Lheueh ijab kabui nikah  
Banta indah peuek laju  
Ateueh tilam peuduek linto  
Dara baro seumbah teungku

Lheueh seumbah linto baro  
Bungong keundo peuduek laju  
Putroe neuduek di keunireng  
Sapeng-sapeng ngon tuanku

Nyoe pih jalak jeh pih bireng  
Meupuseng ate soe nyang eu  
Seo nyang kalon ate ngeuren  
Oh jikhem cahya gigoe hu

Nyang agam oh jingieng putroe  
Teugoe-goe ate jih rindu  
Nyang inong jingieng samlakoe  
Mandang laloe ate ragu

Puteh-puteh bungong riwat  
Nyang puteh that bungong meulu  
Jinoe laen lom lon seumbah  
Deungo sahabat bek that karu

Malam jula laju leugat  
Nyang rakyat teungoh pajoh bu  
Raja sikureueng duek di bale  
Sinan lale ngon tuanku

Ladom rakyat beudoh jak eh  
Uroe mureh mantong karu  
Sampoe beungoh pagi hari  
Ule ili barat timu

Rakyat jiwoe jak keumbali  
Rumoh duli baro seungoe  
Raja sikureueng woe u nanggroe  
Sani meuntroe jiwoe laju

Tinggai banta di meuligoe  
Deungon putroe nyang beurbau  
Teutap sinan dalam kuta  
Bak ayahanda bintang timu

Geunap uroe meusuka-suka  
Putroe muda ngon tuanku  
Han tom jarak uroe malam  
Ate deundam bungong meulu

Ti Sairah leubeh gaseh  
Jiduek jieh ingat teungku  
Bandua droe saban-saban  
Sang peunulang pusaka bak du

Ate mangat sinyak putroe  
Po samlakoe pih that seuu  
Hingga banta bak siuroe  
Ngon putroe neumarit laju

Idin keu lon hai adekda  
Woe lam rimba ubak nek tu  
Ubak po nek nyang raksasa  
Padang Anta nyang that makmu

Hana treb dua lhee uroe  
Teuma lon woe keunoe laju  
Lagi janji pih goh lom troh  
Geubri buloh nyang meurindu

Nyankeuh jeuet troh ulon teuka  
Lon jak mita buloh itu  
Nyang neulumpoe uleh ayah  
Buloh indah nyang meurindu

Meung ka geubri le nek buloh  
Cit rijang troh lon woe laju  
Putroe seuot idin kamoe  
Bek treb neuwoe wahe teungku

Mate ulon hai meukuta  
Meutan gata hai tuanku  
Meunan jikheun cut bintang srot  
Bak teuot jiseumbah laju

Lheueh jiseumbah nibak teuot  
Po bintang srot neutron laju  
Oh troh uyub cut Bangsawan  
Neucintakan guda itu

Troh le keunan Jeungki Ijo  
Bungong keundo pasang laju  
Rot antara neuteureuban  
Siat datang ubak nek tu

Banta neutron dalam kuta  
Nek raksasa tanyong laju  
Ka troh tawoe hai aneukda  
Bungong jeumpa nyang beurbau

Peue na hajat aneuk lidah  
Cuba peugah ubak nek tu  
Banta seuot nek panghulee  
Lon jak bri thee bak nek teungku

Sabab patek heundak gisa  
Bak ayahanda nanggroe makmu  
Teuma janji nek goh lom troh  
Neubri buloh nyang lumpoe du

Meung hana nyan pakri lon woe  
Teuntee paloe hai nek teungku  
Seuot po nek hai aneukda  
Mudah saja bri Tuhanku

Nyang keu buloh bek tagundah  
Lon seuleuah jinoe laju  
Nek raksasa beuet hikeumat  
Na ingat guree dahulu

Ukeue banta keunan ka troh  
Nama buloh nyang peurindu  
Nek raksasa le peujaroe  
Hai samlakoe aneuk teungku

Nyankeuh aneuk nyang talakee  
Bungong keumbee tacok laju  
Bek tabri-bri barangkasoe  
E samlakoe bek tabri eu

Jok bak ayah oh tapuwoe  
Bungong uroe wasiet nek tu  
Bek taubah ban amanah  
Le hikeumat buloh peurindu

Banta sambot le u jaroe  
Po samlakoe troh ban napsu  
Ate mangat bungong uroe  
Ka troh sampoe nyang lumpoe du

Lakee idin po cut banta  
Keumeung gisa bungong meulu  
Idin pih lheueh bak raksasa  
Laju gisa bintang timu

Deungon guda nyang hareujen  
Bungong husen bapo laju  
Troh lam kuta rab meuligoe  
Neupeutron droe raja makmu

Neuek laju po samlakoe  
Bak judo droe nyang beurbau  
Putroe kalon ka woe banta  
Peurab lanja seumbah laju

Putroe tanyong peue jeuet lambat  
Na dapat buloh bak nek tu  
Jaweueb banta bungong mirah  
Ngon tuah cut bungong meulu

Ban nyang hajat Tuhan peutroh  
Ka na buloh nyang lumpoe du  
Deungon tuah puteh lusoh  
Tuhan peutroh ban nyang napsu

Teuma jinoe hai adekda  
Hajat hamba woe bak ibu  
Sabab treb that lon ka keunoe  
Di nanggroe kadang na karu

Dan lagi jak saweue bunda  
Lon ngon gata hai cut meulu  
Tajak bri thee bak ayahanda  
Lom bak bunda pih tabri su

Takheun tawoe Syahri Kubat  
Saweue deelat ayah ibu  
Takheun han treb ulon riwang  
Hai buleuen trang tajak laju

Meunan narit banta peugah  
Bungong mirah beudoh laju  
Cut putroe Ti nyang Sairah  
Jak bak ayah dan bak ibu

Bandua po cut banta  
Seumbah bunda ngon tuanku  
Raja sambot po mulia  
Hai aneukda peue bu napsu

Marit putroe Ti Sairah  
Wahe ayah deungon ibu  
Idin kamoe wahe bunda  
Bandua deungon tuanku

Teungku neuwoe saweue bunda  
Ngon ayahanda nanggroe makmu  
Sabab ka treb neujak keunoe  
Di nanggroe kadang na karu

Deungon kamoe sigo dua  
Idin bapa deungon ibu  
Cit hana treb ulon gisa  
Bak ayahanda keunoe laju

Jawueub raja han peue salah  
Aneuk lidah panyang umu  
Idin ayah deungon bunda  
Bandua jak saweue ibu

Yoh nyan raja yue meuhase  
Ka neupangge meuntroe teungku  
Neuyue peugot ngon makanan  
Sikalian yue peulaku

Neuyue bri thee putroe bungka  
Bak tuan tha nanggroe makmu  
Bek jeuet susah ayah bunda  
Oh troh gisa aneuk teungku

Bit nyo ceudah bungong jéumpa  
Oh rab mala bee meuharu  
Teuduek siat haba raja  
Lon calitra laen dulu

Lon peugah adoe Buraksa  
Dalam rimba jimoé karu  
Jikeumeung jak tuntot bila  
Tan kuasa inong hantu

Teuma jibeuet saboh mantra  
Ateueh banta jipruh laju  
Ateueh banta deungon putroe  
Bandua droe jipeulaku

Teukeudi po Tuhan Esa  
Keunong banta bintang timu  
Deungon putroe Ti Sairah  
Laju reubah bungong meulu

Bandua droe sigo reubah  
Sairah deungon tuanku  
Teuka saket deungon nadak  
Bungong meurak han leupah bu

Dumna tabib dalam nanggroe  
Rajab putroe ngon tuanku  
Hana kureueng pih meung siat  
Nyang na mubrat maken laju

Raja susah hana bagoe  
Ureueng nanggroe pih that karu  
Teuma raja pangge nujum  
Nyang ek maklum le ileumu

Troh le keunan ubak raja  
Yue pareksa pantah laju  
Teungku nujum cok le kitab  
Teuma neulob kalon buhu

Lheueh neukalon jeueb-jeueb ayat  
Neutob kitab teuma laju  
Jibet jaroe le bandua  
Hai meukuta raja makmu

Hana ubat lam nanggroe nyoe  
Saket putroe ngon tuanku  
Peunyaket nyoe bak Buraksa  
Jitueng bila buet nyang laloe

Adoe inong di Buraksa  
Hai meukuta jih peulaku  
Lam nanggroe nyoe hana ubat  
Wahe deelat ka lheueh lon eu

Meulaenkan ubat bak potallah  
Cit troh langkah teungku  
Meunan haba nujum peugah  
Lom ka susah di tuanku

Neuduek neudong aloh alah  
Raja meugah moe meu' u'u  
Bukon sayang rumoh raya  
Geurok rungka uroe Sabtu

Tuan putroe deungan raja  
Ureueng dua hana ek bu  
Ija sutra Mako Midan  
Peukayan putroe Cina karu

Teutap susah di sulton  
Meuriwang keu aduen teungku  
Hingga lawet nibak lawan  
Beukah eumpang tinggai sudep

Manek pirak saboh reugam  
Dilee jameun geuboh kawat  
Ngon ija krong hana reumbang  
Ngon subang sang tutop geupet

Geumeu pinggang miyub ukeue  
Seuleuweue mupalet-palet  
Ngon baja bruek boh bak gigoe  
Andam di dhoe jroh meuleb-leb

Suruban ureueng Banggali  
Ube guci oh jipale  
AMMA BAKDU lon peugah kri  
Ureueng tari le nyang sulet

Lam paya timoh boh birah  
Lam neucah sialet-alet  
Sidroe banta ngo lon peugah  
Nanggroe luah seungoe ka treb

Cut Syahpari geurasi nan  
Di bangsawan aduen sabet  
Ngon judo Keumala Sari  
Cut Syahpari sinan galeb

Bak simalam neumeulumpoe  
Keu adoe droe bungong ruseb  
Neulumpoe adek Bangsawan  
Pijuet badan atueh buket

Banta teueh atueh tanoh  
Buleuen peunoh brat that saket  
Deungon putroe sigo dua  
Teuhanta di atueh buket

Oh neukalon cut Syahpari  
Bungong giri moe meureb-reb  
Neumoe bae hana sakri  
Weueh that ate bungong ruseb

Oh teukeujot bak meulumpoe  
Neuduek neumoe ate areb  
Ie mata ro hana bagoe  
Samlakoe neumoe meureb-reb

Teuringat keu cut Bangsawan  
Adek badan brat that saket  
Teuma beudoh putroe muda  
Jak pareksa bungong kawet

Pakon sabab hai tuanku  
Jeuet keu karu han tom ka treb  
Peue na salah adek neuh nyoe  
Peugah jinoe peue seunaket

Meung na salah ulon teuh nyoe  
Neupoh jinoe laju bek treb  
Bek neupike meudeh meunoe  
Meunyo kamoe nyang peuaeb

Meunan jikheun cut sambinoe  
Sira Jimoe ngon meureb-reb  
Seuot banta cut Syahpari  
Bungong giri kon seunaket

Hana salah gata judo  
Jeuet lon bae ie mata sret  
Na rahsia Tuhan neubri  
Adek kami brat that saket

Cut Bangsawan adek kamoe  
Lon lumpoe di atueh buket  
Nibak tanoh eh teuhanta  
Bandua ngon bungong kawet

Idin judo nibak gata  
Lon kubangka cit hana treb  
Lon keumeung jak bak Bangsawan  
Bak pikeran brat that saket

Seuot putroe bungong meulu  
Hai tuanku idin sabet  
Neujak laju po meukuta  
Adekda teuntee nyo saket

Hikeumat adoe Buraksa  
Jitueng bila teuntu sabet  
Meung kon rijang troh neulangkah  
Bungong mirah teuntu gharib

Nyoe pat incien nyang malakat  
Nyoekueh ubat bungong kawet  
Neuindram didalam cawan  
Neusiram deungon neupeujeb

Tulong Allah mukjizat Nabi  
Bungong giri puleh saket  
Hingga beungoh pagi hari  
Syahpari neumoe meureb-reb

Lakee idin bak adekda  
Neutron lanja bungong ruseb  
Banta neujak rot lam rimba  
Ngon ie mata ka neualet

Meuteumeung krueng neubloh paya  
Banta muda moe meureb-reb  
Deungon incien sajan neuba  
Ngon ie mata le neualet

Rot lam rimba neubeurjalan  
Neuarong blang teungoh buket  
Troph mubuleuen dalam rimba  
Padang anta ka troh sabet

Abeh uteuen leumah padang  
Neujak tajam bungong kawet  
Troph bak rumoh gampong ladang  
Ureueng cit tan jiweh ka treb

Tan meuteumee sidroe insan  
Dalam peukan seungoe ka treb  
Keude tutop hana ureueng  
Bungong kareueng that ajaeb

Neujak laju po samlakoe  
Sira neumoe bungong ruseb  
Leumah sidroe ureueng tuha  
Neuhei lanja teungku bek treb

Banta tanyong le ngon sigra  
Hai syeedara neukheun sabet  
Meuneukat le ureueng dum tan  
Peue amilan that ajaeb

Ureueng tuha seuot pantah  
Sabab susah raja saket  
Bandum ureueng ka lam kuta  
Putroe muda brat that saket

Bangsawan ngon putroe muda  
Dalam tika ka padum treb  
Lom neujawueub cut Syahpari  
Neuba kami teungku siblet

Sabab lon ngo nan Bangsawan  
Laen cit tan tuto sabet  
Na bak kamoe ubat indah  
Neuba bagah teungku bek treb

Teuma geujak laju dua  
Tröh lam kuta bungong kawet  
Banta neukek u meuligoe  
Jak eu adoe nyang brat saket

Ban neukalon bungong meurak  
Ate rusak leubeh gharib  
Ureueng rame dum meusak-sak  
Nyang teungoh jak sang geupeulet

Nyang teungoh woe got that riöh  
Meugeurupoh ladom rateb  
Ladom ureueng tahe keudroe  
Ingar putroe nyoe that saket

Teuka reudok seupot nanggroe  
Jitob uroe teungoh tarek  
Ujung banja nyoe lon gantoe  
Hai rakan droe bacut mubalek

Bek neukheun sapeue soe nyang baca  
Pueh lagoena kalam lon tarek  
Lagi malam pih ka jula  
Teungeut mata lon lakee eh

Lom pih ulon teukeujot raya  
Geulanteue teuka got that tarek  
Srot ngon kalam nibak jaroe  
Lom plueng adoe dalam bilek

Oh noe reuda haba rainpoe  
Kisah meuwoe keu haba baek  
Ureueng gampong ang-eung jimoe  
Jipoh-poh droe dalam bilek

Teungoh bae dimeuratee  
Wet-wet ulee dum meuhasek  
Nyang teungoh jak dum meuree-ree  
Ka jikacee keunan jiek

Syahpari duek nibak ulee  
Bungong keumbee rab ngon adek  
Bukon sayang bantai kaso  
Teupeuro didalam bilek

Oh lon ingat hai adek e  
Teusungko mubalek-balek  
Banta lakee cawan saboh  
Geubeudoh laju geutarek

Teuma geucok jok keu banta  
Sambot lanja bungong rubek  
Neusuett incien ka neuindram  
Dalam cawan nyang jroh baek

Ateueh banta ka neusiram  
Rahob badan bungong rubek  
Ateueh putroe sigo dua  
Po cut banta nyang peureutek

Na sikeujab laju jaga  
Teubleuet mata rupa cantek  
Banta neukheun eu Bangsawan  
Ka troh abang saweue adek

Nyoepat aduen nyang Syahpari  
Bungong giri saweue adek  
Nyang kuasa Tuhan sidroe  
Beurangkasoe han ek balek

Bukon sayang kapeueh panjoe  
Jeueb-jeueb nanggroe angen peuek  
Teuduek oh nan teuma jinoe  
Laen bagoe lom lon tarek

Cicempala puteh bahu  
Oh jimeusu got meuragam  
Nyoe lon peugah lom bak bunoe  
Samlakoe teungoh meukalam

Syahpari kheun lom bak adoe  
E samlakoe cut Bangsawan  
Ka troh ulon ubak gata  
Hai adekda bungong kareueng

Kheundak Tuhan po lon sidrōe  
Beurangkasoe han jituban  
Neupeujarak neupeusapat  
Deungan kudrat polon Tuhan

Cut Bangsawan teubleuet mata  
Badan pih ka phui han macam  
Ban neudeungo su kakanda  
Neuduek lanja cut Bangsawan

Banta pandang nyan Syahpari  
Bak gaki neusujud rijang  
Ka troh neujak nyan samlakoe  
Seunaweue adoe bungong karang

Geumeuwa-wa geumeu moe-moe  
Bandua droe adek abang  
Ureueng laen tahe keudroe  
Dum sinaroe saleh waham

Ka teujalok tuan putroe  
Nyoe aduen droe banta intan  
Neupeurab le com bak gaki  
Syahpari neusambot rijang

Po teuraja pih disinan  
Bak cut Sanan neutanyong ban  
Pakon meunan hai aneukda  
Soe di banta hai cut intan

Putroe peugah nyan aduen droe  
Yoh saboh roe neubri jalan  
Nyang geukheun nama Syahpari  
Wahe duli nyankeuh abang

Raja deungo aduen banta  
Po mulia pantah rijang  
Mat bak jaroe laju sigra  
Keudeh geuba bale kambang

Raja bri le deungon teumpat  
Nyang indah that hana macam  
Teuma neuduek banta deelat  
Sinan sapat ngon Kumiran

Ngon minoman neuyue angkat  
Ie syereubat Pulo Pinang  
Ukeue banta geubeuot le  
Bungong pade yoh nyan makan

Oh lheueh makeuen po samlakoe  
Raja nanggroe buka kalam  
Raja tanyong hai aneukda  
Pajan masa keunoe datang

Banta seuot cit hana treb  
Lon ngo saket cut Bangsawan  
Di nanggroe Anta Beureuhi  
Tuhan neubri bak simalam

Neupeuleumah lam rasia  
Saket banta ngon cut intan  
Abeh bandum banta rawi  
That beureuhi di sulton

Meukleb mata teukab bibi  
Cut puteh di ka troh datang  
Meutuah that bungong giri  
Syahpari aduen Bangsawan

Beu tapeugah awai akhe  
Yoh masa cre ngon Bangsawan  
Troph sampoe bak cang geureuda  
Putroe muda dalam geundrang

Diwa Rakna Keumala Sari  
Cut Syahpari neupeugah trang  
Raja seuot cit syeedara  
Aneuk apa dilon tuan

Meusampe that bijeh mata  
Peuglah mara aneuk badan  
Padumna treb teutap sinan  
Bak nanggroe nyan beursukaan

Ate mangat bungong riwat  
Ka meusapat ngon Bangsawan  
Hingga teuma padum masa  
Banta muda mohon pulang

Cut Bangsawan sama juga  
Mohon gisa bungong karang  
Saweue ayah deungon bunda  
Bungong jeumpa treb ka hilang

Oh lheueh pakat ngon syeedara  
Mohon gisa bak sulotan  
Idin keu lon tuanku droe  
Jinoe lon woe nanggroe makam

Kumiran kheun idin kamoe  
Bandua droe neutron rijang  
Bek treb aneuk nyan tagisa  
Du ka tuha hai buleuen trang

Lheueh nibaknyan po cut banta  
Neubri haba bandum rakan  
Ubak raja sikureueng droe  
Samlakoe neubri habaran

Meuntroe Sani pih neupeugah  
Yue meukeumah laju rijang  
Peuhase droe syeedara  
Hajat hamba heundak pulang

Gata bandum hajat lon ba  
Syeedara dum sikalian  
Cukop hase sianika  
Seumbah bunda ngon sulotan

Neubeurangkat po cut banta  
Ngon lasyeuka dum meukawan  
Deungon putroe sajan neuba  
Lom ngon tantra sikalian

Raja sikureueng pih hase ka  
Intat banta nyang Bangsawan  
Rot nanggroe Anta Beureuhi  
Bak putroe ti judo cut bang

Rot lam rimba geupeuteupat  
Deungon rakyat dum sibarang  
Ka geuek cot geuntron paloh  
Gunong apoh geujeumeurang

Troh mubeuleuen geujak sabe  
Rot dalam gle kareueng tajam  
Hingga sampoe padum lawi  
Anta beureuhi ka troh datang

Geutamong laju lam kuta  
Putroe muda le dengoran  
Ka troh neuwoe po cut banta  
Ngon adekda nyang Bangsawan

Deungon putroe Ti Sairah  
Rupa ceudah ban buleuen trang  
Keumala Sari putroe indah  
Deungon karaj jime sajan

Oh troh keunan mumat jaroe  
Jicok putroe puwoe rijang  
Geutamong le dalam kuta  
Dum sigala uleebalang

Duek mupiyoh sianika  
Bak desa nanggroe cut abang  
Nanggroe luah seungoue raya  
Buet geureuda dilee simpan

Padumna treb teutap sinan  
Bak nanggroe ban beursukaan  
Hingga teuma padum lawi  
Banta ahli lom beurjalan

Lom nanggroe Anta Beureuhi  
Geuboh waki keu badaikan  
Sabab putroe pih ka neuba  
Po cut banta woe bak makam

Saweue ayah nanggroe Kubat  
Dilee treb that neubeurjalan  
Hase cukop dum sinaroe  
Po samlakoe bungka yoh nyan

Deungon rakyat sianika  
Rot lam rimba geubeurjalan  
Uroe malam geujak sabe  
Gunong reule dum teureuban

Troh lhee buleuen bak keunira  
Dalam rimba gunong itam  
Dumnan keuh treb geubeurangkat  
Nanggroe Kubat sampoe datang

Bineh nanggroe geujak ka troh  
U baroh ka geubeurjalan  
Didalam blang geupioh droe  
Dum sinaroe uleebalang

Teutap sinan geumeupioh  
Dang tho reuoh sikalian  
Teuma meugah dalam kuta  
Bak ayahanda bungong karang

Cut Bangawan ngon Syahpari  
Bungong giri ka troh riwang  
Dua putroe sajan neuba  
Judo banta bungong karang

Bandua droe aneuk dara  
Jroh that rupa hana macam  
Yoh nyan raja neukrah rakyat  
Waki meukat uleebalang

Neuyue jak tueng putroe muda  
Ngon aneukda bungong karang  
Wahe kaom tajak lanja  
Aneuk hamba tajak julang

Meunan narit nibak raja  
Tuha muda teubiet rijang  
Rakyat teubiet dum sinaroe  
Jak tueng putroe judo intan

Ngon meuriam laju jicok  
Meugcui upoh sang ka jeuet prang  
Tarek alam rupa-rupa  
Agam dara teubiet u blang

Oh troh keudeh mumat jaroe  
Wazi meuntroe uleebalang  
Oh sare lheueh mumat jaroe  
Sinaroe tamong u dalam

Dua putroe boh lam usong  
Buka payong pudi intan  
Geupeutamong bak tuanta  
Peumulia bungong rihan

Geupeuduek le atueh geuta  
Nyang jroh rupa hana macam  
Bangsawan deungon Syahpari  
Seumbah abi nyang sulton

Raja sikureueng bri horeumat  
Ban nyañg adat muliaan  
Banta neuk u leupu  
Seumbah ibu Kande Laila

Kande Laila yoh nyan neumoe  
E samlakoe bungong karang  
Meutuah that bijeh mata  
Ka troh gisa bak lon tuan

Lon sarab hana le tawoe  
A pon kamoe aneuk badan  
Jeueb aulia lon meukaoi  
Jeumaloi beu troh tariwang

Uroe malam lon meulakee  
Bungong keumbee beu troh pulang  
Bangsawan kheun do'a ibu  
Troph ban nafsu aneuk badan

Kande Laila beudoh laju  
Neucok Bungsu geuboh rijang  
Laju neuwa ka neupangkee  
Meulintee bandua sajan

Wie ngon uneun nyan meulintee  
Sira pangkee beatangisan  
Ngon ie mata ro meure-re  
Basah bajee bulut badan

Sira neumoe neucom sabe  
Neumeurawé macam-macam  
Guda plang guda peulangi  
Jilari di atueh jalan

E po cut Keumala Sari  
E nyak Ti Sairah intan  
Lah na gata bungong uroe  
Troph tapuwoe cut Bangsawan

Adat kon na gata dua  
Apon asa ulon tuan  
Meutuah that gata putroe  
Bandua droe tapeuriwang

Bit ceudah that bintang kala  
Watee jula cahya jitrang  
Seupot beungoh lam lon cinta  
Beu troh gata bungong karang

Bukon sayang jeumpa mirah  
Bee mupeuah-peuah watee malam  
Wahe aneuk Ti Sairah  
Bumeutuah gata intan

Alah hai do kodaidi  
Mirah pati lhee sikawan  
Bumeutuah bungong giri  
Keumala Sari aneuk badan

Alah hai boh jambee ari  
Boh punti di blang beuragang  
Adat kon na cut putroe ti  
Keu soe lon bri gleueng ngon subang

Alah hai boh tuba rasa  
Boh pala ngon bungong lawang  
Soe lon peueh kaso sutra  
Meung tan gata hai buleuen trang

Alah hai on sisek naga  
On jeumpa on rihan itam  
Puleh ate lon nyang luka  
Oh na gata pirak hupam

Meunan geukheun le tuan ta  
Ngon ie mata meugeulumbang  
Bukon sayang samarinda  
Got that gura oh tapinggang

Putroe neumoe ro ie mata  
Basah ija deungan kutang  
Bukon sayang lon eu kaso  
Han le linto jula malam

Seb keu dumnan putroe bae  
Laen dum le macam-macam  
Bukon sayang tok beuragoe  
Bulee bak dhoe mirah itam

Teutap oh noe di cut putroe  
Keu samlakoe lon peuriwang  
Syahpari ek bale raksa  
Bandua deungan Bangsawan

Ngadap ayah Bungsu Indra  
Laen raja uleebalang  
Yoh masa nyan po teuraja  
Neupareksa laju rijang

Wahe aneuk bijeh mata  
Nyang ta mita na hai intan  
Buloh peurindu nyang lon cinta  
Toh ban rupa hai buleuen trang

Meunyo cit na hai aneuk droe  
Taba keunoe lon kalon trang  
Seuot banta nyang Syahpari  
Sampoe neubri uleh Tuhan

Bak Bangsawan adek kamoe  
Wahe du droe buleuen intan  
Bangsawan jok teuma laju  
Di tuanku galak han ban

Neueu rupa jroh han bagoe  
Ban lam lumpoe cit ubah tan  
Dalam nanggroe han sapat sa  
Ngon suara le that macam

Bangsawan kheun teuma laju  
Wasiet nek tu bak lon tuan  
Beurangkasoe han neubri eu  
Buloh peurindu nyang analan

Le hikemat bak buloh nyan  
Wasiet meunan bak lon tuan  
Bungsu Indra that beureuhi  
Bak Syahpari neupeugah ban

Wahe aneuk tango kamoe  
Syahpari deungan Bangsawan  
Nyan pat nanggroe deungan rakyat  
Ka meuhat keu gata pulang

Nyan pat mideuen deungan kuta  
Gata dua peurintah kan  
Di lon han le ku keurajeuen  
Hai buleuen keu gata pulang

Meunyo ka na nyang lon lumpoe  
Nyang nanggroe keu gata intan  
Jawueub banta nyang Syahpari  
Wahe abi ban sukaan

Nyang got bak lon hai ayahaha  
Nyang meurasa bak lon tuan  
Meunyo ulon wahe abi  
Hana meukri hai du badan

Sabab patek roh peureugi  
Anta Beureuhi hana urang  
Nanggroe Kubat'keu adekda  
Nyang meurasa bak lon tuan

meunyo ulon jeuet seungsara  
Ahe masa jeuet susahan  
Jawueub raja ban nyang hukom  
Putik sukon ban sukaan

Nibak kamoe hana muphom  
Puteh sabon ban nyang reumbong  
Lheueh nyan teuma geuheui rakyat  
Timu barat uleebalang

Dalam kuta ka meusapat  
Tet nubuet lhiet meuriam  
Cut Bangsawan ma geuangkat  
Pirak lipat keu sulotan

Mat neuraca nanggroe Kubat  
Dumna rakyat that sukaan  
Hukom ade tan meuilah  
Banta indah tan teuladan

Han tom rakyat jimupake  
Jeueb sagoe be jeueb sagoe blang  
Sabab raja sangat ade  
Lam jipuji uroe malam

Oh keurajeuen po samlakoe  
Makmu nanggroe hana macam  
Raja teutap lam meuligoe  
Malam uroe beursukaan

Deungon judo ti Sairah  
Rupa ceudah ban buleuen trang  
Nanggroe Kubat neupeurintah  
Nyang that luah keu makmuran

Nyang aduen droe nan Syahpari  
Anta Beureuhi keurajaan  
Timu barat hukom neubri  
Syahpari jadi sulotan

Sinan teutap bungong pade  
Hukom sabe that adelan  
Nanggroe seunang hana bagoe  
Bandua droe tan bidaan

Keudeh keunoe neujak neuwoe  
Po samlakoe nyang analan  
Jeueb-jeueb raja cit jipujoe  
Keu samlakoe pirak hupam

Bangsawan teutap di nanggroe  
Deungon putroe meuglum bintang  
Anta Beuranta siat-siat  
Bungong riwat kayem pulang

Saweue bunda deungon ayah  
Sairah deungon Bangsawan  
Meunan sabe po cut banta  
Hana lupa beurangkajan

Rakyat laen woe u tangga  
Sikureueng raja woe bak tangga  
Meuntroe Sani pih jigisa  
Dum sigala abeh riwang

Teutap rakyat bandum jiwoe  
Po samlakoe teutap diam  
Neuduek seunang lam meuligoe  
Ngon judo droe nyang analan

Neukeurajeuen nanggroe Kubat  
Hukom neumat that adelan  
Geunap uroe jitron rakyat  
Ubak deelat syahi alam

Seunang ate putik langsat  
Pirak lipat that sukaan  
Malam uroe meusuka-suka  
Putroe muda deungon sulton

Ngon peurasan hana reuda  
Dalam kuta sare kiam  
Wazi meuntroe ngon bintara  
Sajan banta han tom reunggang

Sabab ade amat sangat  
Jihoreumat beurangkajan  
Anta Beuranta nyang meuhalak  
Bungong meurak woe meujan-jan

Di nanggroe Anta Beureuhi  
Cut Syahpari nyang sulton  
Keudeh keunoe geupeuregi  
Bak Syahpari bak Bangsawan

Nanggroe aman han le karu  
Barat timu han tom na prang  
Ureueng rame barang makmu  
Bungong meulu gaseh Tuhan

Banta neuduek lam meuligoe  
Ngon judo droe bungong karang  
Han tom jarak bandua droe  
Malam uroe beursukaan

Neuduek seunang lam keurajeuen  
Bungong kareueng gaseh Tuhan  
Deungon Judo putroe meugleueng  
Cut buleuen Indra Bungsu

Dalam paya bungong ipoh  
Meureubok bulee jih sroe-broe  
Cut Bangsawan ate daok  
Wase dum trok jeueb-jeueb sagoe

Laot ngon gle wase jijok  
Meutumpok ukeue samlakoe  
Tunong baroh timu barat  
Meusapat ubak raja nyoe

Karonya Allah Khalikon Mannan  
Haba Bangsawan ka tamat oh noe  
Lon meulakee uroe ngon malam  
Bak Tuhan nyang po alam nyoe

Beu ek tamat ulon surat  
Wahe sahabat hikayat nyoe  
Teuma jinoe neubri le Tuhan  
Ka keuh simpan dum sinaroe

Malam sabtu jeuem poh siploh  
Hai teungku beh ka seuleusoe  
Wahe kaom dum syeedara  
Bek upat ceula keu ulon sidroe

Bek neuupat ngon ceureuca  
Soe nyang baca hikayat nyoe  
Pat nyang karot teungku tuka  
Silab banja pumeuah kamoe

Lon lakee meuah dum bak wareh  
Pat-pat seuliseh neutulong keunoe  
Jeuet keuh dumnoe ulon peugah  
Ka keuh sudah abeh oh noe

Amin ya rabbal alamin  
Kabui mukmin lakee do'a



Ram



PN BALAI PUSTAKA — JAKARTA

Perpustakaan  
Jenderal Keb

899.22  
HIK

